

62,29/B

MEDICAL SOCIETY
OF LONDON



ACCESSION NUMBER

PRESS MARK

BELLINI, L.

S. Ades & M.
C. C. C. Cron
Bw + y.

XIX 612

LAURENTII BELLINI
FLORENTINI
EXERCITATIONES
ANATOMICÆ DUÆ
DE
STRUCTURA ET USU RENUM
UT ET DE
GUSTUS ORGANO
NOVISSIME DEPREHENSO;
Præmissis ad faciliorem intelligentiam quibusdam
DE SAPORIBUS.

ACCEDUNT

Quædam Renum monstrosorum exempla, ex
Medicorum Celebrium Scriptis collecta.

PER

GERHARDUM BLASIUM

Med. Doct. & Profess. Publ.



LUGDUNI BATAVORUM,
Apud JOH. ARNOLD: LANGERACK, 1711.

OF LONDON MEDICAL
SOCIETY

THE UNIVERSITY OF CHICAGO
LIBRARY

1911

1911

THE UNIVERSITY OF CHICAGO
LIBRARY

1911

THE UNIVERSITY OF CHICAGO
LIBRARY

1911

THE UNIVERSITY OF CHICAGO
LIBRARY

1911

THE UNIVERSITY OF CHICAGO
LIBRARY

1911

THE UNIVERSITY OF CHICAGO
LIBRARY



1911

THE UNIVERSITY OF CHICAGO
LIBRARY

nd
wa

ALMÆ FACULTATI MEDICÆ

ILLUSTRIS ACADEMIÆ

LUGD. BATAVÆ

UTPOTE

MAGNIFICO, EXCELLENTIS-

SIMIS, AMPLISSIMIS,

EXPERIENTISSIMIS-

QUE VIRIS

D. BERNHARDO ALBINO,

Sacræ Regiæ Majestatis in Prussia Confiliario aulico, & Archiatro, Medicinæ Theoretico Practicæ Professori, h. t. Rectori Magnifico.

D. GODEFRIDO BIDLOO,

M. D. Anatomix & Coll. Med. Pract. Professori Ordinario, Coll. Chirurg. Civitat. Lugd. in Batavis Præsidi & Societatis Regiæ, quæ est Londini, Membro.

D. FREDERICO DEKKERS,
M. D. Medicinæ Practicæ & Collegii Pra-
ctici Professori Ordinario.

D. JACOB O L E M O R T,
M. D. Chymicæ & Medicinæ Professori
Ordinario.

D. HERMANNO BOERHAAVE,
A. L. M. Philosophiæ & Medicinæ Docto-
-ri, hujusque & Botanices Professori Ordi-
nario.

NOVAM hanc LAURENTII BELLINI
Exercitationum Anatomicarum e-
ditionem, ut mentem gratam, de-
bitamque observantiam testaretur,
eâ, quâ decet, animi re-
verentiâ

Offert & inscribit

JOH: ARN: LANGERACK.

SERE-

SERENISSIMO COSMO TERTIO

ETRURIAE PRINCIPI,
LAURENTIUS BELLINI

F.



DIFFICILIS novarum rerum inven-
tio me sæpius absterruit, quò mi-
nus exiguam hanc exercitationem
publici juris facerem Serenissime
Princeps. Accedebat ingenii mei
imbecillitas, simile quid aggredi
impotentis; & cùm attentius meditarer cujus quan-
tique Principis nomine deberet insigniri, id o-
mittendum potius, quàm evulgandum constitue-
ram. Et profectò omissum fuisset, nisi maturio-
ri consilio cognovissem deinde nullius esse roboris,
quæ primo aspectu magni moliminis mihi obsiste-
re videbantur impedimenta. Et arduum quidem
est novam inventis addere observationem, quid
enim adhuc superest in corporibus, quod accura-
tæ Anatomicorum curiositati non patuerit? Red-
ditus jam circularis ille Sanguini motus, quem
ipsi Antiquitas parum fortunata rapuerat. *Suo*
jam

DEDICATORIA.

jam deturbatum imperio Epar, cui unanimi Medicorum omnium consensu Vetustas illud præferebat. Quid in Pulmonum fabrica, quid in Lienis textura, quid in Cibi concoctione, quid in Chyli progressu, quid in partium alimento desiderandum? Effæta jam Natura est, nec laudabile aliquid habet, quod parere possit imposterum. At quid tamen isthæc argumenta? Evidentiâ magistrâ condiscimus nova semper in dies assurgere, & inventis inventa non obstare. Quid ni ergo liceat Seneca præeunte concludere, Multum adhuc restat operis, multumque restabit, nec ulli nato post mille secula præcludetur occasio aliquid adhuc adjiciendi? Sola proinde hanc exercitationem evulgare cogitanti mihi reclamabat propriæ mentis inscitia, florentior ætas, & Anatomicarum rerum imperitia. Quibus enim rationum momentis grandioris Sapientiæ virum, antiquitatis amantissimum, impuber ipse, nondum vigenarius, nullis præceptis nullisque Anatomicis artibus instructus, obstringere possem? Satiùs tacuisse ducebam, ne, quod tam mirabili arte Natura composuit, aut irrisionibus exciperetur, aut diris impeteretur, aut laceraretur ut falsum, ab iis, qui nil supra antiquorum inventa reperiri posse arbitrantur. Fluctuabat magis animus, cum
se-

DEDICATORIA.

*secum ipse tacitus reputabat , eam , si prodiret ,
elucubrationem , illius Principis pedibus advol-
vendam , qui Patronus non minus , quàm castiga-
tor & judex esse poterat. Tuas , Serenissime
Princeps meditabatur prærogativas , tuarumque
virtutum præstantiam pensitabat. Mirabatur
grandes illos , & tantæ doctrinæ Majores Tuos ,
qui uberrimo Scientiarum fonte affluentes liberali
Sapientiæ patrimonio te condecorant. Quale jam
virtutum genus hæreditario jure non obtines ? Phi-
losophiæ Studium , rerum naturalium Amor , ve-
ritatis desiderium quàm in Serenissimis Atavis
Tuis effulserint quis ignorat ? Testes appello Sa-
pientes illos , qui à Constantinopolitani Imperii
miseriis profugi in magni illius Cosmi sinum , quasi
in Asylum , convolarunt. Quis Platoniam Phi-
losophiam , Ficini operâ illustratam , traduxit ad
Posteros , nisi Laurentius Medices , Cosmi Ne-
pos ? Quis Vaticanam Bibliothecam ditavit ?
Quis Romæ construxit Athenæum , nisi Lauren-
tii Filius Leo Pont. Max. ? Quis Pisenum Ly-
ceum reparavit ? Quis Florentinam Academiam
erexit , nisi semper infra dignitatem laudandus
Cosmus ille Primus Magnus Etruriæ Dux ?
Quis satis pro merito Ferdinandum Primum e-
loquatur ? Dicant illum Bibliothecæ , tot tantis-
que*

DEDICATORIA.

que Manuscriptis Codicibus undequaque collectis illustratæ: dicant tot eruditissimi Viri effusa liberalitate cumulati; dicant tot Illustrium Auctorum volumina sub tanti Principis nomine evulgata. Dies deficeret, si vel minimum Cosmum II. attenderem, ipsius laudum summa dixisse sit, tanti hujus Principis nomen ab erudito Galilæo insculptum Cælo cum ipsis syderibus duraturum. Ferdinandum II. quem veneraris Patrem, deprædicat terrarum orbis universus; ipse enim, tantorum dignissimus Atavorum Nepos, quid intentatum relinquit, ut veritas quot jam seculis inquisita? Nunquam inventa eruatur? Quid igitur in Te Serenissime Cosme desiderandum? Habes innatam Scientiam, & quasi per traducem propagatam Sapientiam. Quantò majorem spem tua isthæc excelsa indoles excitat, qua assiduo Scientiarum studio, & inseparabili virtutum amore bonas omnes artes amplecteris! Quid hîc proinde memorem Pietatem, Religionem, Majorum cultum, morum Politiam, amabilitatem, facilitatem? Dotes istæ sunt, quæ bonum, & quales debent esse Principes, decent. Ea verò quæ te decorant ornamenta virtutum, ubi reperias? Ille Matheſeos amor, Philosophiæ Studium, Rerum naturalium curiositas, Sapientium congressus, &
ut

DEDICATORIA.

ut verbo complectar omnia, Veritatis ardentissimum desiderium uno Te, Cosme Princeps, gloriatur; Quale enim magis accommodatum indagandæ veritatis instrumentum est, quàm Anatomicis artibus delectari? Eas verò quàm excolis! quàm iis caperis! mirabile prorsus dictu! Principem juvenem iis oblectari, quæ aspectu horrida, odoratu gravia, sensibus omnibus injucunda, arcenda potius, quàm aulis excipienda, putaret aliquis. Sed optimè quidem animadvertisti perspicacioris ingenii Princeps, limoso Oceani in alveo jacere Margaritas, nec nisi obscuris abrupti montis antris Aurum includi. Hæc mecum ipse cogitans, mei tenuitatem ingenii pensitabam, nullisque me virtutum, nullis Scientiarum honestamentis instructum deplorans, anceps hærebam, & pavidus tuisque Dignissime Princeps, pedibus advolvi hanc exercitationem dicaturus verebar. Tunc verò venit in mentem probatissimus ille ritus apud Magnates, quo pretiosarum rerum obscuros licet, nulliusque nominis inventores, non aspernari, sed humana, benigna, amica fronte solent suscipere. Sic nunquam à principe mensa rustica manus ejicitur, quæ fructum defert hyberno tempore maturatum: nunquam Principis alloquio prohibetur Fossor, cui vel Toreuma aliquod, vel

* *

man-

DEDICATORIA.

manum Jovis Simulacrum lignum intercepit. His ego excitatus exemplis tuo Serenissimo Nomine lucubrationem hanc insignire sum ausus; licet enim illa rudi ab Auctore proveniat, quid tamen pretiosius unquam afferri poterat, quam Naturæ opus omnibus hætenus invisum, & mihi obscuro licet & imperito exinopinatò compertum? Excipe igitur, humiliter obsecro, pacato Princeps Serenissime vultu, hoc opus exiguum; & si illud abjectum nimis, nec tanto Principi accommodatum est, animum saltem obsequentem non aspernare, qui ea molitur, & optat, quæ me tantæ Patriæ, uberrimi scilicet scientiarum fontis, & fecundissimæ sapientum, Parentis Filium non degenerem, tantoque Principe Musarum omnium, & Virtutum cultore non indignum subditum possunt efficere. Tibi, Serenissime Cosme, Principum Regnator Deus eam largiatur, quam tuarum virtutum series promeretur, felicitatem.




Fig. 2.



Fig. 4.



Fig. 5.




Fig. 7.



Fig. 6.




Fig. 8.



Fig. 9.




Fig. 10.



Fig. 11.



Fig. 12.



Fig. 13.



Fig. 13.

Fig. 15.




Fig. 14.





Fig. 16.



LAURENTII BELLINI

FLORENTINI

EXERCITATIO ANATOMICA

D E

STRUCTURA
ET USU RENUM.

ÆC, quam de *Renibus* exercitatio-
nem habes, *humanissime Lector*, non
ut inanem fugitivi nominis auram
aucupetur, prodit in lucem, sed ut,
quod juveni mihi, & tale nihil co-
gitanti, fortuna protulit aliquando,
maturo sapientum judicio subjicia-
tur. Illud si veræ & naturali Renum fabricæ con-
sentaneum reperiēs, tuum nobis assensum non dene-
gabis opinor, non quod grandiore animus adole-
scens ipse, sed veritas una devincat, quam si mihi
reperisse contigit, non opus ingenii fuit, sed juve-
nibus favorabilis fortunæ. Sic itaque se res habet.

Cum Serenissimus *Ferdinandus Secundus* Princeps
ad exemplum Principum natus, quem ad omnem
bonarum artium culturam, & stabilimentum Deus
Hetruriæ præfecit, uberrimam animalium copiam fa-
ceret *Clarissimo Eruditissimoque viro, Domino Joani* *
Alphonso Borello, Pisis Matheseos Professore Ce-
leberrimo, nostroque amantissimo Præceptori, ut

Musculorum motus scrutaretur, aderam ipse continuus dissectionum adjutor. Cervam secabamus, cum, exemptis visceribus, genio tantum impulsus, Renibus præparandis incubui, diversamque ab Anatomicis præparationem aggrediens, parenchyma illorum abrafi: quod cum admodum feliciter evenisset, objecta nobis sunt quædam vasorum capillamenta ad extimam usque Renis superficiem excurrentia.

Hoc cum novum esset, attentius deinde & diligentius Renem inquirens, ipsius fabricam, quam mox audies, offendi. Illam, quoniam eruditus Viris digna luce visa est, tibi, *Studiose Lector*, exponimus: & ne rem omnino contemnas, & ut an illa veritati consonet mediteris attentius, recensemus primo Anatomicorum opiniones, easque secundo perpendimus, ut nostra extremo loco posita sententia magis confirmetur.

Ut igitur ad rem propius accedamus, omissis tum Renum connexionibus, tum membranis, tum omnibus iis, quæ ad extimam Renum conformationem pertinent, solum de interna illorum fabrica & usu differemus.

Nullum esse usum Renum *Erasistratus* cum *Asclepiadis* sectatoribus existimarunt: quod quidem quam absurdum sit, quam a veritate remotum, quam a Natura alienum, aperte noscit, quicumque meditatur, quanta industria, quantaque sapientia, res naturales scientissimus Artifex operetur.

Libet proinde nunc (prætermisiss hisce parum probatis Viris, qui genio suo Naturam effingentes, iis illam subjacere putant erroribus, quos admittit non raro humanæ mentis imbecillitas,) *Aristotelis* sententiam

tiam perscrutari. Longam ille externarum Renis partium descriptionem, *cap. ix. lib. iiii. de partibus animalium*, instituit, cui paucissima quidem, & fere nulla de interna ipsorum conformatione commiscet. Habet enim tantum cavitatem quandam inesse Renibus, quam meatus qui a vena pertendit, non subeat, sed in eorum corpus absumatur. Habet insuper ex dicta cavitate prodire duos insignes exsanguis meatus in vesicam desinentes. Usus vero talis visceris esse affirmat, qualis cæterorum omnium est viscerum; nimirum esse venarum per corpus diductarum ancoram, qua illæ in posteriori parte contineantur, & affigantur. En, *capite septimo*, ipsius *Aristotelis* verba, *Sunt viscerum quædam supra septum, quædam infra, sed omnium usus communis venarum gratia est, videlicet quo venæ, utpote pensiles, sustineri, & copula viscerum stabiliri ad corpus possint; quasi enim ancoræ per partes deductas jaciuntur ad corpus. Verbi gratia, de vena majore ad jecur, & lienem devenitur, etenim viscerum eorum natura quasi clavus corpori eam affigit, scilicet jecur, & lien, in latera corporis venam majorem affirmant; ad hæc enim sola rami ab illa mittuntur. Renes autem in partem posteriorem eandem continent, &c.*

Nec minus obscurus & brevis fuit *Galenus* in Renum structura explananda, licet usum aliquanto verius expresserit. Ait enim, ut ex *libro v. de Usu Partium capite vi. & vii.* deduci potest, *venas, & arterias per Renis corpus diffundi, & a spissa duraque Renum substantia attractum sanguinem, ipsorum vi ab urina segregari, illamque per Ureteres in vesicam demitti.*

Hanc sententiam, utpote admodum obscuram, clarius exponere voluerunt quidam *Galen*i Sectatores, qui *Vesali*j tempore, ut ipse affirmat, *libro v. capite x.* cribrum quoddam imaginati, Renum fabricam talem esse putarunt, qualem non Natura, sed mens propria confingeret.

Hinc vulgata omnium erat opinio, secundum Renis longitudinem duas cavitates inveniri, superiorem scilicet unam, alteram inferiorem: has transversa quadam membrana distingui, angustissimis foraminulis, & sensum fugientibus perforata. Asserebant deinde, oscula Emulgentium Vasorum in superiorem sinum aperiri, sanguinemque ibi effundi, qui ob sui crassitiam membranæ porulos non penetrans, a sero, ut subtiliori, & illa foramina pervadente, fecerneretur. Aiebant insuper, ab inferiori sinu ductum quendam oriri, in Vesica desinentem, & per hunc a superiori sinu serum, per transversam membranam percolatum, in Vesicam descendere.

Talia Medicorum somnia ridet *Vesalius*, eaque ut etiam impugnet propriam de Renibus sententiam adjungit. Inquit itaque, *ibid.* *Renum substantiam carneam, duram, densam, & solidam esse, eoque solum a substantia cordis discrepare, quod nullis omnino fibris intexitur, cum nempe diffusorum per Renes vasorum fibræ ad attractionem, retentionem, & expulsionem pulchre famulentur.*

Vasorum deinde Renem permeantium tractationem fuscipiens; *Vena*, inquit, & *Arteria Renem subeuntes in unum degenerant corpus, quod, arteriarum tunicis duritie, crassitieque respondens per Renis corpus distributum cernitur. Primum enim paulatim latescens*

in duos ramos, anteriorem scilicet & posteriorem, dividitur, qui secundum Renis formam per anteriorem, posterioremque partem protensi, modo in sex; modo in plures surculos divisi, versus Renis latera exteriora feruntur, non quidem ad extimam usque superficiem, sed interius multo in Renis corpore permanent.

Hæc vero vasa invicem conjunguntur, anteriora nempe cum posterioribus, ac si unum idemque corpus essent & mutuam cavitatem constituunt, elegansque iste ramorum coitus instar semicirculi ad exterioris scilicet Renum lateris formam perficitur.

Et tandem post longam Vasorum, & sinuum descriptionem talia de usu Renum subjungit. Hæc mehercule Renum est conformatio, quæ in membraneum illud corpus, ipsiusque Ramos serosum sanguinem Renum substantiæ vi, & Fibrarum ejus corporis rectarum beneficio attrahi commonstrat, ut sanguis seroso illo humore ita liberetur. Quod etiam paulo ante iis verbis insinuaverat: Renum substantia facultate sibi innata, ac propria ad justitiam temperie, formaque essentiali, ex Venis ac Arteriis per ipsius corpus diductis serosum illud recrementum excolat, ac in sinum, qui urinario meatu excipitur, diffundit.

His subdicere possemus Valverdi opinionem, quia tamen illa nihil discrepat a Vesalii dictis, nisi quod brevius explicatur, pluribus illam prosequi non juvat. Placet id potius attexere, quod habet Fallopius in Renum tractatione. Conjicit ille fibrosum esse Renum corpus, eo quod Meatus quosdam a circumferentia ad sinum medium per omnem Renum carnem protensos se observasse affirmet; quod licet omnibus patere dicat, adeo tamen ab Anatomicorum oculis remo-

remotum fuit, ut rem uni visam *Faloppio* distinguere non potuerint. Sed de hoc fusius inferius, cum ejus Sententiam ad examen revocabimus.

Pergamus nunc ejus opinionem evolvere. Afferit nervulos una cum Arteriis, & Venis per Renum substantiam, ac corpus disseminari usque ad extremum, & hoc cujuscumque oculis subjici. Sinum membraneum, Pelvim nempe, in octo aut decem fistulas, quasi digitos perforatos haberet, dividi defendit, singularumque extremis operculum carneum, verrucæ instar, acutum imponi, quod lotii stillicidium constituit. Concludit tandem, a Venis, ac Arteriis transfundi omnem aquosum sanguinem ad Renes, quem similitudine substantiæ serum consequatur, quod per dicta opercula effunditur in Fistulas pelvis, unde per Ureteres in Vesicam. Sanguis vero retinetur pro nutritione, qui multus esse debuit, quia parum ob subtilitatem alit. Hanc deinde humani Renis veram esse constitutionem affirmat, caprini autem vel canini non item.

Hæc sententia licet adeò subjecta sensibus prædicetur, adeo tamen confusè, obscureque declaratur, ut nullos omnino habeat assertores, nisi quoad pelvis Surculos, qui papillam quandam excipiant, per quam serum excoletur.

Et quidem *Andreas Laurentius* (ut in capite XXIII. libro VI. de *Organis Naturalibus* in imo ventre contentis, & capite I. libro II. de *Carn. Visc.* videre est) solum convenit cum *Faloppio* pelvim in plures Fistulas dividi, in medio perforatas, singularumque extremitati, quæ lata magis est, carunculæ capillari canalicula perviæ extremo imponi, unde serum excolatum

tum per easdem Fistulas in Vesicam descendat. Cæterum nihil differt à *Vesalio* quoad Renis substantiam, ait enim nullis eam fibris intexi, solidam, duram, densam esse, similemque cordi. Ab illo tamen discrepat in vasorum progressu, neque enim ipforum Anastomofin, neque semicircularem Figuram quam constituunt, neque Cavitatem, quam formant per *Vesalium*, describit. Insuper ramos Emulgentium in capillares abire ad gibbum usque contendit, frequentioresque ramulos ad papillas excurrere, ut ibi serum deponant.

Laurentii sententiam sequitur ex toto *Veslingius*, capite v. *Syntagmatis Anatomici*, additque succum in renalibus Glandulis contentum, quem *Atram bilem* appellat, seri a sanguine separationem instar coaguli promovere, ipsasque glandulas tractum serosæ humiditatis adjuvare.

Proximus jam accedit Clarissimus *Thomas Bartholinus*, capite xvii. libri i. *Anatomie Reformatæ*, qui à *Laurentio*, & *Veslingio* parum diversus apparet; solum enim fibras aliquas in Renibus videtur admittere, cum asserat *Renum substantiam compactam, & densam ferè ut cor esse, non tamen ita fibrosam*. Inquit etiam ramos capillares Emulgentium per totam substantiam diffundi, & in papillarum capitibus obliterari.

Etiam manifestum est, nullum ex Illustrioribus Anatomicis inhæsisse *Faloppio*; quin eruditissimus *Higminus* aliam dissecandi Renis methodum fuscipiens *Faloppianos* in primis tubulos, totamque illius de Renibus opinionem impugnat, & veram invisamque omnibus Renum substantiam se reperisse lætatur. Duplicem ille cap. iv. part. iii. lib. i. *Disq. Anat. in Renum*

num corpore substantiam cognoscit, superiorem scilicet unam, seu externam, quam absque fibris, similemque Epatis parenchymati esse contendit, inferiorem alteram, seu internam, fibrosam, cujus fibræ ad pelvim spectent, & in qua Arteriæ, & Venæ terminentur, nec ferantur ulterius. De progressu autem, & constitutione Vasorum hæc habet. *Venæ, & Arteriæ Emulgentes ad Renis portam dividuntur, alterque illarum Ramus ad anteriorem, alter ad posteriorem Renis partem fertur, inter Pelvis tunicas, ibique in plures ambo surculos divisi emergunt versus anteriorem Cavitatis partem, gibbum scilicet Renis spectantem, & Tunicam à Pelvis membranis mutuantes, divisi, & patentes, in plures se expandunt surculos, versusque gibbam Renis partem properant, & in plurimas graciliores Propagines distincti per Anastomosis conjunguntur, Arteriæ scilicet anteriores cum Venis posterioribus, & posteriores Arteriæ cum Venis anterioribus. In progressu etiam tam varie commiscuntur, ut speciem optimè referant, cum à carne denudantur, Apum loculamentorum, foraminulis plurimis perviorum. Hi surculi, versus gibbam Renis partem coeuntes, tam exquisitè uniuntur, ac si unum essent corpus, & Cavitatem arcuatam, Renis formam exteriorem exquisitè exprimentem, inter se conficiunt.*

Quomodo verò Urina à sanguine separetur, sic exprimit. Serum per *Arterias Emulgentes minutissimas in singulas substantiæ Renum partes cum aliqua sanguinis portione diffunditur, quod ab ipsorum parenchymate percolatum, servato sanguine pro nutritione, in Pelvim stillat. Et quia talis sanguinis portio major est, quàm nutritio Renum exposcit, sanguis superfluous*

Flus emittitur ab Arteriis in Venas Emulgentes, quibus illæ per Anastomofin junguntur.

Hæc ufque adhuc, quod fciam, de Renum constitutione fcripta funt ab Illuftrioribus Anatomicis, videndum jam quomodo illa cum veritate conveniant, ut expenfis aliorum fententiis novæ magis obfervationis inventum comprobetur.

Et primò quod ad *Ariftotelem* attinet, ipfius de Vifceribus opinionem pluribus impugnare non placet; magnum enim, & fatis apertum ejus ambiguitatis argumentum eft, nullos in hac re Viro cæteroqui Clariffimo inhæfiffe. Quin immo nec fibimet placuiffe videtur *Ariftoteles* in ufu Renum explicando, aliàs namque, *capite VII. libri III. de partibus animalium* ab ipsis in pofteriori parte venam contineri affirmavit; aliàs *ibid. capite IX.* nulla neceffitate haberi Renes afferuit; aliàs ad fupervacuum humorem excernendum iis abuti naturam exiftimavit. Unde ancipitem ipfum hæfiffe in re ardua, & parum nota deduci poteft. Huic proinde Peripateticorum maximo condonandum, nimirum non adhuc eo ufque pervenerat Anatomia, ut ea etiam aperiret, quæ nec fenfibus, nec ipfi intellectui objici unquam potuiffent. Illa tunc prodibat in lucem, & adhuc in fuæ nativitatis exordiis balbutiebat: jam verò ferit fublimi fydera vertice, ætateque, & fcientia confiftens fuæ juventutis errores infequitur, ut abditam, & propriæ adolefcentiæ malignitate compreffam veritatem aperiens, ab omni parte beata traducatur ad pofteros. Ne verò ab *Ariftotele* digrediamur; internam Renum constitutionem optime quidem, quia breviter, ille descripfit, cum nempe Univerfales tantum voces tam de Sinubus quam de Vafis adhibuerit.

Transeamus proinde ab hoc Philosophantium Principe ad Medicorum Patrem *Galenum*, qui, quoniam & ipse accuratam magis Renum structuram vel non curavit, vel sui vitio temporis adhuc abditam non agnovit, paucis verbis, & iis etiam obscuris nobilissimum viscus circumscripsit. Ille tamen fuit *Aristotele* fortunatior, cum enim isthæc opinio non satis comprehenderetur, varios invenit interpretes, qui menti propriæ Naturam, & *Galenum* accomodantes *Cribrum* illud adinvenerunt, quod *Benedictum* appellant, nunquam in Renibus inveniendum. Et quoniam, ut hoc *Vesalius* evertat, testes solum sensus producit, & autopsiâ, quid jam ipse magis veritati consonum pronunciaverit, inquirendum.

Falsum igitur est Renum substantiam fibrosam non esse, ut *Vesalius* asserit; insunt enim Renibus Filamenta quædam fibris simillima (*fig. 1. EE. & fig. x. AB*) non tamen musculosa, & carnosa, quarum examen accuratius habebis inferius. Nec Vasa Renum subingressa in unum corpus degenerant, quod Arteriis duritie, crassitieque respondeat; sunt namque Tunicæ illius corporis à Pelvis membranis mutuatæ (*fig. 11. CCC.*) ut optimè notavit *Higmoreus*, & nos exponemus. Constat etiam ad sensum Emulgentes ramos non interius multo in Renum corpore terminari; divisi enim in capillamenta, ad extimam usque superficiem excurrunt (*fig. xi. DD.*) Nec placet serosum sanguinem Renum vi, rectarumque fibrarum beneficio, attrahi, cum ultrò sanguis à corde in Arterias immissus celerrimè irrumpat in Renes: quod etiam in cæteros attractionem defendentes dici potest. Hic interim quædam *Vesalii* verba præterire non licet, quæ

quæ in eodem capite sibi adversari videntur.

Ait ille, ut usum Renum explicet. *Hæc meherculè Renum est conformatio, quæ in membraneum illud corpus, ipsiusque ramos serosum sanguinem Renum substantiæ vi, & fibrarum ejus corporis rectarum beneficio attrahi commonstrat, ut sanguis seroso illo humore ita liberetur.* Afferuerat ante Renem nullis omnino fibris intexi, nunc verò serosum sanguinem Renum substantiæ vi, & fibrarum ejus corporis rectarum beneficio attrahi defendit. Quod si dicat aliquis verba *ejus corporis* referri ad membraneum corpus, de quo loquebatur, non video quomodo cum iis ista conveniant, quæ paulò ante exposuerat, *Renum nempe substantiam facultate sibi innata, ac propria ad justitiam temperie, formaque essentiali ex Venis, ac Arterijs per ipsius corpus diductis serosum illud recrementum excolare in sinum* (qui idem cum corpore membraneo est) *qui urinario meatu excipitur.*

Sed ne his diutius immoremur, licet ad *Faloppium* accedere, qui, quoniam præceptoris sui *Vesaliy* deplorat errorem, eò quod brutorum Renes ipsi imposuerint, quid in humano adeò à cæteris discrepante cognoverit, diligentius inquirendum. Et primò quod celeberrimus ille Vir Renis corpus fibrosum esse deducat ex rectis meatibus ibidem observatis admirari satis non possum. Quid enim? Unquamne eos canales, easque Cavitates in fibris capillo subtilioribus aspicias, quæ omnium, ut ipse ait, oculis patent, nec tamen fibras ipsas intueberis? Opus ibi erit ratio-cinio, ubi sensus evidentia rem manifestè confirmat? *Positis*, inquit ille, *meatibus in Renum corpore, necessario etiam sequitur ipsum esse fibrosum.* Egregium

enimverò argumentum ! Quod occasionem præbuit Anatomicis & hanc sententiam irridendi, Renesque accuratius perscrutantes nova inveniendi. Falsum nimirum est oculis apertè subjici Canales illos, nec nisi auxiliante perspicillo conspici solùm possunt. Quod si eos inspexit *Faloppius*, cur & modum *Petro* suo non designavit, quo ipsos licet observare, quemadmodum illum admonitum voluit de Methodo, quam ut Pelvim, & Papillas inveniret servare oportebat?

Non secus *Riolanus Baubinum* irridet, nam cùm in pag. LXXXVI. *Sui Theatri Anatomici* asseruerit, conspici in Carunculis Renum secundùm longitudinem dissectis Sulcos, & Canaliculos tenuissimis pilis similes insculptos; non videt ille, quomodo ea foramina, & fibræ conspici possint, quæ capillo subtiliores ab ipso *Baubino* prædicantur; non solùm enim illæ oculis non subjiciuntur, verùm etiam admoto perspicillo non distinguuntur: quod tamen *Riolanus* ignoravit, cùm dixerit, id fortè potuisse *Baubino* contingere, si conspicillis usus esset.

Ad *Faloppium* ut redeam; Nervulos per substantiam Renis ad extremum usque deferri cum Arteriis nullus observavit, quin immo Anatomicorum plerique ipsos in Renum tunicis obliterari consentiunt. Fiderem ego *Faloppio*, sed quoniam cujusnam generis fibræ Renum sint, licet appareant, non agnovit, quanto potiori jure dubitandum erit nervulos tantò minus fibris conspicuos nulli visos hætenus inspexisse?

Quod verò addit Venas, & Arterias per totam Renum substantiam disseminari ad extremum usque, & id cujuscumque oculis subjici, equidem non visum, sed

sed conjecturis tantum, quasi subodoratum opinor; esto enim viderit ille majores, & satis conspicuas Vasorum per fibrosam carnem circuitiones, at minores usque ad extimam superficiem propagines quonam modo conspiciere potuit, cum extremitates illæ, & capillamenta nunquam in homine (de quo Auctor loquitur) videantur; tanta namque, ait *Faloppius*, illorum est tenuitas, ut aptissima sint ad lacerationem, unde vasa non tam facile sensum ferunt, nec ab Anatomicis animadvertuntur. Sed hic obiter, quomodo Vasorum ad extremum usque Renis progressum videri posse asserit, cum tamen hic ob sui tenuitatem, & lacerationem non tam facile ferire sensum affirmet? Quomodo ipse tales productiones intuetur; quæ lacerantur, & latent? Illas procul dubio non vidit *Faloppius*, cum enim verissimum sit illa vasa in humano Rene nec à fibrosa carne separari posse, nec conspici, sed lacerari, non nisi artificiosè distingui possunt; opus proinde est coloratum aliquem humorem in Emulgentes immittere, ut inferius dicemus.

Quod si istæ vasorum productiones apparentes sunt, quomodo, omissis cæteris, potuit oculatissimus *Hig-morus* ita hallucinari, ut non modò illas non viderit, verum etiam non reperiri tam in homine, quàm in brutis affirmaverit? Quod autem de papillis in humano Rene conspicuis, & Ureteris divisione subjungit, verum quidem est Ureteres in plures distingui tubulos, ex quibus quædam papillæ portio conspici-tur, non tamen mamillæ separatae, & distinctæ reperiuntur, ut inferius patebit.

Ex quibus omnibus clarè colligere possumus, parùm Renum structuram fuisse *Faloppio* compertam, & si

quid vero propius enūciavit, id vel ex dubia aliqua cognitione, vel conjectura asseruisse; quod etiam adeo obscure explicavit, ut non modò Sectatores non habuerit, verum magni nominis Anatomicos impugnatores; *Higmorus* enim postquam suam de Renibus observationem exposuit, *Faloppianam* tantum opinionem insequitur.

Quia verò *Laurentius*, licet *Vesalio* quoad Renis substantiam assentiatur, convenit in aliquibus cum *Faloppio*, quid adjiciat à veritate alienum pervidendum. Non igitur verus est in Vasorum per Renes progressu describendo; cum enim asserat frequentiores ramorum fibras capillorum instar ad papillares carunculas excurrere, ipsosque Ramos per Renis substantiam variè divaricari, & ad gibbam usque pertinere, id cogitasse potius, quàm vidisse credendum est; credas enim tu illum interfuisse *Romæ*, qui percontanti tibi quid in Urbe viderit, nonnulla quidem veritati consona responderet, sed assereret quoque insignem scopulum mari undique circumfusus in *Aventini* vertice reperiri? Cùm ergò per *Laurentium* vasa ad gibbum usque Renis progrediantur, quia tamen addit plurimas eorum propagines ad Carunculas excurrere, quod nunquam ostendet, cùm nullæ, vel illæ solùm, quæ ad ipsarum nutritionem facere possunt, ibi inveniantur, cur talem Renum fabricam ab ipso non visam, sed tantum in imaginatione fictam affirmare non liceat, cùm non sincera sit, & simplex, sed commentis plurimis misceatur?

Laurentii Sententia uno dempto *Higmore* placuit Anatomicis omnibus; solùm enim ab ipsis aliquid adjungitur, vel immutatur. Sic Coagulum pro feri separa-

paratione in Renalibus glandulis asservari addidit *Veslingius*, & *Bartholinus* Emulgentes per totam Renum substantiam spargi, & in papillarum capitibus obliterari.

Libet hic parumper subsistere ad hujus coaguli contemplationem; licet enim alii id diligentius expendunt, abs re fortasse non erit si aliquid & nos brevissime conabimur. Dâri atram bilem in Renalibus glandulis *Veslingius* supponit, per quas tamen illa vias eò perducatur, ipse non monstrat. At esto atræ bilis portio in iis capsulis asservetur, quo nam modo separationem feri à sanguine promovere potest? Vel enim è glandulis effunditur, vel in earum cavitate retinetur. Si è glandulis prodit, vel Renes subit, vel aliò divertit: Si non prodit, vel Renes non permeat, nosse velim virtutem hanc talis humoris, qui in iis capsulis inclusus, vel per corpus dispersus potest tamen in Renum substantia, in qua non est, operari. Si è glandulis effluit in Renes, quomodo hîc fiat transitus cognoscere necessum est, quod arduum sanè, & difficillimum existimo. Quid enim? Nonnè per arteriolam ab Emulgente procedentem in Atrabilarias capsulas sanguis inducitur? Hic rursus an non per venulam in emulgente desinentem dimittitur? Vena autem emulgens non defert ad Renes, sed refert ab ipsis in Cavam, & Arteria ab Aorta defert in Renes. Unde patet, nullam ab atrabilariis capsulis viam ducere in tale viscus; hinc nullum in ipsis asservari posse coagulum, quod feri à sanguine separationem promoveat, fateri cogimur.

Pluribus opus non est in *Bartholino*, cùm quæ dicta sunt de *Faloppio*, & *Laurentio*, in hujus erudi-

ditissimi viri Sententiam traduci possint.

Veniamus proinde ad *Higmorum*. Et primò quidem, duplicem esse Renum substantiam, falsum omnino esse, conspicitur, quarum externa fibrosa non sit, interna fibras habeat; est enim una Renis substantia, à pelvi usque ad extimam superficiem continua, & undequaque fibrosa (*fig. x. AB.*) Insuper illi assentiri non possumus, cùm vasa in interiori substantia terminari defendit, cùm pateat sensibus, illa ad extremum usque Renis excurrere (*fig. xi. D.*) Anastomoses quas ille inter venas & arterias admittit, nunquam invenies.

Quomodo Serum ab Arteriis effluat, obscurè exponit, cum enim *Anastomoses* inter venas & arterias tueatur, quo pacto fiat feri à sanguine separatio, non percipitur. Quin immò nec illam fieri posse credendum est, quoniam *Anastomoses* Natura semper abhorret, ubi similis humorum disgregatio perficitur. Quòd si ulla *Anastomosis* admitti debet, illa non inter venas & arterias, sed inter arterias solùm, vel solùm venas contingit. Sic frequentissimas reperiri in Mesenterio occulatissimus *Malpighius* observavit, & nos in marinæ Testudinis intestinis copiosiores aspeximus.

Quid tamen ea de re sentiat *Higmorus*, ab explicatione *fig. i. tab. viii. part. iii. lib. i.* deduci potest; inquit enim ibi: *Vasa Renum in tenuissimos surculos divisa, & inter se connexa, à carne denudata, prædictâ membranâ ambo inclusa, venæ scilicet, & arteriæ. Vacua inter illa ostenduntur spatia, quibus serum à vasis per exsudationem exclusum in pelvi per illorum parenchyma, quod spatia illa inania replet, percolatur. Hoc autem quomodo fieri poterit, cùm evidenter appa-*

pareat, humores per arteriam, & venam Emulgentem immissos usque ad superficiem Renis excurrere (*fig. vi. CCC.*) ut fusius exponemus.

Et ad summum, quòd aliqua feri pars per illa vasa separetur concedi potest, non quidem per exsudationem, sed per capillares ramulos, qui inibi reperiuntur. Et hæc ad aliorum Sententias spectare videbantur. Superest modò, ut quid fortè fortuna in proprias manus inciderit, explicemus.

Habent Renes (ut cuique notum est, præter Lymphæ ductus, quorum progressum, & ordinem accuratior manus ostendet aliquando, & de quibus hic agere non est opus,) Arteriam & Venam Emulgentem à truncis Aortæ, & Cavæ descendentibus, & Ductus, seu canales proprios, à quibus substantia Renum efformatur, quam fibrosam Renum carnem imposterum appellabo.

Arteria, statim ac ad Renis portam devenit, dividitur in plures furculos, qui inter pelvis tunicas dispersi alios graciliores Ramulos (*fig. i. CC. & D.*) producunt. Hi à pelvis tunicis erumpentes per fibrosam carnem feruntur, & circulariter illius partes amplectentes, rotundam figuram (*fig. ii. CCC.*) æmulantur. Ab interna, & concava horum circulo-
rum parte prodeunt minores alii furculi (*fig. i. & ii. ooo.*) qui similem formam exprimentes fibrosæ carni arctè connectuntur.

Vena eodem modo divisa (*fig. i. BB. & NN.*) semper arteriæ adjacet, simulque à pelvi emergentes tunicâ quâdam involvuntur, (*fig. ii. CCC.*) ab ipsius membranis mutuata, quæ in toto vasorum progressu venam, & arteriam in eadem vagina componit. Huc

usque animadvertit etiam *Higmorus*, ut dictum est, eosque minores ramulos, à concava orbicularium parte erumpentes, apum loculamentis similes appellavit. Nos ulteriùs progredimur, & vasorum capillamenta disquirimus.

Ab externa igitur, & convexa horum circulorum parte tam Arteriæ, quàm Venæ capillares (*fig. xi. DDD.*) producuntur, quæ ad extimam usquè Renis superficiem excurrentes, undequaue fibrosæ carni miscentur. Hoc à nullis inventum esse jam patet, quin à *Vesalio* & *Higmore* expresse negatur; inquit enim ille. *Vasa non ad extimam usque superficiem ferri, sed interius multò in Renum corpore permanere*: Hic verò *interiorem substantiam à vasis non superari, transcendique* defendit. Has autem usque ad extremum productiones videre primò poteris, si diligenter & patienter fibrosam carnem amoveris, eo prorsus modo, quo parenchyma jecoris, aliorumque viscerum cultro abraditur; tunc enim in brutis capillares ramuli evidentissimè conspiciuntur.

Quòd si certissimum experimentum velis, immitte humorem aliquem coloratum, tam in venam, quàm in arteriam emulgentem, videbis illicò non solum tumere Renem; quod ait aliquando *Laurentius*, sed per ipsius superficiem ingestum liquorem exsudare (*fig. vi. ccc.*) si nempè propriam tunicam separaveris. Quin etiam si Renem secueris, filamenta quædam directa, eodem colore tincta, & fibrosæ carni intermixta ad superficiem usque pertingere videbis. Et si liberis oculis intueri non placeat, admotum perispicillum rem evidentissimè demonstrabit. Si verò Vasorum alveolos inspicere desideres, poteris eodem

mo-

modo fibrosam carnem abraderè ; tunc tamen res non adeò feliciter succedet ; plerique enim illorum propter arctam cum substantia connexionem lacerantur , & divelluntur. Felicius multò hoc assequeris , si , secto à cima parte per longum Rene usque ad Pelvis cavitatem , diligentioribus digitis pendentem fibrosam carnem (*fig. III. D.*) removeris ; tunc enim tam Vasorum majores circuli , quàm minores , seu Alveoli (*fig. II. CCC. & OOO.*) sese offerunt.

Ut verò ad *Renum substantiam* , quam huc usque affusionem vocarunt , veniamus : hæc habe. Renes ex substantia dura , solida , carnosâ , nullis fibris , vel saltem paucis intexta constare , communis est opinio. Res tamen aliter se habet ; nulla enim alia substantia Renum est , quàm infinitorum sui generis vasorum aggregatum. Secto per quamvis partem Rene satis apertè conspiciuntur fibræ quædam , seu filamenta , à superficie externa ad cavum usquè pelvis producta ; quod ut clarius aspicias , aliquam ipsorum tenuem particulam digitis separare poteris (*fig. x. AB.*) certoque certius apparebit , ab extima superficie usque ad pelvis cavitatem hæc fibras esse continuas.

Hinc facillimè licet deducere , cur duplicis esse substantiæ Renes asseruerit *Higmore* ; cùm enim Vasa circularia , & Alveoli , ut dictum est , substantiæ Renum connectantur , si ipsius partem aliquam nimis copiosam , & crassam separare velis , statim ac ad illa vasa perveneris , ulteriùs progredi non potes : hinc sequitur fibrarum laceratio & disruptio , remanentibus fibris externis , si à Pelvi separationem inchoaveris , internis verò si ab externa superficie.

Hæ Renales fibræ , quæ versus externam Renis

partem subrubro colore tingebantur, ubi Pelvim subi-
iere, albedinem induunt, & invicem contextæ, &
implicitæ (*fig. III. D. & fig. IV. CCC.*) desinunt in
cavitate Pelvis non in plures papillulas divisæ, sed
in unum corpus abeuntes (*fig. III. D. & fig. IV. CCC.*)
ne dum in ipsis brutis, verum etiam in homine (*fig.*
VIII. BBB.) quod quidem ab omnibus usque adhuc
prætermisum est; admittunt enim tot distinctas pa-
pillulas pisi magnitudine, verrucæ instar acutas, quot
sunt Pelvis fistulæ. Hoc tamen diverso modo se ha-
bet; ablata enim Pelvi tibi in conspectum veniet fi-
brofa Renis caro, non unum unitum corpus effor-
mans, ut in aliis pluribus animalibus, neque in plu-
res mamillulas distincta, ut plerique asserunt; sed in-
ordinato, tortuoso, & implicito ductu, (*fig. VIII.*
BBB.) Pelvim undequaque circumdans.

Et quia hujus corporis aliqua portio à Pelvis fistu-
lis aspicitur, hinc putarunt omnes cum *Faloppio*,
Renem humanum pluribus hisce Papillulis donari,
per quas tantummodò serum transcolaretur in Pelvim,
cùm tamen per universam mamillarem substantiam
(*fig. VIII. BBB.*) ab innumeris foraminulis (*ccc*) il-
lud effundatur, ut ejusdem papillaris corporis expres-
sione innotescit.

Hæc verò filamenta Musculum non esse, nec quid
illi simile, facile demonstratur, cùm nullis tendini-
bus, ligamentisque insigniantur, nullis inhæreant os-
sibus, quod ad constitutionem musculi requirunt ali-
qui: Musculorum fibræ humiditate, elixationeque
turgeant, & augeantur; fibræ autem Renum strin-
gantur, & minuantur: illæ firmiter secundum longi-
tudinem contextæ, & tractioni resistentes sint; istæ
fria-

friabiles, & molles, & cùm denique sensibus pateat, fibras hæc Musculos non esse, sed meatus, & canaliculos.

Si igitur hæc filamenta ab altero illarum extremo, Pelvim scilicet spectante, compresseris, inspexerisque, aquam uberrimè profilientem (*fig. 111. D. & IV. CCC.*) intueberis. Hanc si lingua persentire non reformides, falsedinem quandam, & in paucis urinæ saporem invenies. Hoc idem experiri poteris, si Renis corpus per transversum secueris; tunc enim etiam videre licebit à Renalibus ductibus, eo modo divis, eundem succum prodire, ejusdem planè qualitatis, ejusdemque naturæ. Disces hoc multo facilius, si oculo perspicillum admoveris; tunc enim compressis tubulis prodiens urina, quasi ex tot siphunculis effusa (*fig. v. CCC.*) apertissimè aspicitur.

Ex quibus evidenter inferre possumus, substantiam Renum, quam usque dum parenchyma nuncuparunt, nihil aliud esse, quàm (licet reclamet *Higmorus*) canaliculorum, & capillarium meatuum, per quos urina in Pelvim effluat, aggeriem; cùm enim manifestè constet, fibras illas à cavitate Pelvis usque ad extremam superficiem produci (*fig. x. AB.*) atque eas perforatas esse ex effluente lotio evidenter deducamus. Quid nobis certius ipsis sensibus esse potest, quo tales fibrillas veras esse fistulas & canaliculos, ferum in Pelvim effundentes, discamus?

Et hinc clarissimè patet quàm sit absolum, & à veritate remotum effatum illud, cui plerique assentiuntur, Renes carnosos esse, similes cordis vel hepatis parenchymati, nullis fibris intextos; neque enim in iis carnem reperiās, nullamque habent cum corde,

vel hepate convenientiam, fibrisque & canaliculis conflantur.

Et hæc, *Erudite Lector*, de Renibus habebam recensenda ab aliorum scriptis, sed non à veritate discrepantia: quæ si nova sunt, absit quod ineruditi juvenis ingenio hoc inventum, ne per somnium quidem imaginantis adscribas; solum hoc est fortunæ donum, cujus favore me primum hujus fabricæ repertorem esse, lætari possum.

Renum *Usus* adeò verè ex ipsorum constitutione etiam externa deduci potest, ut nemo sit unus (demptis *Erasistrato*, & *Asclepiade*, ut dictum est) qui ipsos serum à sanguine separare non asserat. Solum, quomodo ista segregatio conficiatur, dissentiunt. Propria vi Renum illam fieri dicit *Galenus*: in foraminum angustiam; serique subtilitatem illam refundunt *Benedicti Cribri* repertores, facultate Renibus innata, propria ad justitiam temperie, formaque essentiali illam perfici adstruit *Vesalius*: Sanguinis retentioni, serique expulsionem illam tribuit *Laurentius*: à portione atræ bilis in Renalibus glandulis contenta illam promoveri putat *Veslingius*, alique alia arbitrantur.

Quòd si propriam de hoc sententiam exposcas, non is ego sum, qui in re tam ardua, & difficili quicquam in medium afferre possim; neque enim tanti nostrum est ingeniolum, ut non evidenti, & tantum probabili opinione tot Anatomix patribus valeat adversari. Solum hîc referre libet, quid superius laudatus *Borellus* ex hac inventa Renum constitutione ad serum separandum deducat. Certum, inquit, est, sanguinem è sinistro cordis ventriculo tanto cum impetu

petu per universi corporis arterias effundi, ut usque ad minima, & tenuissima capillarium arteriolarum oscula perveniat.

Per truncum ergo descendentis Arteriæ fluens sanguis Emulgentem (*fig. 1. AA.*) irrumpit, ex qua Renes penetrans usque ad ipforum superficiem per subtilissimas arteriolas (*fig. xi. D.*) progreditur. Hic verò cum illarum oscula pateant, nec mutua cum venis Anastomosi jungantur (injecti enim per emulgentia vasa liquores, à capillaribus osculis exfluere in superficie Renis videntur (*fig. vi. ccc.*) amota propria tunica,) sanguinem extra vasa effluere necessum est in spatium, (*fig. vi. ccc.*) quod licet sensu percipi non possit, reperiri tamen & ratio persuadet, & perspicillum manifestè confirmat. Desinunt ad idem spatium tam capillares Venæ Emulgentes (*fig. xi. DD.*) quàm Renales ductus, (*fig. x. B.*) quos diximus; ambo enim hæc vasa ad extimam superficiem terminari, demonstratum est. Cum ergò sanguis extra arterias prodierit, duplicem vasorum ordinem offendit, Venalem scilicet unum, Renalem alterum. Serum itaque Renales ductus ingreditur à sanguine separatum, sanguisque venas subit à seroso humore sejunctus.

Hæc verò secretio non per attractionem, non per familiaritatem, non per sympathiam contingit, sed unâ, & solâ vasorum configuratione hoc expetente perficitur. Quæ omnia adeò evidenter confirmari possunt, ut nullus deinde futurus sit dubitationi locus. Quod igitur serum, & sanguis sua sponte sine ipforum attractione vasa percurrant, quis inficiabitur? habemus enim experimenta, quibus id fieri posse de-

demonstratur. Si namque, ut unum adducam, angustissima fistula vitrea, vel siphunculus, aquæ erectus, vel inclinatus infistat, continuo ascendentem aquam, licet ad attractionem confugere non possis, aspicias. Cum ergò ductus illi Renales (*fig. x. B.*) & Venulæ (*fig. xi. D.*) siphunculis quibuscumque subtiliores hient ad spatium (*fig. vi. ccc.*) in quod sanguis ab arteriis evomitur, cur humores sine attractione sponte sua in canaliculos illos induci non licet?

At, inquires, esto talis in vasa penetratio more siphunculorum sine attractione contingat, quomodo tamen sanguis in Venas, serum in Renales ductus immittitur? Hoc verò facillimo, & brevi negotio absolvi potest, cum ex diversa meatuum configuratione isthæc introductio proveniat. Neque enim sufficit, ut *Erasistratus* assererat apud *Galenum*, ad diversi humoris separationem, Vasorum ora esse variæ capacitatis, ita ut sanguis v. g. in Renibus ideo Renales ductus non subeat, sed Venas, quia ipsius minimæ particulæ ab angustis eorum meatuum osculis excipi non possint; nam plurimis experimentis comprobari posset, poros angustissimos à rebus subtilioribus non penetrari, licet ipsos crassiora pervadant: rursusque à poris satis patentibus, & laxis subtilia non admitti, quamvis minus tenuia introducantur. Sic quantæ sunt angustię Auri porositates? adeò illæ sensum effugiunt, ut prorsus non reperiri aliqui contenderint; & tamen Mercurius poros illos penetrat, quos non aqua, non aër, nec ulla Hydrargyro subtiliora possunt pervadere. Rursus quantæ sunt amplitudinis pori vesicarum, & pellium? Ab his tamen exsudat aqua, licet exitum aëri

aëri tenuiori nunquam concedant. Unde patet ad sensum, majorem vel minorem osculorum angustiam nihil omnino ad hujus, illiusve humoris penetrationem facere, nisi etiam partium, quæ introduci debent, figuræ accommodetur.

Cùm ergo Renales ductus, & Venæ ad spatiolum illud (*fig. vi. CCC.*) terminentur, ubi sanguis sero permixtus ab arteriis effluit, inveniaturque serum siphunculos illos Renales sibi proportionatos; itemque sanguis Venas sibi accommodatas obtineat, mirum non est, si uterque liquor in sua vasa deducitur, nulla attractione, vel familiaritate cogentibus. Quia tamen hæc in Renales, Venalesque meatus introductio expressioni ipsius feri in Pelvim, nec reductioni ipsius sanguinis in cavam sufficere poterat, (in Renum enim sectione constat, ex Renalibus ductibus nihil effluere, licet sero impleantur, nisi ipsos digitis constrinxeris,) natura consultum est, ut quemadmodum in foeminarum papillis contingit, quæ licet lacte turguant ad dolorem usque, non tamen illud effunditur, nisi constrictione, & compressione exprimatur; ita planè in Renibus licet ductus illi urinâ intumescerent, ipsa tamen sine expressione non efflueret. Hæc autem vis exprimens respirationis ope facillimè obtinetur; tumefactis enim pulmonibus, & thorace, à distento diaphragmate impellitur abdomen, ex cujus expressione à visceribus omnibus suppositos Renes comprimi necessum est, quorum compressione, & uberrimus sero fluxus in Pelvim, liberque sanguini regressus in Cavam conceditur.

Hæc sunt, quæ breviter quidem, & obscurè, nec satis pro ipsius inventi merito ex multis aliis, quæ

ex mente ejusdem doctissimi capituli recensenda essent, & quæ in ipsius de *Motu Musculorum* libro demonstrata leges, ipso annuente placuit aperire: quæ quam apte veritati consonent, & naturæ respondeant, discere ex jam dictis, dicendisque in eodem de *Motu Musculorum* libro longè meliùs addisces.

LAUS DEO.

FIGURARUM EXPLICATIO.

FIGURA I.

R En vervecinus à sima parte per longum sectus, & Pelvi denudatus, ut vasa videantur.

AA. Arteriæ Emulgentis rami majores.

BB. Venæ Emulgentis rami majores.

CC. Divisio Arteriæ in plures minores surculos.

D. Aliæ minores Arteriæ à dictis surculis procedentes.

EE. Extrema fibrosæ carnis filamenta ad superficiem Renis desinentia.

NN. Venæ Emulgentis ramuli.

OO. Vasa minora, quæ Apum loculamentis Higmoro comparantur.

FIG. II.

Ren Vervecinus à sima parte per longum sectus, à quo fibrosa caro ad Pelvim pendens separata est, ut rotundæ vasorum divaricationes appareant.

AA. Ren

AA. Ren per longum sectus.

BB. Pelvis discissa.

CC. Venæ , & Arteriæ Emulgentis ramuli tunica Pelvis involuti , & orbicularem figuram exprimentes.

OO. Vasorum minores circuli , seu alveoli , à majoribus procedentes.

FIG. III.

Ren vervecinus à sima parte per longum sectus , ut fibrosæ carnis unio ad Pelvim appareat.

AA. Ren per longum sectus.

BB. Pelvis divisa.

D. Fibrosæ carnis , seu Renalium ductuum unio , & textura in Pelvi.

FIG. IV.

Renalium ductuum extremitas , quæ papillare corpus ad Pelvim constituit.

A. Papilla Renis vervicini separata.

BB. Pars inferior adhærens Alveolis.

CC. Papillæ extremitas albicans , in qua omnes Renales ductus terminantur.

FIG. V.

Ejusdem papillaris corporis portio conspicio visa , & digitis expressa.

AA. Papillæ pars ut microscopio repræsentatur.

CCC. Guttulæ serosæ ab illa portione papillæ albicantis erumpentes.

FIG. VI.

Vervicini Renis superficies conspicio visa , postquam in Emulgentes injectus est humor coloratus.

AA. Renis superficies ut microscopio repræsentatur.

BB. Spatiola inania.

CCC. Sinuli quidam vermiculares & tortuosi dicta spatiola

tiola circumambientes, & in quos humor infusus errari cernitur.

FIG. VII.

Renis humani ab Uretere ad Pelvim usque per longum secti aspectus.

AAA. Ren dissectus, ut dictum est.

B. Ureteris dimidium ad dextram reflexum.

C. Alia Ureteris medietas ad sinistram inclinata.

D. Venæ Emulgentis ramus.

E. Arteriæ Emulgentis ramus.

F. Alter venæ Emulgentis ramus.

G. Pelvis aperta.

HH. Quædam papillaris corporis portiones à Pelvis tubulis conspicuæ.

I. Principium Ureteris.

FIG. VIII.

Humani Renis medietas Pelvi, vasisque plurimis liberata, ut unio, & coitus tortuosus Renalium ductuum repræsentetur.

AA. Extrema filamenta ad extimam superficiem desinentia.

BBB. Renalium ductuum coitus, qui papillare corpus tortuosum efformat.

CCC. Guttulæ seri à papillari corpore digitis expresso, effluentes.

FIG. IX.

Ejusdem papillæ portio separata.

AA. Fibrarum extremitates ad superficiem Renis protensæ.

BB. Albicans ejusdem papillæ pars, ex qua

CC. Guttulæ seri eliciuntur.

FIG. X.

Cervinæ papillæ albicans portio à Rene separata.

A. Cervinæ papillæ albicans pars, ex qua serum exprimitur.

B. Filamenta ejusdem à Pelvi ad usque Renis superficiem continua.

FIG. XI.

Vasa Cervini Renis à gibba parte per longum secti à fibrosa carne liberata.

AA. Pelvis.

BB. Ejusdem productiones, & processus, quibus emulgentia vasa vestiuntur.

C. Vasa Apum alveolos referentia.

DDD. Vasa capillaria ad extimam Renis superficiem excurrentia.



A P P E N D I X

A D

T R A C T A T U M

D E

R E N I B U S.



B singularem materiæ affinitatem, placuit, Tui in gratiam, *Lector curioso*, erudito magnæque æstimationis Tractatui de Naturali Renum partiumque ipsis inservientium constitutione à *Viro Excellentissimo Domino Laurentio Bellini, Florentino*, conscripto, publicumque in commodum typis edito, addere exemplum unum atque alterum Renis, ipsique conjunctarum atque in usu famulantium partium malè figuratarum, prout ea ab Authoribus fide dignis tradita legimus. Selegimus autem quæ præcipua judicavimus, considerationemque nostram magis aliis mereri visa. Imo Tractatus principalioris exiguitas additamenti magnitudini repugnabat, huic itaque me accommodare coactus. Quod etiam nulla alia adjuncta videas, licet magnus satis eorum numerus apud scriptores se exhibeat, quàm quæ figuris declarantur, Bibliopolæ curiositas effecit, præterquam quòd semper accepta maximè dictorum per ocularem inspectionem, aut illâ negatâ, figurarum additionem, explicatio & confirmatio.

Sunt

Sunt autem Authores, ex quibus hæc nostra desumpsimus. Dominus Casparus Bauhinus *Basiliensis*, Doctor, ejusque *Academiae Anatomiae & Botanices Professor ordinarius*. Dn. Leonhardus Botallus *Astensis*, Phil. & Med. Doctor, Christianissimi Regis CAROLI IX. Serenissimæ Reginae, & Invictissimi Ducis *Brabantiae*, Consiliarius & Medicus. Dominus Thomas Bartholinus *Hafniensis*, Med. Doct. & Professor Regius Honorarius *Facultatis Medicæ in Academia patria Decanus perpetuus*.

C L A R I S S I M U S

C A S P A R U S B A U H I N U S,

I N

THEATRO SUO ANATOMICO, HÆC TRIA
NOBIS EXHIBET.

I. FIGURAM Renis pueri, qui quarto post partum die in *Nosodochio Argentinenſi* Anno M. DC. II. mense Decembri, obiit, & à Doctore Joanne Rudolpho Saltzmanno apertus fuit, qui quidem fugebat, sed nihil per alvum aut vesicam ejiciebat: in quo intestina flatibus distenta, podice non pervio: Renes in octo partes lineis distinguebantur: ureteres sero distenti ad vesicam angustissimi, ita ut non nisi vi stylum parvum admitterent, muco referti feri transitum intercludente, sic in vesica non nisi mucus, non tamen copiosus repertus est.

EX-

E X P L I C A T I O

F I G U R Æ XII.

A. Renis corpus octo lobis constans.

B. Ureter sero distentus.

C. Vasa emulgentia.

D. Ureteris pars inferior præter solitum angusta.

II. Renum mirandam formam, qualem à Clarissimo Philosopho & Medico *D. Leonardo Doldio*, Noribergensis Reipublicæ Ordinario, accepit. Talis autem forma Renum & Ureterum reperta fuit in cadavere *Andreæ Helm Weissenfelsensis*, qui anno M. DC. II. XVII. Octobris, ætatis suæ anno decimo sexto Noribergæ mortuus est, posteaquam ex ictu in ventrem supra pubem accepto diuturno morbo laborasset: & post mortem apertus, talis Renum forma se exhibuit, & puris copia circa utrumque inguen tanta reperta, ut *mensuras duas Noribergenses* æquaret. *vide figuram XIII.*

III. Naturæ lusum in Vasis Emulgentibus, & Renis sinistri situ, prout in publicâ sectione ipsi occurrat.

E X P L I C A T I O

F I G U R Æ XIV.

a. Ren dexter.

b. — Sinister.

c. Substantia glandulosa & adiposa, quæ erat loco Renis sinistri.

d. Vena Cava.

e. Arteria magna.

f. Ve-

f. Vesica urinaria.

gg. Testes.

1. 2. Emulgens vena dextra gemina, quarum prima gemino est exortu.
3. Arteria Emulgens dextra.
4. Vena Emulgens sinistra.
5. Arteria Emulgens sinistra.
6. 6. Emulgentes venæ duæ ad sinistrum Renem.
7. 8. Arteriæ Emulgentes sub bifurcatione ad Renem sinistrum.
9. Emulgens vena sinistra quarta.
10. 10. Spermatice vena dextra.
11. Spermatice venæ exortus.
12. Ejusdem conjunctio cum Vena.
13. Vena spermatica sinistra.
14. Arteria spermatica sinistra.
15. Vena à spermaticâ sinistrâ ad peritonæum, comite arteriâ.
16. Venæ spermaticæ cum Emulgente unio.
17. Vasa deferentia.
18. Ureteris dextri insertio.
19. Ureteris sinistri exortus.
20. Ejusdem implantatio.

EXPERIENTISSIMVS

LEONARDUS BOTALLVS

OBSERVATIONE ANATOMICA PRIMA,

D E

MONSTROSO RENE

H O C H A B E T.



EFFLAGITANTIBUS ex me nonnullis artis medicæ studiosis, ut, dum liceret, in cadavere ostenderem, quomodo os capitis perforandum esset, dum res ipsa persuadet: quaque arte puri, vel sanguini, in thorace retentis, exitus detur, ut in empyicis seu suppuratis, vel ea parte vulneratis: qua item industria, in inferiore ventre in hydropicis aqua exhausti veniat: ac quomodo varices, vel aliæ tum venæ, tum arteriæ, quarum munus prorsus interdicere ars medica instituit, amputandæ essent, de quibus aliquando sermonem feceram; non potui non illis morem gerere hac in re.

Oblatum ob id mihi cadaver fuit, ex quo, præter id quod in eo, quæ supradicta sunt, ostendi: cæteras partes anatomicas invisas prorsus iri; æquum fore minimè putans, universum corpus dissectioni subjeci. Ubi verò ad renes pervenimus, adeò in iis luisse naturam vidimus, ut admirationem non levem omnibus spectantibus pareret, parietque item omnibus anatomicæ dissectionis peritis, eorum speciem intuen-

tuentibus : quam dignam esse judicavimus , ut ante hominum conspectus prodiret. Fortuitum fuit , ut cadaver hoc , in manus meas inciderit , quod ejectum fuisset non resecta tam monstrosa , atque omnibus anteactis ævis invisa , renum effigie.

Accipe igitur , lector benevole , schema renis non comentitium , neque fictum (ut nonnullis ex famigeratissimis Medicis Parisiensibus sensu constitit , videlicet dominis Gorræo , Magno , & Baldichio , insuper & scholasticis innumeris , cadaveris sectore *Jacobo Dyoneo* , juvene sanè docto , artisque medicæ studiosissimo) immò ab optimo proboque pictore , fideliter accurateque à naturali delineatum conflatumque , à me subinde characteribus insignitum , atque jacet ; quo minore negotio , à quovis artis anatomicæ non prorsus imperito , totius compositionis ratio perciperetur. Quatuor enim sunt renes in una mole conjuncti , sinibus tamen atque vasis inter se divisi , ut figura ostendit. Plures adhuc exstabant propagines ab emulgentibus , quàm sint notatæ , verùm propter earum exiguitatem , patientiores tantum produci volui.

Non est quod hic pluribus verbis agam , in exaranda causa tam deformis alienæque à recto naturæ ordine compositionis , quum æquam natura potestatem habeat , æquamque impotentiam supra renes , atque supra alias corporis partes , (a) quas quandoque geminat , interdum mutilat , aliquando majores , minores interdum , nonnunquam à naturali figura prorsus alienas facit : & hæc vel ob materiam prænimiam , vel ob hujus defectum vel ob ejus impeditam actionem , quæ variis causis intercipi potest , quas enumerare hîc supervacaneum esset , cùm eas cuique li-

ceat colligere ex *Aristotelis Physica*, tum è *lib. de generatione animalium* 4. Quod hîc adhuc nobis dicere conveniet, est, nôs posse putare hunc hominem fuisse (*b*) salacem, ob vasorum feminalium abundantiam: præterea, quòd si diutius vixisset (quod illi fortè natura concessisset, cùm optimo corporis habitu in cæteris constituisset, sed ficarium trucemque factum jus laqueo de medio abstulit) censendum est crure sinistro fuisse tumoribus (*c*) œdematosis subditum, propter Emulgentem, quæ supra Renem ferebatur, in femorali statim insertam: nam interea dum naturalibus adhuc viribus pollebat (non enim supra quadragesimum annum vixisse facies ostendebat) fugebat ren validè serosum humorem: interea & si aliquid labebatur, facilè exercitio, & nativo calore robusto, in halitus absumebatur, quod non æquè præstitisset, si ætatem virilem egisset. Ventriculo etiam erat prægrandi, toto corporis habitu carnosus ac firmus. Tibias, seu majora focilia crassa habebat ultra modum, & teretem figuram habentia; fibulas verò minores, quàm corporis habitudini conveniret: & lien, præter vasa, quæ in ore superiore ventriculi (*d*) communiter inferuntur, alia duo habebat satis manifesta ad fundum infixa.

C H A R A C T E R U M

F I G U R Æ X V.

E X P L I C A T I O.

A. Vena cava.

B. Arteria magna, sive aorta.

CCCC.

CCCC. Vena emulgens sinistra, quæ in renem non fertur, sed multas in eo propagines inserit, ipsa verò deorsum procedit, cuti renis adharens, tandem in femorariam infigitur juxta Q.

DD. Vena emulgens dextra, quæ & ipsa supra renem fertur usque ad literam X. ubi in inferiorem dextrum sinum dispergitur.

E. Vena adiposa.

F. Arteria seminalis dextra.

b. Arteria seminalis sinistra.

G g g. Venæ seminales sinistrae quæ invicem junguntur & una fiunt in f.

f. Locus ubi junguntur simul aliquot venæ seminales, & una tantum fiunt, exortæ ab emulgente sinistra.

HHHH. Propagines variae ab emulgente dextra & sinistra productæ, quæ disperguntur in superiorem sinum.

III. Seminales dextræ, quarum duæ à vena Chili, & duæ ab Emulgente in unum coeuntes in d.

d. Locus unionis seminalium ex dextra parte insurgens.

KK. Arteriæ geminae insertæ, altera in summitate Renis dextri, & altera in summitate sinistri.

LL. Propagines multiplices ureterum, quarum pars à supremo sinu prodit, pars verò ab inferiore, coeuntes juxta p.

p. Locus ubi uniuntur varii ureterum processus, exsurgentes ab utroque sinu dextro.

MMM. Exortus sinistrorum ureterum superiorum nempe & inferiorum, qui in (a) copulantur.

a. Locus conjunctionis ureterum sinistrorum.

N. Altera emulgens sinistra quæ in superiore sinu infigitur.

- O. Arteria quæ implantatur inferiori sinistro sinui.
 PP. Productiones venarum, insurgentes ab emulgentē sinistra, sinistro infimoque ventriculo, seu sinui insitæ.
 QQ. Femorales venæ nimirum dextra & sinistra.
 RR. Femorales arteriæ, dextra scilicet & sinistra.
 T. Locus ubi infigitur arteria una, notabilis magnitudinis, à magna arteria producta, in parte tamen supposita quæ superjacet & arteriæ & venæ magnis: arteria autem magna incipit intra O & N. exsurgere supra venam cavam ut in schemate patet.
 V. Locus superioris ventriculi seu sinus dextri renis.
 X. Inferioris dextri sinus locus.
 Y. Inferioris sinistri sinus regio.
 Z. Regio superioris sinus sinistri.

Ad hæc quas edidit annotationes Vir Celeberrimus, Anatomicus summus D. Joannes van Horne, Medicinæ Professor in Acad. Lugduno-Batavâ, cum quàm maximè ea illustrare deprehendam, utiliter hîc adjici censeo: sunt ea sequentia.

* *

(a) Quanquam Anatomicorum diligentia, rari & admirabiles Naturæ lusus in partibus nostri corporis fuerint detecti, cujus fidem facit *Cl. Riolani* discursus de omnimoda transpositione partium naturalium & vitalium, in cadavere ficarii, anno 1650. Parisiis dissecti, reperta: nusquam tamen feracior solet esse & frequentior, quàm in variandis renibus, vasisque ab iisdem prodeuntibus. In his namque sæpenumero peccat in excessu, sæpè etiam in defectu, sive quod ista variatio non multum possit obesse corporis œcono-

no-

nomiæ , five quod in formandis iis partibus spiritus formator modò plus modò minus materiæ reperiatur , quàm pro natura partis ; eam namque causam auctarum aut deficientium partium tradit *Aristot. 4. de gener. anim. c. 4.* Exemplum numeri aucti exhibet nobis præsentì observatione *Botallus* : similiter *Barthol. Eustachius l. de Renibus cap. 10.* tres se vidisse renes testatur ; & *Gemma l. 2. Cyclognom. c. 6.* tales depingit *Baubinus Tab. IV. fig. 1. Appendicis.* Idemque *Gemma lib. 1. Cosmocrit. c. 6.* ait , quatuor aliquando reperiri. Contrà , unicum à se repertum fuisse renem memoriæ prodiderunt *Carpus in Isag. Anatom. Stephanus de dissect. part. corp. hum. l. 2. c. 15. Fernel. de part. corp. hum. descript. c. 6. Eustachius , c. 10. § 41. Panarolus l. 1. obs. 3.* & ego , anno 1656. dextrum tantum in cane offendi. Mirum est , quod *Vesalius lib. 5. c. 10.* scribit se observasse in habentibus ventrem impensè prominulum , & vitiatum costarum ductum , unicum interdum renem in medio positum , reperiri. Propius accedit ad *Botalli* observationem , ea quæ exstat *hist. 77. Cent. 2. observ. Anatom. Bartholini.*

In Ureteribus diversitas non rarò occurrit , ut testis est *Cl. Riolanus Anthropog. l. 2. c. 27. Panarolus l. 1. obs. 4.* & mihi anno 1656. in cadavere decollati dexter Ren duplici uretere præditus , conspectus est , qui tamen ambo propè vesicæ ingressum conjungebantur. De multiplicitate venarum & arteriarum Emulgentium nihil addo , quia res est vulgarissima. Icones habet *Baubinus in append. figurarum tab. 1. 2. § 3.*

(b) Ratio falacitatis insufficiens videtur , desumpta à numero venarum seminalium , siquidem , ut ordinariè solet , unica tantum hic adfuerit arteria sperma-

matica: in hunc errorem similiter lapsus est *Salomon Albertus* in schemate Renum & Venarum Emulgentium, historiæ partium corporis humani, editioni ultimæ anni 1602. subjuncto. Veriorem dabat olim Celeberrimus *Pavins*, hujus Lycæi Anatomicus meritissimus, nimirum foecunditatis causam referebat ad arteriæ spermaticæ magnitudinem decuplo majorem vulgaribus duabus, in cadavere suspensi à se inventam, referente *Hoffmanno Comm. de us. part. n. 1013.* Alia Salacitatis causa in cordis calore quærenda est, à quo pectus, etiam in mulieribus, pilis hispidum redditur nonnunquam, teste *Panarolo p. 5. obs. 37.* præsertim si in corpore adfuerint humores falsi & mordaces, ut egregie censet *Lemnius de occ. nat. mir. l. 2. c. 36. § 37.*

(c) Conjectura admodum infirma est, quam de tumoribus œdematosis sinistri cruris adfert *Botallus*, præterquam enim quod tales à fero non proveniant, sed à pituita, etiam per arterias debebat humor in crus effluere, juxta doctrinam de sanguinis circulatione. Nunc verò sanguinis portio per cruralem sinistram refluere, factâ aliquali digressionem per emulgentem sinistram, iterum supra renes venæ cavæ descendenti infundebatur.

(d) Nulla ejusmodi vasa dantur, quæ à Liene proficiuntur, & in superius ventriculi orificium inferuntur. Intelligit enim vasa vulgò dicta brevia, quæ & plura sunt, à vasis splenicis versus ventriculum reflexa, & fundo inferuntur è regione Lienis collocato. Vide *Barthol. anat. Reform. l. 1. c. 9.*

CLARISSIMVS

THOMAS BARTHOLINVS

Hist. anatom. Cent. 2. hist. LXXVII.

*De Rarâ Renum, & capsularum atrabiliarium
structura hoc proponit.*

NOLIM in numero monstrorum foeminam habere. *Aristoteles* naturæ aberrationem vocavit. Alii homines esse pernegarunt. Omnes in sexum cognati generis injurii. Valdè tamen in mulieribus ludit natura, illarumque partibus generationi dicatis. In cadavere muliebri *Patavii* 1643. dissecto, raram omnino renum & capsularum atrabiliarium structuram observavimus. Renes utroque latere more solito siti, in unum concreverant supra divisionem vasorum in ramos iliacos. Pelvis ureterum extra renes conspicua, triplici ramo ex renibus egrediebatur. Capsulæ atrabiliaræ quatuor numerabantur. Superior dextra, triangularis; sinistra, quadrata. Inferiores duæ rotundæ, globosæ & inæquales, quæ arterias à trunco, venas ab emulgentibus accipere. Emulgentium venarum numerus insolitus. Vena dextra emulgens triplex sed exilis, sinistra simplex, crassior, sed ante ingressum trifida. Arteria emulgens dextra duplex, sinistra solitaria, sed pari modo ante ingressum divisa. Vena spermatica dextra ex trunco orta, in medio divisa, iterumque deinde unita. Vena sinistra duplici exortu insignis ex emulgente sinistrâ. Arteriæ spermaticæ nullæ. Singularis quidam ramus ex inferiore concursu renum ad iliacum ramum protendebatur. Quæ ut clarius demonstrantur, figurâ adnexâ singula ante oculos ponere constitui.

E X P L I C A T I O.

F I G U R Æ X V I.

- A *Arteria magna descendens.*
 B *Vena cava descendens.*
 C *Capsula atrabilaria dextra.*
 D *Capsula sinistra.*
 a *Vena ex cavâ ad capsulam dextram.*
 bb *Venæ ab emulgente ad capsulam sinistram.*
 c *Ramulus qui jungitur cum ramulo venæ αζυγ.*
 dd *Arteriæ duæ ab emulgente arteria dextra.*
 e *Arteriæ ramus ab emulgente sinistra.*
 E *Arteria emulgens dextra superior.*
 F *Arteria emulgens sinistra.*
 G *Emulgens vena dextra prima.*
 f *Emulgens secunda.*
 g *Emulgens tertia.*
 H *Vena emulgens sinistra.*
 I *Ren dexter.*
 K *Ren sinister.*
 L *Renis utriusque concursus p. n.*
 M *Capsula atrabilaria prima.*
 N *Capsula altera minor.*
 hhhh *Arteriæ ex aortâ capsulis insertæ.*
 i *Arteria emulgens dextra inferior.*
 k *Vena spermatica dextra.*
 OO *Pelvis ureterum.*
 PP *Ureteres.*
 Q *Arteriæ in ramos iliacos divisio.*
 l *Ramus singularis ex rene ad venam iliacam.*
 m *Vena spermatica sinistra.*

F I N I S.

LAURENTII BELLINI

FLORENTINI

GUSTUS ORGANUM

NOVISSIME DEPREHENSUM;

PRÆMISSIS AD FACILIOREM INTEL-


LIGENTIAM QUIBUSDAM DE

SAPORIBUS.

THE UNIVERSITY OF CHICAGO
LIBRARY
CHICAGO, ILL.
1911

LAURENTIUS BELLINUS

LECTORI S.



N, amice Lector, quid luserint Musæ meæ, quod oculis tuis subjicitur, non ut abs te commendationem, & plausum extorqueat, sed ne tua vota frustrentur, dum quidquid in alienas manus incidit, ad rem anatomicam spectans, novisse desideras. Id, qualecunque sit, æqui bonique consulas velim, sicut æqui, bonique te consulturum spero; cum etiam nugas meas de renibus non humaniter solum exceptas videam, sed & amplissimis Amstelodami, Argentoratique typis illustratas, & per virum Clarissimum, doctissimumque Gerardum Blasium (quem hic honoris, & grati animi titulo commemoratum volo) appendice monstrosorum renum exornatas; quo mihi perhonorifico facto summopere meum ipse gratularer, nisi cognoscerem, id ab eruditorum candidissimis nimis potius: quàm à rei promeritis provenire: in qua, ut alia mittam plurima vel illud maximam imperfectionem, quod cum Anatomicorum opiniones recensere mihi proposuerim, Bartholomeum Eustachium sicco pede præterierim, quasi de renibus libellum non scripserit. Quid faciam, tamen, si rarissimum illud opusculum me latuit, & latuisset adhuc, nisi Serenissimus Ferdinandus Magnus Dux Hetruriæ (quem majoris obsequii gratia ita memoro, cum titulum non inveniam ipsius amplitudini parem) dono acceptum mihi legere permisisset pluribus post editionem mensibus, cum

non dabatur ejus accuratissimi & eruditissimi viri sententiam tractatui meo inferere, & quò mecum conveniret, aut dissentire videretur, exponere, quod viris ingenuis gratiosum accidisset, & mihi occasionem præbuisset apertiùs, & fusius opinionem meam explicandi, quædam pro re nata adjiciendi, & eadem argumentis aliis confirmandi. Hinc factum est, ut statim ac tractatiunculam illam tam honorificè acceptam sensi, stimulos, animosque adjici mihi sim arbitratus ad hæc, quæ præ manibus versabantur evulganda, non dubius, quin parem gratiam, & humanitatem apud viros eruditiores sortiri debeant, quibus & alia nostra non omnino sorduerunt. Hæc igitur excipe, ut soles, & si pauca reperiās, scias hunc unum constitisse animum, ut plura non scriberem, cum mihi satis fuerit in priori quidem hujus opusculi parte concludere; saporem in compositis ab uno quidem sale præcipuè, sed cæteris eorundem compositorum particulis immisto, proficisci: in posteriori verò Gustatus instrumentum educere, quod semper antea latuerat, ultrò permittens tibi plurimo conclusiones, quæ deduci possunt non inelegantes. Si quæ reprehendenda detegas, ut deteges fortasse non pauca ne statim ad contemptum, & diras venias, sed in memoriam revoca ejus esse conditionis libros penè omnes, ut in iis,

Sint bona, sint quædam mediocria, sint mala plura: Unius veritatis pretio cæterarum rerum levitatem compensari; obstare nimium scribentibus genium concitatio-rem & impetum vividioris animi, qui in me fræni adhuc impatiens tractari sese non sinit: impedimentum rectæ meditandi rationi adeo meherculè validum, ut nemo fuerit unus, qui postquam ætas deferbuit, &

accuratam magis contemplationem admiserunt positi spiritus, aut non doluerit juvenilibus annis scripsisse, aut non mutaverit pleraque, aut saltem tentaverit numcum annis nova accesserit sapientia: Sic Tullius meo quidem iudicio philosopho quolibet sapientissimo non minor Rhetoricos suos, exemplar scilicet bene dicendi, sibi elapsos queritur. Quintilianus sublimis animi vir, & admirabilis doctrinae aliqua tantummodo in institutionibus; quas habemus à se relicta testatur ex iis, quæ in duobus artis Rhetoricæ libris sub ipsius nomine ediderant boni quidem juvenes, ut ipse loquitur, sed nimium amantes auditores sui: cæterum multa mutata, plurima adjecta, omnia compositiora, & elaborata. Seneca eximius ille moralis disciplinæ, inter omnes videlicet præcipue magister, cum de motu terrarum volumen, juvenis memoriæ prodidisset, tentare voluit, & experiri jam senior, an ætas aliquid sibi aut ad scientiam, aut certè ad diligentiam adjecerit. Adeò verum est Demeæ illud apud Terentium.

Nunquam ita quisquam bene subducta ratione ad vitam fuit,

Quin res ætas, usus semper aliquid apportet novi,

Aliquid moneat, ut quæ te scire credas, nescias,

Et quæ tibi putaris prima in experiundo repudies.

Hinc factum est, ut in rebus hisce dubiis nunquam tantum mihi tribuerim, ut quicquam titulo veritatis insigniverim, sed semper intra verosimilitudinis, ac probabilitatis limites me continuerim, cum ultra exempla doctissimorum hominum idem modò affirmantium, modò negantium, modò respuentium, quòd ante arriserat, doceat me Rex, quem tamen nos sapientissimum dicimus, se plurimum à sapientia semper abfuisse cum di-

dicto: Dixi sapiens efficiar & ipsa longius recessit à me multò magis quam erat, & alta profunditas, quis inveniet eam? quare si inter tot ignorantiae tenebras aliquod hic veritatis lumen effulget, fruiere, ut liber; cætera condona humaniter, & eorum in sensu habe, quæ per ætatem & usum in experiundo repudiem. Denique si quid minùs emendatè, minùs exactè impressum offenderis, cogita, quale sit typorum negotium, & quàm faciliè subrepant errores in compositione verborum tantò magis, quòd me Florentiæ commorante, Bononiæ, ut vides, impressio peracta est per epistolas, per internuncios, per amicos (quorum accuratissimæ equidem diligentiae maximum me debere lubens fateor, cùm difficile sit, quanta opus fuerit patientia ad ritè percipiendum M. S. illud meum informis adeo, & confusi characteris) & si Linguae figuras quæ & plures, & non inelegantes adjici debuissent, non evulgamus, id tempori, & occasione tribuendum, quæ ne pingerentur, evicit. Hæc tantum habui quæ monerem.



LAURENTII BELLINI

FLORENTINI

GUSTUS ORGANUM.

CAP. I.

Cur quædam, quæ hic necessario agitanda videbantur prætermittamus.



ANTEQUAM manum operi admoverem arbitrabar, nullius esse negotii cognoscere, quid gustus, seu gustandi potentia sit, cum enim observarem esse in nobis maximè familiare, quotidie non semel à nobis in judicio saporum exerceri, & sensus inter, quos externos, & quinque faciunt, recenseri, in eam abieram sententiam, res hujusmodi obvias, parabiles, & quæ vel nihil tale cogitantibus nobis operantur, esse adeo perceptu faciles, ut quoties vel minimùm animus adverteret, earum haberemus absolutissimam scientiam. Data autem occasione negotium hujusmodi attentius contemplandi, adeò arduum, adeo obscurum, adeo ab humana cogitatione remotum inveni, ut id assequi penitus desperaverim non sine admiratione reputans, qui tandem fiat, ut velocius, ac citius, quæ à nobis maximè distant, & quæ fortasse nihil ad nos attinent, explicemus, ut Cœli, syderumque naturam, motum, ordinem, magnitudinem, distantiam & hujusmodi alia sexcenta philosophis, astronomisque ita

G

com-

comperta, ut *vel Deorum consiliis interfuisse, vel modo ex Epicuri intermundiis descendisse videantur*, si cum Cicerone loqui fas est; de nobis autem, & de eis, quæ non circa nos tantum, verum & quæ in nobis aguntur adeo parce sciamus, ut hic ego non dixerim cum Venusino *nec scire fas est omnia*, sed rectius cum sapiente, *Unum scio, quod nihil scio*; unde parum abfuit, quin ne una quidem ducta linea, manum amoverim de tabula, quandoquidem si scribendi recte sapere est, & principium & fons, quomodo de sensibus rectè scribere poteram, si nihil in iis est, quod me non fugiat? Cum autem animadvertirem, ne alios quidem esse in hujusmodi cognitionibus supra conditionem meam, licet ingeniolo meo multò majores, facile exinde sum arbitratus sensuum naturam obvolutam adeò, & tam altè conssepultam latere, ut vel ipsam explicare, aut ex altissimis erueret sit tantum non impossibile. Quapropter irritos omnes conatus meos existimans, quoscumque demum exererem, fatius duxi hujusmodi contemplationem prætermittere, & inscitiam meam cum candidioribus philosophis libere fateri, quàm mei periculo nominis exhibilandam proponere instabilem, mentitamque doctrinam, dum immerito vellem iisdem videri sapientior. Nimium equidem nos fortunatos, si daretur, quod tantopere habemus in votis, absoluta sensuum notitia; per ipsos enim sensum traduceremur in cognitionem animæ sentientis, & hinc ad rationalem hominis, & immortalem, quarum cum adeo admirabiles quotidie operationes experiamur, quam nos bearet earundem optatissimus aspectus! Quoniam vero misera equidem istæc nostri animi conditio est, ut se
ipsum

ipsum assiduè quærat , nec detur unquam per viam progredi , quæ ad sui cognitionem ducit per scientiam videlicet de sensuum natura , quærere hic consequenter erat animus , ubinam sentiendi facultas , & quod propius ad rem nostram accedit , gustandi vis infideat , num scilicet in determinata aliqua corporis parte principe , unde actionem sensuum , quibus velut instrumentis utatur , tanquam è specula prospiciat ; an vero ipsis instrumentis inhæreat , & si intimè præsens illis , ita ut sine aliis internunciis res sensibiles ex se ipsa discernat ab iisdem excita ad sensationem. Sed istud pariter tot tantisque difficultatibus obnoxium , adeò explicatu arduum sese obtulit , ut spe dejectus , coactus fuerim mutare consilium , & hujusmodi tractationem integram omittere , cùm præcipuè res ipsa videretur expetere , ut aliorum opiniones agitarentur de sentientis facultatis sede , quam determinare provincia non est meis viribus demandanda , tanto magis , quòd lis agitur inter principes duos , Philosophorum scilicet , & Medicorum , Aristotelem , & Galenum , quorum ille in corde , hic autem in cerebro sentientem facultatem collocabat : iis autem non solum assidere non possum iudex , sed summo mihi esset in honore positum , si , quod maximè aveo , daretur longe ipsos sequi , & adorare semper vestigia ; & tamen utrisque insistere impossibile , & ab utrovis discedere periculosum est. Prætereo , quot opiniones à non minoris notæ philosophiæ propugnatae ad examen essent revocandæ de sede hujusmodi facultatis , quorum alii in ipso instrumento positam , alii in nervis , alii in spiritibus , alii in nulla peculiari parte , sed undequaque diffusam , & ex compositione corpo-

ris resultantem asserunt, existimantes cum sene illo Phtiota apud Fullium, & Aristoxeno apud Lactantium nihil omnino esse facultatem, & nihil in animalibus reperiri, præter corpus ordinatum, vel dicentes cum Simmia ex compage viscerum oriri vim sentiendi, sicut ex pulsatis fidibus oritur sonus. Nec deerit insuper Epicurus, qui in anima ex tenuissimis quibusdam particulis conflata portionem quandam inveniet sensus artificem nobis tamen incompertam, & nullo nomine designatam per totum corpus diffusam, si spectat ad irrationalem, si vero ad rationalem, in pectore tantummodo collocatam. Quibus omnibus opinionibus, exactissimè licet expensis, videant cæteri, quid tandem, quod alicujus momenti sit, deduci possit, per me potissimum, cui non datum est.

— *Verum gemina suspendere lance*

Ancipitis libræ, & rectum discernere, ubi inter

Curva subit, vel cum fallit pede regula varo.

Quapropter si ad tractationis hujus qualemcumque dispositionem necessarium erat, ut res vel ab orco, ut dicitur evolveretur, indulgeant quotquot ista vident perfectionis amatores, si & quid Gustatrix Potentia, & quonam demum in loco sit non determinatur modo, sed ne quæritur quidem; aperte enim fateor, me non habere, cui fidam, nec quicquam suppetere, quod proferam verosimile. Liceat igitur mihi isthæc præmisisse, ut tantummodo palam fiat, quid requireretur ad hujusmodi Philosophiæ partem absoluto ordine explicandam, & cur id prætermisum. Qualiscunque igitur natura, & essentia facultatis gustatricis, quacunque in animati corporis parte sita sit, & quomodocunque operetur, devenimus tandem ad

per-

perceptu faciliorem disputationem, quæ nimirum illa sint, quæ Gustatum à proprio munere feriantem excitent, moveantque, ita ut actus eliciat suos; quod cum nemini non sit maximè compertum, esse munus rerum sapidarum, quæritur hic, quæ tandem hujusmodi sint, quid per saporem sit accipiendum. Qua in re cum non unam inveniam sapientissimorum hominum sententiam, parcant ipsorum eruditissimi manes (quorum acerba semper mihi est, & honorata pariter recordatio) si quid pro re nata contra ipsorum placita adstruimus, neque enim id unquam præstabimus contradicendi genio, id siquidem, ita me Deus amet, semper sum maximum averfatus; neque inanis gloriolæ studio, docuit quippe me pluries non unius hominis infelix exitus, quàm fallax bonum sit fama mortalibus, & quàm gravis illi incubet mors, qui notus nimis omnibus, ignotus moritur sibi. Novi pariter argumentum pessimi tubam esse, & placere pluribus, displicere sapientibus; sapientes enim non hic prope nos sturnorum instar (quidni videlicet mei Civis Galilæi elegantissima similitudine utar?) volitant catervatim, sed altissima contemplatione sese tollunt in cœlum solitarii volantes, ut Aquilæ. Quicquid itaque producimus, veritatis amore producimus, qua præstantius nihil, nihil antiquius, venerabile magis nihil agnoscimus, quid proinde periculi imminet, si hac duce progredimur? Sed ad rem venio.

C A P. II.

Proponuntur opiniones de saporibus , & Aristotelicæ speciatim.

DE Saporum natura , quamvis occurrant Philosophorum plurimæ opiniones , quotquot tamen illæ sunt , facili negotio reduci posse videntur ad duas tantummodo classes , & unam quidem asserentium saporem nihil aliud esse , quàm Qualitatem quandam in determinatis compositis ex elementorum mistione resultantem , ac proinde ab iis solùm compositis posse gustatricem facultatem moveri , quæ hujusmodi accidente insigniuntur : alteram verò affirmantium ad excitandum gustum nihil aliud requiri : quàm determinata corpora certæ magnitudinis , & figuræ , & frustra in scenam advocari qualitates , quas non in saporibus modò , sed ne in aliis quidem vocatis accidentibus unquam inveniet Philosophorum industria , cum Natura nihil tale in hac rerum universitate produxerit ; & hujusmodi corpora Gustatum efficientia nobis esse non incomperta , nec esse quælibet , sed certa quædam dumtaxat. Stabit pro prima sententia Aristoteles longo sapientum ordine comitatus. Secundam verò propugnabit Moschus antiquissimus ex Phœnicia Philosophus , vel ante bellum Trojanum adhuc superstes , aut quisquis demum ille fuerit , qui minima corpora statuit esse principia rerum omnium , cui non obscuri nominis viri insistent Pythagoras , Empedocles , Heraclides , Plato , Xenocrates , Asclepiades , Bithynius , Diodorus Cronus , Mnesitheus Medicus ; Artemidorus , Leucippus , Democritus , Hip-

Hippocrates, aliique. His adjicere possumus & Anaxagoram; hic etenim quamvis ὁμοιομέρειαν illam suam posuerit (quam vocem à Græcanicis mutuor, quoniam vel teste Lucretio non habent Latini quomodo rem explicent, inquit enim

Nunc & Anaxagoræ scrutemur ὁμοιομέρειαν

Quam Græci memorant, nec nostra dicere lingua

Concedit nobis patrii sermonis egestas.

Cæterum quippe arrisit mihi nunquam verborum ista perversio, quasi nimirum eruditus quis esse non possit; nisi de Thusco Græculus fiat

Cum sit turpe magis nostris nescire latine)

tamen similiarium partium illa congeries corporea est, & nihil ipsi superaddebat in rerum productione, quàm varium ordinem, & contexturam. Adjicere & insuper possumus Anaximandrum, quoniam in universo illo suo dissimilari corpora solum habebat, quorum minimæ particulæ quamvis ab ipso ponerentur, velut semina certarum rerum, ipsis nihil adjungebat quod accidens, aut qualitas vocari posset, nisi horum nomine intelligere placeat figuram, & motum, quod aliquibus ex recentioribus Philosophis arridere comperio. Insuper & Epicurum; quamvis enim in epistola ad Herodotum quiddam recenseat innominatum, quod sit sensuum omnium opifex, loquitur de ipsorum sensuum natura & essentia, non de iis, quæ ipsos excitant, de his siquidem agit in eadem epistola speciatim, & tenuissima corpora recenset sensuum organis accommodata, ut in ipsius vita fusius apud antiquæ rei scriptores. Inhærent eorum vestigiis nostris hisce temporibus Chymicæ artis industrii cultores, qui non solum asserunt determinata corpo-

ra saporibus procreandis sufficere, sed insuper ostendunt, quæ tandem isthæc sint suis edocti experimentis, à quorum placitis abhorreere non videntur Galilæus, Gassendus, Cartesius, & quotquot alios aliqujus notæ Philosophos habuit ætas nostra ferax Sapientum. Cùm itaque opiniones omnes statuentium corpora rerum principia ad unam reducantur, eo quod in natura saporum explicanda conveniant, & cùm insuper dictum sit ad Aristotelicam cæteras revocari, exponendum hic jam videtur, quid ipse Peripateticus senserit, tum, ut ipsius opinione cognita, num alii, quos cum ipso sentire diximus, verè ipsi subscribant, palam fiat, tum etiam præcipuè, ut inter se collatis utrisque sententiis in eam animus duci sinat, quæ veritati magis accedere, & experimentis respondere cognoscet. Hæc igitur Aristotelici ratio-
cinii summa. Quoniam illa aquæ natura est, ut cujusbet saporis sit expers, & experiamur tamen eandem cujuscunque saporis esse capacem, oportet, ut id ipsi accedat, & quod aliquid patiatur, & transmutetur: veritati siquidem non consentit, aquam ipsam esse saporum omnium seminarium (ut Democritus, & Anaxagoras arbitrabantur) ex una enim re sicut ex eodem cibo videmus factos sapores alios; nec pariter contineri quidem in ipsa aqua omnia saporum genera, ut Empedocles, adeo tamen tenuia, & dispersa per ipsam, ut propter sui parvitatem nullo modo sub sensum cadere, eumque movere possint; videmus enim fructus variè concoctos subire quascunque, penè, dixerim, saporum mutationes, & è dulcibus austeros amaros aliarum specierum fieri pro temporum varietate transpirante diluta portione, &
ad

ad solem, & ad ignem varias saporum formas induere, adeo ut apertissimè liceat deducere, non ab aqua fieri tales, sed alterari & variari in hujusmodi qualitate solummodo, quia ea, quæ circa fructum, transmutantur. Quæ cum ita se habeant, oportet jam inquiramus, à quonam hujusmodi passionem & transmutationem recipiat aqua. Ejus igitur opifex ignis esse non potest, & sola calidi virtus; est enim aqua humorum omnium subtilissimus, & vel ipso oleo subtilior, nam quod hoc extendatur, & quodammodo ducatur, facit suarum partium tenacitas, quæ glutinis instar, aut visci mutuò ipsas cohibet, ne diffluant, aqua autem fragilis est, hinc ille facilior fluxus, & difficultas major aquam in manu continendi, quàm oleum. Evidenter insuper patet, aquam sapidam crassiorem esse, quod à sola virtute caloris obtineri non potest, cum aqua igni exposita ex se sola crassitudinem nullam indipiscatur: His igitur experimentis edocti qualitatem hanc aquæ communicari ab igne solo non posse, videamus num considerantes, ubi sapores reperiantur, aliquid deprehendere possimus, quod nobis ad veritatem sternat viam. Patet experientia sapores omnes, quos circa fructus sentimus, in terra pariter reperiri, cujus rei vel illud esse potest certissimum argumentum plurimos esse fontes, quorum alii dulces, amaras alii, alii alias ducunt aquas eo sapore non aliunde traducto, quàm à variis terræ partibus, & cuniculis, quos in fluxu percurrunt, rationabiliter proinde licet statuere maximè in terra nascentibus fieri saporum genera, quippe cum dictum superius sit, sapores in aqua recipi aliqua transmutatione operante, aqua autem sit humida, ab

H

alio

alio pati humiditas nequit, quàm à contraria siccitate, quæ cum in remisso tantummodò igni concessa sit, non multum hic inferet violentiæ in aqueam humiditatem; plurimum autem à terrea siccitate patietur, cum isthæc in terra reperiatur in summo. Itaque quemadmodum aqua coloribus; saporibusque iis inficitur, qui in eadem lavantur, ita pariter & natura vel per siccum terreum humiditatem coloris vel per humiditatem siccum & calore incoquens quale quid humidum facit; καὶ concludit ἐπὶ τῷ ὁ χυμὸς τὸ γινόμενον ὑπὸ τῷ εἰρημένῳ ξηρῷ πᾶθῳ ἐν τῷ ὑγρῷ γήσεως τῆς κατὰ δυνάμιν ἀλλοιωτικὸν εἰς ἐνεργείαν. *Et hoc est sapor, passio videlicet facta à dicto sicco in humido gustus eundem de potentia ad actum deducens.* Hæc Aristoteles, ejus dictis quot, quantique Philosophorum, ac Medicorum præstant fidem suam: Ecce Galenus (si tamen libellus de oculis ipsi adscriptus suppositus non est) saporem dicit aquam alicujus corporis siccitati operante calore permistam: causam omnis falsuginis in partes terreas adustas complexionum siccicarum & saporis amari aqueæ humiditati pauci saporis, aut nullius admistas refundit Avicenna: nullum saporem absque humore dari posse affirmat Guinterus, gustatum absque liquido corpore perfici non posse docet Herunius, qualitatem appellat Lidellius ortam ex sicco terreo per humiditatem diluto, qua gustus in actum producitur; ponit saporis materiam Cafferius humiditatem, in terrestri siccitate prædominantem, calorem verò efficientem; rem altius aliquanto repetit Weccherus, & universalius saporem describit per secundam qualitatem ex elementorum concursu, & actione natam gustum de potentia ad actum

moventem: explicat Buccchananus per qualitatem patibilem à temperie humidi per siccum vi caloris percolati oriundam; pariter Keckermanus per qualitatem ex terrestri siccitate cum humido per calorem probè temperato proveniente, & super omnes breviter Alstedius, qui saporem nominat humidi aquei cum sicco terreo contemperationem. Quid nos? Utramque partem ad trutinam expendimus, ut examine quantum vires nostræ ferunt diligenti veritas ut ut licet appareat, cujus tamen iudices alios esse volumus majoris auctoritatis & famæ.

Qui possint vitio nigrum præfigere thæta.

C A P. III.

Dubia quædam circa recensitam doctrinam.

PRIMO itaque, quod ab Aristotele supponitur, a quam nimirum insipidam esse, experientia adeò manifestè videtur ostendere, ut ne minimum quidem de hujusmodi propositionis veritate dubitare liceat; sicuti pariter lubens in ejus sententiam descendo, cum asserit, eandem, omni saporum genere imbui posse; an vero hoc aquæ accidat, eo quod ipsa aliquid patiatur & transmutetur, adhuc affirmare non audeo hæsitans, debeamne hic Philosopho præstare assensum meum, & de hoc inferius. Quid in Democriti redargutione afferat, quod contra ipsum alicujus roboris & momenti existimandum sit, ut candidè fatear id quod res est usque adhuc non assequor. Quæ contra Empedoclem afferuntur vera crediderim; non ta-

men ideo prostratum ex toto dixerim Empedoclem, nec ita confectum, ut quid mutire non possit; quid enim ille subjicere nequeat ejusmodi experimenta non negari, sed insuper inquiri unde saporum illa mutatio proveniat, quomodocumque tandem illa contingat, & id accidere posse, eo quod à varia eorum corporum concoctione, transpirationeve multæ aquæ particulæ transponuntur, conjunguntur, avolant etiam vi caloris vel insiti, vel adventitii resolutæ, quæ mediante diversa aquearum particularum dispositione & quantitate dispersa saporum insensibilia ceteroquin propter parvitatem semina diversimode implicentur, unianturque, & varia saporum genera exprimant. Quod vero latere possit in humido aqueo tale saporum seminarium ob exiguitatem suarum partium gustatum fugiens, evidenter confirmari posse, per id, quod aliis in sensibus accidit, qui non nisi determinatæ quantitatis, & certæ virtutis objecti alterari & excitari ad cognitionem possunt; sic in tenuissimis gravium quantumvis corporum ramentis nullam deprehendimus gravitatem, tardio rem motum non animadvertimus reputantes ea ratione mota corpora quiescere, & hujusmodi alia plurima propter minimam, & insensibilem virtutem, tanquam non essent, omittimus: cur vero id, quod in his accidit, credendum non est eodem modo & in saporibus contingere, ita ut non vis quælibet possit movere gustatum, sed requirantur determinati gradus virtutis, nec pauciores tanti sint ipsum movendo? Sed nonne & apud Aristotelem ipsum habemus ingustabile esse, quod *aut parvum, aut parvum habet saporem* τὸ μικρὸν, καὶ φαῦλον ἔχον χυμὸν, & contingere, ut album nigrum secus invicem posita, invisi-

sibi-

sibilia sint propter pravitatem ἰνδένεται μὲν γὰρ ἡ τῶν ἁλῶν
 λα πῆμα τὸ λευκὸν καὶ τὸ μέλαν ὥστε ἐκάτερον μὲν ἀόρατον
 εἶναι διὰ σμικρότητα? Si igitur ipse Philosophus fatetur
 per tenuitatem res, ceteroqui sensibiles sensibilitate pri-
 vari, cur hic Empedocles redarguitur? Plurima ad hæc
 subjungi possent, non hic tamen Empedocli dies dicitur,
 ut causam agere suam debeamus, ad rem proinde no-
 stram. Ab igne solo sapidam aquam evadere, & ipse
 quoque negaverim cum Aristotele; nullum tamen ne-
 xum invenio inter rationem, quam subjicit, & id, quod
 confirmare contendit: quid enim negotii interest inter
 aquæ subtilitatem, & fragilitatem, & ignis aptitu-
 dinem ad communicandum, vel non communicandum
 saporem? Nisi fortasse libeat aliquatenus textum ex-
 ponere, ita ut subtilitas, & fragilitas aquea igni pa-
 riter subtilissimo adeo facilem exitum permittat, ut
 levissimam ab ipso patiatur impressionem, & sic nul-
 lam exinde sapidam qualitatem possit contrahere.
 Sed ne ista quidem extorta interpretatio satisfacit, i-
 gnis quippe quantumvis tenuissimus in maxime fria-
 bilem aquam ita operari potest, ut, vel eodem Ari-
 stotele teste, non qualitates modò, sed aqueam ipsam
 formam in sui naturam convertat, ac proinde cum
 nec alterutrius, nec utriusque vel tenuitas, vel fragi-
 litas mutuam impetum impedire possit, doceat me
 qui novit hujusmodi ratiocinii ordinem, ac connexio-
 nem, adeo siquidem caput suum abscondit nodus iste
 Gordius, ut nullus alius explicare possit, quàm Ale-
 xander. Rem evincit apertius, quod consequenter
 habet de aquis igni expositis non crassescantibus, &
 de spissitudine sapidarum, & hoc, quamvis hic non
 confirmet, supposuit alibi confirmatum in Meteorolo-

logicis exemplo earum navium, quarum Gubernatores ignorantes differentiam inter crassitiem aquæ fluviatilis insipidæ, & marinæ, damnum in fluviis passi sunt, & nos multo verosimilius argumenta possemus deducere à minori difficultate natandi per aquas sapidas; quàm insipidas; à majori conatu, quem Urinatores exercere coguntur in illarum, quàm in harum profunditatem descendentes, & è contra sese ad superficiem reducentes, minorem in his, majorem in illis facilitatem experiuntur; ab æquilibrio, quod mutatur in corpore ad eandem in specie gravitatem aquæ proximè accedente, si ipsi aquæ tantillum licet salis immisceatur, & ab illis experimentis plurimis excessum gravitatum à majori minorive spissitudine provenientium demonstrantibus. Aristotelici ratiocinii, quod superest cum experimentis, & rationibus rem ipsam propius attingere videatur, adeo ut veritatis speciem aliquam præferat, diligentiores expetit inquisitionem, & non qualem hætenus habuimus raptim, & per transennam. Ut saporis naturam detegat Philosophus experimenta primùm, indè verò elementorum triadem vocat in scenam, terram videlicet, aquam, & ignem, quæ non quatenus talia sunt, sed ratione contrariæ virtutis, quæ ipsis inest, operantur invicem, ita ut alia agant, alia patiantur non sine mutua reactione, ut ajunt, & repassione; & quia observat, saporis fructuum in terra pariter reperiri exemplo aquarum dulcium, amararum, ac è terræ visceribus scaturientium, & sapor non nisi in humido sit, rationi consentaneum ducit, saporem esse opus terreæ siccitatis agentis in humidum, simul etiam operante calore ignis, ac demum saporem definit passionem à dicto sic-

sicco factam in humido gustus. Si rem hanc ab origine usque repetere daretur ocium, & locus, innumeræ fermè difficultates afferri possent in medium, quia tamen illæ non modò ad hanc doctrinam spectant, sed & ad alias spectare possunt, aliquot earum proponimus, quæ faciunt ad rem nostram. Cederam ego semper præceptore Aristotele præeunte mutuis viribus elementa sese destruere facilius, quæ in altera qualitatibus conveniunt, & ut dicuntur symbola, difficilius quæ in neutra & asymbola, ita ut alterum in alterius naturam faciens à suis operationibus desisteret; & ita operaretur, ut nova forma, quàm subiit, expeteret, nec unquam audiveram, alterum alteri succumbere, non transmutari, tamen, sed remanere, quod prius eodem permanente principio suarum operationum, quod formam substantialem appellant; vel hoc ne minimum quidem transmutato diversas tamen actiones produci. Debeat pluvia generari ex aquis hisce nostris, non feret ignis in sublimis minimas harum particulas, sed propter contrarietatem corrumpetur aqua ab igne, & sub vaporum specie ad aëris frigidi stationem evecta deducetur ad formam nubis, ex qua deinde non aqua solum habebitur, sed ob admixtas exhalationes & fulmina, & fulgura (tanta vis est collisionis) & tonitrua, & secundum diversas aëris regiones, tempestates, ventos, aliaque diversimode alterantia orientur & nives, & grandines, & rores, & pruinae, & nebulae, & ab exhalationibus producentur & venti, & terræ motus clandestini, & Cometæ, & vel ipse Circulus lacteus. Idem esto iudicium de glacie, de maris falsedine, & ut isthæc leviora præteream, quæcumque habemus

com-

composita contrarietati elementorum debemus, quorum unum si alterius viribus impar est, formam, & qualitates, & actiones admittit suas, præpotentis elementi induens naturam. In saporum solummodo generatione elementa præliantur succumbit aqua, & aqua tamen remanet, & quod majus est substantia, & forma aquæ ne alterata quidem producit qualitatem novam terrea siccitate in propriam humiditatem agente. Sed cum terrea siccitas ex se virtutem nullam agendi habeat, quo tandem modo hujusmodi impressionem in humidum facit? Virtute terræ? Terra verò quatenus talis est nihil agere, aut pati potest, ac proinde agendi vim, qua ipsa destituitur siccitati communicare non poterit. Nec refert, si dicas, elementa activa esse, quatenus ipsis contrarietas inest, contrarietas enim isthæc quid tandem est? unde provenit? non sunt elementa, ut elementa, inertia quippe supponuntur; non ut unita qualitatibus, quandoquidem, ne memorem qualitates non esse quid superadditum ipsis, & ab extrinseco adveniens, sed quid elementi formam immediate consequens, nonne istæ pariter inertes sunt? & si inertes, quid agere poterunt cum inertibus elementis? Quod si velis inesse vim operandi quomodocunque hoc tandem se habeat in terra, agat igitur: sed agerene poterit altera tantummodo qualitatum? quis frigiditatem cohibet, ne & ipsa vires exerat suas? Sed terrea frigiditas cum aquea convenit, ac proinde nihil agere mutuò possunt. Isthæc autem cum vera sint, cur terra aquam ipsam in sui substantiam non convertit, quando jam alteram aquæ virtutem sibi adjunxit, alteram verò facillimo negotio vincere potest, cum aquea humiditas sit remissi

gra-

gradus , sua verò siccitas intensi ? Cur contenta levissimæ tantum impressionis permittit aquæ naturam suam conservare contra Naturæ leges , quæ cum necessitate semper ducatur , prohibere non potest aquæ transmutationem in terream formam , postquam mutuis viribus symbola isthæc elementa concurrerunt. Sed demus & hoc arridere quandoque naturæ , isthæc à sicco terreo in humiditate facta passio quid tandem est ? recipine potest ab humido , & si recipi , num conservari ? Quid ista siccitas ? Certè si nihil aliud illa est , quàm difficilis terminatio , seu potiùs alienis terminis difficilis adaptatio , quid tandem intercedit negotii inter hujusmodi repugnantiam , quæ à partium arcta colligatione solùm provenire videtur , & generationem saporis ? Taceo interim valdè dubium videri posse , num summa illa siccitas , quæ terræ communiter adscribitur , verè reperiatur in nostris hisce partibus extima superficies non multò profundioribus , quæ non ad sapores modò , verùm ad pleraque constituenda concurrunt ; si enim ad ulnas aliquot effodiamus , semper in corpus quoddam incidimus facilè in pulverem dissolubile , quo nihil aptiùs , & nil faciliùs alieno termino coërcetur. Sed quidquid de siccitate sit , ecqualis nam isthæc humiditas est , quæ recipere possit , & conservare contrariæ qualitatis impressionem ? Si esset aliquid non ab simile molli ceræ , siccitas autem sigilli adinstar , res saltem præter propter percipi posset , quis autem capiat fluidissimum corpus , & fragile , ut aqua est , retinere posse saporum imaginem à terrea siccitate impressam , idem est , ac si quis liquatam ceram intenderet obsignare sub sigillo continue diffluentem. Sed ,

inquis, eadem non est ratio, neque enim quicquam imprimit siccitas, sed mutat humiditatem. Mutat inquam? Huc verò revocari possunt allata superius argumenta omnia, quibus adjungere liceat, nunquam observari humorem ex insipido in sapidum conversum siccitatem contrahere, & dubitari è contra fortasse possit, num majorem acquirat humiditatem, nullam autem mutationem in contrarium subire posse crediderim humidum, quàm in siccum, quod in saporibus non contingit. Dicent fortasse, aquæ aliquid commisceri saporibus progignendis aptum. Sed non est id, quod hic concludit Aristoteles, munus illud universum terreæ siccitati demandans, quamvis antea ex aquæ sapidæ crassitie mistionem aliquam deduxerit: id autem quamvis concedere non repugnemus, urgent adhuc eadem omnia, cùm de productione sapidæ qualitatis nihil inde fiat magis compertum. Maximè interim gratulor siccitati, quòd ex non actuosa, & patibili, ut appellant qualitate plurium animalium bona in saporum generatione facta sit agens. Sed esto: Sapor est opus siccitatis, cur terreæ, non autem igneæ? Quia inquam ea terreæ solùm propria est, & in excessu; ignis verò debiliior calore dominante. At quanta debet esse virtus siccitatis, ut in humido saporem generet? cur summa? unde id deprehenditur? Num quod igni exposita sincerissima aqua saporem non contrahit? at idem omnino accidet, si eadem aqua per purissimam terram percoletur, & tamen hic & summa aderit siccitas, & aderit aqueus humor, nec tamen ullus sapor procreabitur. Quod si requirant siccitatem determinatæ, & non omnis terreæ, erit id Aristoteli parum:

con-

consentaneum, qui hic hujusmodi conditionem non habet, & licet haberet, peteremus inde, quale sit illud determinatum corpus siccum, & unde tandem proveniat talis in ipso vis. Et quia fortè rationibus coacti ipsius sectatores respondeant, tale corpus esse sal, videant ipsi, quàm benè Philosopho insistant, siquidem cùm in saporum generatione concausam tantummodo appellet ignem, Sal verò, vel per ipsum adusta terra sit, nonne necessarium erit, naturam igneam retineat, & consequenter ut ignis non concausa, sed causa, & principalis etiam existimari debeat? Adde, quòd cùm plurimi saporum fontium è terræ visceribus erumpentium ducant aquas, non calidas modò, verùm etiam ferventissimas, cur ex hoc ego inferre non possim, ejusmodi saporem ab igne, vi vel calida, vel sicca provenire, quemadmodum ipse ex eo, quòd aquæ per terræ abdita fluentes inde sapidæ effluunt, deduxit, à terreo sicco saporem generari? Missum hic pariter facio, concedi ab Aristotele, agere quidem ignem sua siccitate aliquantulum in humiditatem, de calore autem esse parum sollicitum; quasi videlicet caliditas ad præsentiam aquæ otiosi debeat, nec ab adversario cavere sibi, ne superata faceffat in frigus, & hoc pacto ignis ipse nimia socordia miserabiliter pereat. Omitto insuper duo elementa ignem, ac terram tunc temporis conjurare in humiditatem; mutuum verò foedus adeò religiose interim conservare, ut ne minimam quidem noxam alterum alteri inferat, licet id maximè deberet contingere, cùm sint ex elementis symbolis, & facilè transmutabilibus. Sicut etiam omitto, alibi affirmaturum Aristotelem, saporem dulcem à Solis ca-

lore dilutum auferente, & reliquum decoquente provenire; alibi calidum falsum, & calidius falsius; alibi falsum humorem dulcem reddi cum movetur; alibi falsos omnes humores non ut dulces frigidos esse, & quod alibi apertissime ingenitæ ignis virtuti saporibus acceptos refert hisce verbis: εἰσι ἡ πολλαχῶς καὶ κρῆναι καὶ ῥεύματα ποταμῶν, παντοδαπὰς ἔχοντα χυμούς. ὧν πάντων αἰτία τὸ ἐνέσθαι ἢ ἐγγινομένην δύναμιν πυρός. καομένη γὰρ ἡ γῆ τῷ μᾶλλον ἢ τὸν, παντοδαπὰς λαμβάνει μορφὰς, ἢ χροὰς χυμῶν. πυρτηρίας γὰρ καὶ κενίας ἢ τῶν ἄλλων τῶν τοιούτων γίνεται πλήρης δυνάμεων, δι' ὧν τὰ ἡθεύματα ὕδατα, ὄντα γλυκέα, μεταβάλλει, καὶ τὰ μὲν ὀξέα γίνεται. *Sunt autem pluribus in locis Ἔ fontes, Ἔ fluxiones amnium multiplicibus saporibus præditæ, quorum omnium causa refundenda est in insitam, aut ingenitam virtutem ignis; terra enim magis, Ἔ minus incensa omnifarias subit species, Ἔ colores saporum, aluminis enim, Ἔ calcis, Ἔ aliorum hujusmodi evadit plena virtutibus, per quæ transcolata aqua, cum esset dulcis transmutatur, Ἔ alia quidem fit acida, Ἔc.* Plurimæ supersunt difficultates, quas vel ipsa Aristotelica principia contra ipsius de saporibus assertum contemplanti suppeditabunt; ne res tamen evadat æquo longior, & scrupulosa nimium, videatur inquisitio, pauca hæc enumerasse sit satis, quæ maximè gratiosum accideret mihi, si quis resolveret, ut imposterum tutior, & ipse Peripatetico suffragari possem.

C A P. IV.

Alia proponitur & admittitur sententia.

Q UAM verò facilius rem omnem absolvemus, si cum Chymicorum non paucis, iisque sapientioribus, & supra laudatis Philosophis nos etiam asseramus (posito, quòd Aristotelica ratiocinatio ex toto non satisfaceret; quòd adhuc hæret) nihil aliud esse saporem, quàm ipsum sal determinatis linguæ partibus applicatum, in quibus & ratione figurarum ipsius, & ratione conformationis partium linguæ illa passio excitetur, ex qua dolor, aut delectatio determinata proveniens dicatur jucunda, vel injucunda Gustatio, suavis, aut insuavis, talis, ac talis sapor! Certè hujusmodi positio, & experimentis non repugnat, & paucis, imò nullis difficultatibus obnoxia est, & facili, brevique sapientissimæ Naturæ operandi modo congruere videtur, quæ omnia si in rebus dubiis & geometricè indemonstrabilibus reperiuntur, nemini dubium est, sapientum animos debere in eam devenire sententiam, ut credant probabiliter, & quantum nobis cognoscere datum est, si ita non se res habet, saltem ita se habere posse non repugnare. Ne verò hujusmodi partem sequi videamur genio quodam impulsu, non autem ratione coacti, aliquot in medium afferemus argumenta, quibus factum est, ut magis in hanc, quàm in illam opinionem propendeamus. Et quoniam usque adhuc difficultates congeessimus in Aristotelem ex suismet principiis deductas, hic uno, eodemque tempore, & positionem hanc magis vero-

similem confirmabimus, & in Aristotelicam insurgemus, contra ipsam pronunciantes quidquid pro altera subjiciemus. Cùm igitur tot, tantisque dubiorum nexibus implicatam Peripateticam opinionem observarem, arbitratus sum, non aliunde id provenire posse, quàm quòd, falsa hypothesis, & firmo parum fundamento tota machina de saporum doctrina fulciatur; illud autem cùm esse deprehenderem, quòd sapor sit in humido, tentare non destiti, num experimentis id confirmare possem, vel quid contrarium animadvertere. Sumptis igitur portionibus pluribus variarum rerum, quas inter & salium aliquot numerabantur, iisque omnibus nulla humiditate scatentibus, & inde lingua, quod fieri potuit, exactissimè absterfa, cœpi sic aridam linguam aridis pariter iis frustulis undequaque contingere, nec id in alienis modo, sed in propria etiam lingua præstitum. Observari autem visum est, quantumvis, sale, & instrumento gustus exsucco, saporem salis, quamvis aliquanto imperfectius, si ipsis particulis gustui perficiendo aptis applicabatur; quibus iisdem partibus, si cætera corpora extrinsecus salis expertia admovebantur, nullus exercebatur sensus, præterquam tactus; quæ experientia, sicut evidenter demonstrat, non esse saporem humiditatis proprium, sed à salibus provenire, ita etiam alios in usus transferri potest, sicuti iis inferius à nobis accommodabitur. Non absimile indicare videntur cineres, qui linguæ, licet perhumidæ, & cuilibet ipsius parti superimpositæ nullum saporis vestigium imprimunt, si ab ipsis extractus antea sal fuerit! imprimunt autem, si sal ipsis restituitur. Idem suadet vulgatus ille mos, res insipidas ad
sa-

sapiditatem traducendi per immistionem salis, & iterum redigendi ad naturalem insipientiam sale per artem separato. Idem pariter, quod Chymistæ communiter, & facillimè absolvunt salium diversitas ex diversis compositis eductorum, quorum singulæ species saporum pariter singulas species pariunt, adeo ut qui sapor est dulcis in aliquo composito sale proprio non separato, sit deprehendendus in ipso post separationem sale, quamvis negandum non videatur, mistionem illam salium cum massa, cui naturaliter insiti sunt, producere aliquam diversitatem, ita ut idem omnino aliquando non deprehendatur sapor in separatis salibus, ac ille qui in toto composito deprehendebatur. Suos verò sapores iis concretis nunquam restitues, quantumvis incendas, quantumvis per humiditatem (dummodo isthæc pura sit, nec salium prægnans; fieri enim tum fortasse posset, ut illi eis corporibus adjungerentur; quod tamen difficilius etiam crediderim, cum experientiâ pateat, aquam salibus semel imbutam iis non aliter exui, quàm per resolutionem in vapores) percoles quantumvis, contras, alteresque, ut libet, nisi sales suos ipsis admisceas rursus; & ne videar te traducere in Chymicorum officinas (quod tamen verum non est, isthæc siquidem rudia sunt, & parabilia, & habent illi multò meliora, ac nisi insolenti enimvero confidentia promitterent, ut dicitur, montes aureos, ut productionem humanæ durationis in æternum, homunciones è vasculis oriundos, & alia hujusmodi rationem & naturam æquo plus excedentia, eruditus eorum est fumus, nec animis offundit caliginem, sed illuminat) quod ipsi præstant in rebus omnibus sapidis, præstet Aristoteles:

teles in aquis, quas omnifarios inducere sapes affirmat iisque, per evaporationem assumptis inveniet in fundo vasis salem ejus saporis, quem aqua ipsa, antequam evanuisset, repræsentabat. Ex quibus omnibus, aliisque plurimis, quæ passim reperire est apud non ultimæ notæ candidos Philosophos, quid probabiliter deduci possit, videant alii, quos vivere fas est occipiti cæco; quandoquidem ipse, si unquam pro re nata audeo aliquid pronunciare, & monstror digito prætereuntium ad contemptum, & à tergo, quæ non manus auriculas imitatur mobilis albas? Usque adeo corrupti moris nostra isthæc ætas est,

Ut nemo in sese tentet descendere, nemo,

Sed præcedenti spectetur mantica tergo.

Istane verò, inquis, adeo decantata evidens opinio est, ut ne minimùm quidem de ipsa dubitare liceat? quasi nimirum per ipsam explicari possit, quid sit sapor insipidus, & quomodo ejus sensum habeamus; quasi, si ita se res habet, verum non sit humiditatem ad Gustationem non requiri, quam tamen necessariam esse hujusmodi sensu est tantùm non evidens; quasi non debeat excitari quæstio, per quid ipsi sales sint sapidi; quasi una, eademque substantia, ex qua salium omne genus constat tot saporum species producere possit; quasi non sit assignandus modus, quo linguam afficiunt, & movent ad eliciendam gustationem; quasi denique non sit ipsis superadjungenda qualitas, quæ sapida nuncupetur, aut sapor. Hæ autem nonne difficultates sunt, quas isthæc opinio patitur objectis in Aristotelem multò validiores? Sint qualescumque per me licet; at qualescumque sint conabimur resolvere; & quia ipsarum pleræque aliqua in-

indigent præparatione ad absolutiorem salium notitiam conducente, ideo hic primam tantummodo de sapore insipido tollemus è medio. Non hic autem immorabimur, ut ulterius urgeamus eadem difficultate Peripateticos pariter impeti posse, & ipsos quoque ad hujus saporis explicationem teneri, & quomodo ejus sensationem habeamus, nec ab iis id explanari posse per humiditatem, & siccitatem suam, quando cum hisce qualitatibus nihil familiare habet insipientia, & indiscriminatim tam humida, quàm sicca corpora absque sapore animadvertimus; sed innuimus tantummodo insipientiam, quæ gustu percipitur in compositis nihil esse aliud, quàm salis, aut saporis privationem; sentiri autem à nobis talem privationem per privationem ejus passionis, quam Gustatrix facultas experiri assuevit in suo organo ab impositis cibis. Quod ut exactiùs intelligatur, observandum est assuevisse nos, cum escam ingerimus quandam in lingua, palatoque passionem à tactione admodum discrepantem distinguere, ex qua deducimus, illi corpori, quod mandimus, inesse aliquid ultra tangibiles, ut appellant, qualitates, cui id nomen sapor impositum est iis tantummodo instrumentis, non aliis corporis partibus dijudicandum: cum autem in alterius speciei materia dentibus comminuta quicquam non dijudicat lingua, præter simplicia tactui alterando destinata accidentia, tum judicatrix potentia statuit ejusmodi cibum non ejusdem esse naturæ cum ante gustato, eò quòd non eodem modo ab ipso afficitur, nec quicquam præter tangibilia discernit, & quemadmodum eò quòd ciborum primus certo modo Potentiam afficiens dictus est sapidus, & ejus sensio Gustatio,

statio, ita pariter alter eò quòd linguæ impositus non Gustatricem Tactricem facultatem simul, sed Tactricem solummodo movet, insipidi nomen obtinuit, & actus, quo se facultas non excitari cognoscit, appellatus est insipidi sensio, aut ejusdem Gustatio. Novum autem non est, & Naturæ inusitatum, animalium Potentias judicare de iis rebus, quibus nullo modo affici possunt, seu potius eum increbuisse morem, ut dicamus, audiri silentium, cùm nullus pulsabat aures rumor, videri tenebras, cùm nulla lux perstringit oculos, gustari insipidum, cùm nullus sapor obfertur. Novit hoc & Aristoteles, & apertissimè docuit, aliqua per negationem percipi, ut quietem privatione motus, numerum negatione continui, & alia hujusmodi. Sed notior res ipsa est, quàm ulteriori indigeat explicatione, ac proinde cùm ex dictis satis liqueat, & quid insipidus sapor, & quomodo ejus gustatio perficiatur, descendamus jam, ut & cætera diluantur, ad

C A P. V.

De Salibus quædam.

Cum hic de salibus agimus, texere non est animus absolutam ipsorum historiam, sed tantummodo aliqua explicare, quibus perceptis facilius in cognitionem veniamus & saporum; & gustationis. Omitimus itaque & quæstionem de origine salium, num scilicet ipso universitatis exordio ipsi pariter à summo opifice creati fuerint in fodinis suis, num temporis intervallo concreverint materiæ particulis variè inter se

se concurrentibus ad salium generationem : omittimus ipsorum naturam & proprietates , & quale in mistis eorundem sit munus ; num totam compositi massam clandestinis motionibus continenter agitare ; num ejusdem particulas cohibere , ne diffluant ; an alter in alterius naturam facefcere possit , an potius adeò mutux transmutationi adversentur , ut prius liquari , quàm commutari patiantur ; an ipsis debeant quæcumque composita originem suam ; quasi ipsi haberi debeant prima omnium materies , & forma , fixis ob inertiam suam subjecti adinstar , & patientis se habentibus , volatilibus autem motu suo , & vi maximè actiuosa agentis instar ; an adeo arctè sese contineant invicem duo , aut plures , ut ne quidem ignis intensa vi , nec in vasis sublimatoriis , nec igne aperto separare quis valeat ; quæ sit illa facultas , per quam sales variis certis admisti liquoribus fervorem excitant , in aliis autem intensissimum frigus , ut ebullit acidus Buxi spiritus sali Tartari affusus , & liquor ille ampullæ spagiricæ ex albo , & frigido rubicundus , & ita calidus ab admistione cujusdam salis evadit , ut tractari non possit , cùm è contra aquam glacie non minus frigidam faciat Hali nitri spiritus , & Ammoniacy : qua virtute liquidorum , quibus admiscentur colores alterent , & novum inducant nec in salibus , nec in humore separatim inveniendum , ut cum vitriolata aciditas bilioso sali adjuncta nigredinem contrahit , cum crudum Antimonium in prætenuem pulverem redactum solo Terebinthinæ oleo in sanguinei coloris Balsamum dissolvitur , cum sal à spiritu miscellæ ex Antimonio , Nitro , & Tartaro constantis eductus cyaneum syrupum violaceum in viridem con-

vertit, & sublimati solutionem in luteam albedinem: unde fiat, ut aquæ salibus diversarum stirpium aspersæ gelicidium, folia, & plantas inspicienti objiciat, quarum salibus aspersum fuit ante congelationem, decoloratas tamen, & confusas, quod equidem admiratione non indignum esset & meditatione pariter, si à veritate non recederet, ut à plerisque accipio, cui non absimile illud est, quod ferunt, Oleum Myristicæ nucis in vase hermeticè clauso à Ferdinando Gonzaga Serenissimo Mantuæ duce diligenter asservatum ex se ipso transiisse in Oleæ arborem non sine ramis, & foliis, quæ si animos sapientum impellerent ad stuporem, si cum re ipsa convenirent, quid si figmenta essent, & fallaces imagines? sed quidquid isthæc sint, seu vera, seu falsa narrentur, quoniam certo certius est latere in salibus non unum Naturæ arcanum, & ipsorum contemplationi fusius & aptius immorandum esse, ut melius aliquanto instituat, omitimus isthæc, & alia plurima, tum quia habentur eruditissimè apud experimentissimos viros, Paracelsum, Helmontium, Libavium, Sennertum, Berigardium, & sparsim, elegantissimè tamen, & quod majus est, candidè enarrata ab accuratissimo optimæ mentis viro Roberto Boyle, tum etiam quia hic locus non est talia de salibus disceptandi, tum denique quoniam isthæc, ut certi quid proferri possit, & sensuum testimonio confirmari chymici potissimum laboris patientem exposcunt, qui irritus ex toto est, nisi quis habeat gravis æris appositum lucro multum, quod in summas enimverò chymicas impensas elargiter effundere possit ad instrumenta, ad furnos, ad officinas, ad res innumeras comparandas. Cùm verò me mea

pau-

paupertas vitæ traducat inertī, de salium solutione, eorundemque figuris absque tot machinis facilè deprehendendis hic agam brevissimè, quòd ea tantummodo huc spectare videantur. Ea igitur aquæ natura est, experientia repetita sæpius id evidentissimè demonstrante, ut salita corpora permeare non possit, quin imbibat determinatam salis portionem, quam secum defert, si effluit, & quod semper admiratione dignum mihi visum est, non unius salis speciem tantum, sed plurium eadem aqua certam quantitatem assumit, ultra quam, si vel minimum superaddas, subsidet, nec dissolvitur. Sic si aquæ sesquilibra communis salis unciam dissolvat, superadde tantillum, hoc fundum petet: eadem hæc aquæ portio locum concedit & sacchari statutæ portioni, quam si excedas, non absorbetur; idem esto de Ammoniaco, de Nitro; de plurimis aliis iudicium. His autem observatis, quod naturæ familiare esse animadverterunt artifices; ad rem suam traducere feliciter sunt aggressi, & operatione naturæ maximè consentanea, nec multum absimili sales è compositis eduxerunt non sine præparatione aliqua; nam quoniam sales, & cætera rerum componentia arctè admodum conjunguntur, & invicem implicantur, & corpus insuper, ex quo debet educi sal, est densum, non rarò atque compactum, adeo ut aquæ nullum permittat aditum, vel si aliquem, non eum tamen; per quem ad universi salis solutionem sufficiens aquæ copia penetrare possit, ut hæc facilius per compositi abdita discurrat, & secum, quod inibi salis latet, abripiat, necessarium est; hanc penetrationem promovere. Id autem triplici ratione præstare possumus, quæ omnes eò spe-

stant, ut corpus ex invio, compactoque permeabile undequaque fiat. Vel igitur id in cineres per ignem resolvitur, vel in pulverem conteritur, vel ad macerationem usque, & putrefactionem continetur in aquis; quippe quomodocunque res peragatur sales habentur. Si igitur in cinerem, aut pulverem lignum ex gr. redactum fuerit, & per eos aqua percoletur, secum, quantum poterit, salium ducet, cum ita comparatum sit, ut salibus adjungat sese, naturis aliis posthabitis; & id sicuti gustu deprehendetur, ita & oculis, manibusque rem apertissimè dignoscere poterimus, si percolatam aquam igni exponentes in vapores resolvi patiamur, in fundo siquidem vasis salem superstitem inveniemus per solutionem è ligni cineribus separatum. Idem observabitur, postquam aqua evaporaverit, in qua computruerit lignum, pari enim modo salem inveniemus, hoc tamen discrimine, quòd putrefactum lignum minorem dabit salis quantitatem, quàm in cineres reductum dedisset; siquidem ut maxime putrescat, non adeo tamen laxantur pori, nec ita minimæ particulæ disjunguntur, ut aquea vis possit omnia perrumpere, & combibere salem universum, sed cogitur portionem quandam relinquere, quam habeas, si idem lignum absumas igne, & lixivium in vapores resolves; quod insuper aliter comprobatum est, scilicet acceptis duobus pondere æqualibus ejusdem trunci frustis majorem salis copiam exhibuit collatura per cineres alterius, quàm alterius putrefacti solutio; argumentum evidens in maceratione salis aliquid ab humore separari, & aliquid insuper superesse infixum, & unitum tenacius, nec nisi per ignem dissolubile. Et hæc de salium dissolutione

tionem per aquam, submonens tantum, quæ de cineribus ligni dicta sunt, eadem proportionaliter intelligenda esse de pulveribus quoque, quamvis & in his etiam non ita exacta separatio, & solutio accadat macerationi similior. Longus hic consequenter institui fermo posset de Figuris salium, ut compertissimum cuique fieret singulis salis speciebus suam inesse determinatam, & invariabilem configurationem, certos angulos, acies, & superficies, quod pluribus rationciniis evincere conaremur, quando experientiâ, & oculari observatione destitutis confugere esset opus ad mentem; si autem illa non destituimur, absurdum foret à sensibus omnium rerum indubiis observatoribus ad rationes plerumque parum firmas, nisi à sensibus proficiscantur, deficere. Si igitur observationi fidere non detrectamus, patet, unumquemque salem certo quodam modo conformatum esse, & talem hanc extimam habitudinem adeo sibi esse propriam, & connaturalem, ut nunquam eandem possit exuere, & sua sponte, dum insensiles particulæ coagmentantur invicem in ejus figuræ crassiusculam massam confluerent. Et quoniam id liberis oculis observare in minimis moleculis non datur, adhibe exquisitum engyscopium, & singulorum salium rimare lapillos singulos; deprehendes in unaquaque specie extimam formam suam lapillulis singulis ex æquo communicatam, plus minus perfectius (quod mirum videri non debet, cum & in CrySTALLIS etiam sex quidem semper facies deprehendantur, rarò tamen undequaque perfectæ, & ita ut altera alteri crystallo omnino respondeat) Aspectum equidem jucundissimum deprehendere in quibuscumque salibus dulcibus, amaris, acribus,

sal-

falsis, acidis, cæterisque determinatam asperitatem, aut lævorem, obtusulos angulos, acutulosve, plures, paucioresque cuspidulas, easque breviores, aut longiores, & hoc observari semper, sive sint fossiles, sive educti ex aquis, seu è stirpibus, arboribus, fructibus, foliis, floribus, seminibus, saxis, animantibus. Historiam hîc ego texere possem satis prolixam, & salium genera plurima recensere, & ipsorum figuras adjungere; horum enim largissimam fecit copiam mihi Serenissimus Ferdinandus Magnus Etruriæ Dux, qui jam eminentius multò supra Magni titulum assurrexit, & supra omnium virtutum apicem evectus videt laudationes omnes se ipso minores; fecit inquam ille copiam mihi, sed quia nec locus expetit, nec necessitas cogit, ut singulorum figuras percurram, habe paucas aliquot, ex iisque superioris propositionis indubiam veritatem agnosce. Illud autem universaliter dictum sit, ut cuicumque salis speciei commune; singulas figuras horum corporum angulosas exhiberi, in eo autem discrepare inter se, quòd illæ plures, aliæ pauciores, hæ acutiores, obtusiores aliquæ, hoc illove modo aptatos inter se angulos habeant, unde operationes variæ oriri possunt, titillationes, & punctiones in iis partibus, quibus applicantur. Determinata verò salis ex Laurinis foliis deducti configuratio ita se habet: Prisma est hexagonum, cujus alteri basi insistit perpendiculariter Pyramis etiam hexagona verticem habens obtusiusculum; alteri verò frustum ejusdem prope verticem abscissæ: ex floribus mali Medicæ repræsentat duo hexagonarum Pyramidum frustra, quorum bases æquales simul conveniant, cui non absimile videtur Liquiritiæ sal,
En-

Endiviæ, Cucurbitæ, aliorumque similium, nisi quòd extractus ex liquiritia aptat quandoque sese in parallelepipedum, quod cubo propius accedit; quod in zingibere quoque deprehenditur; differunt autem hujusmodi sales non in superficiecularum numero, & angulorum, sed in eorundem acutie: emittit cubicum salelem Capillus Veneris: octahedricum Acetosa, & octahedro proximum Melissa; Rhombo similem Colocynthis, & similem pariter Elleborum album: duo hexagonarum Pyramidum frustra ad verticem abscissarum utrinque basibus recti, & hexagoni prismatis insistentium sal Esulæ repræsentat; plurimæque sunt salium species, quæ aut Pyramides, aut Pyramidum frustra interceptis prismatis æmulantur sex ut plurimum laterum, aliæque insuper observantur, quarum figuram constituunt aut duæ Pyramides, aut earundem in æqualibus basibus convenientium frustra absque intercepto Prismate, ejusque generis habemus salelem à nigro pipere, à corticibus mali punici, elleboro nigro, aliis; hujus autem superius jam aliquot memoravimus, quæ sunt exiguæ admodum altitudinis; altiora verò sunt frustra Pyramidum Cichoriaceum salelem constituentium, ita ut vertex tantummodo ablatu videatur, quemadmodum est & Parietariæ sal, & Absynthii: comprehenditur autem inter utramque pyramidum basim hexagonam totidem facierum prisma in Brassicæ, Cucumeris, Eustagiæ, Scoparum, florum Roris Marini salibus, & ne longius abeam, alia sunt salium discrimina à differentia multitudinis angulorum, & aptitudine ad penetrationem, petenda, unde hic sal hebetiorem, ille verò exquisitiorem sensum in nobis excitat. Mirum autem videri non de-

bet, si unicuique salium speciei propriam, & statutam formam indidit Natura, quandoquidem nec id novum, nec ipsi inusitatum: habent suam determinatam faciem res propè dixerim omnes, lapides plurimi, arbores, frondes, flores, semina, animantia, cur pariter & sales non habeant? & isthæc ad faciliorem expositarum superius objectionum resolutionem necessaria visa sunt.

C A P. VI.

Quomodo sal è cibus educatur, & liquetur in ore.

NON tamen isthæc pauca, quæ de salium solutione, & figuris præmisimus, sufficiunt omnibus diluendis difficultatibus, quæ contra hujusmodi de saporibus opinionem ab adversariis offeruntur, nisi etiam modus à nobis explicetur, quo ejusmodi tenuia corpora per ciborum substantiam undequaque dispersa, & exquisitè permista separentur, & Gustatricem Potentiam moveant. Nullum verò hic dubitaturum arbitror, in cibusne sal revera insit, quod videmur supponere; id siquidem à nobis supponitur tanquam maximè comperitum, & experienciâ confirmatum, sive præexistat actu, sive potentiâ, ut distinguunt in scholis. Quòd si quis sit aliquanto pervicacior, nec hypothesei experimentis suffultæ stare velit, consultat chymicas corporum resolutiones, & inveniet ferme ex omnibus educi salem, herbis, pomis, leguminibus, arboribus, animalibus, & paucissima nosse poterit, quæ salem non exhibeant, qualia sunt Aurum, Argentum, Talcum Venetum, Osteocolla selenitis pura, fusilis arena, & alia hujusmodi ad ignem inten-

tenfiffimum licet ne minimum quidem falſedinis contrahentia. Quoniam igitur ſtatui verofimiliter poſteſt, per ſales Guſtum haberi, videtur ipſorum ſolutio omnino neceſſaria ad hoc, ut organum afficiant, nec alius eandem abſolvendi modus ſuppetit, quàm per aquam ratione non abſimili à ſuperius expoſita, quamvis enim & alii apud Chymicos reperiuntur, eorum tamen plerique reducuntur vel ad ignem, vel ad aquam, & hanc vel ſimplicem, vel variis, ut appellant, menſtruis admixtam; illum verò temperatum ad certos caloris gradus, & certis inſtrumentis applicatum, ſiquidem non quilibet in quocumque vaſe calor ſeparandis compoſitorum ſubſtantiis ſufficit, ſed unus gradus unam, alius aliam ex hoc, illove corpore variis inſtrumentis impoſito deducit; ſic quod Guajacum reſolvitur in cineres, fuliginesque igni aperto expoſitum, Oleum, ſpiritus, acetum, aquam & carbonem ſuppeditat in retorta deſtillatum: ſic ſulphur in vaſis ſublimatoriis vi ignis non admodum valida in inſipidos, & ſiccos flores diſpeſcitur; ab igne verò aperto in corrodentis multum, & falſi liquoris: ſic à ſanguine non fermentato ſegregat lene balneum caput mortuum, & phlegma tantummodo, eundem in retorta intenſus ignis dividit in Oleum, ſalem volatilem, & caput mortuum. Cùm verò nec varietatem hanc graduum caloris, nec inſtrumentorum diverſitatem habeant animantia, quibus ad ſeparationem ſubſtantiarum in cibis latentium uti poſſint, & è contra iis non deſtituantur organis, quæ per aquam præſtanda ſalium ſolutio videtur expetere, cur affirmare non liceat re vera ejuſmodi ſeparationem ita contingere? Superius

itaque explicatum est; separari sales è concretis posse, si isthæc in cineres, aut pulverem detrita percolentur per aquam, vel in eadem macerentur; os autem animalium non æstuat, ut cibos incendere & cinefacere possit, nec tam diu asservat, ut macerationem subire valeant, quæ salibus solvendis apta sit, superest proinde, ut id obtineatur per divisionem solummodo in minimas partes; neque enim est, cur hic hæsitet aliquis, diuque laboret in inquisitione instrumentorum, quæ & cibos conterere, & combibere sales possint; siquidem cuicumque vel non advertenti patet dentibus, & salivâ os nostrum, & aliorum plurimum animalium donatum esse, quæ huic operi perfectissimè absolvendo sufficiunt. Neque id, arbitror, ulteriori indiget explicatione; res ex se ipsa loquitur, ostenditque evidentissimè ab incisioribus, & caninis diffringi cibos, & crassiores bolos in minutiores partes, non tamen minimas subdividi, quæ Molaribus commissæ, & hinc inde Linguae motu jactatæ, velut sub mola, in ipsorum mensis ita conteruntur, ut nisi saliva continenter influeret, pulveris crassioris speciem repræsentarent: sed quia nunquam non eructatur in os aqueus ille humor è vasis propriis, & præcipuè cùm mandimus, ex contritis cibus, & salivali humore massa illa resultat mox in ventriculum detrudenda, quæ nemini non patet, quanta etiam in meditullio saliva scateat; quare cùm & detritionem partium habeamus, & humorem insuper undequaque penetrantem, dubitandum non videtur, separationem salium tunc temporis contingere. Novi quid mustites, ignotum videlicet adhuc esse, num ejus naturæ saliva sit, qualis est aqua, ac proinde quamvis adsit

& elaborata materies , & humor, hic tamen aqueus non est, sed salivalis. Esto, salivalis est, sed nonne & aqueus in hoc, quod sales combibat & salivalis esse potest? Salivalis dicitur, non ut natura ipsius designetur ab aquea discrepans, sed ut & quibus insit hic humor, & unde proveniat, & ubi erumpat, & his similia indigitantur; cæterum si & consistentiæ, & sapor, & color, & aliis hujusmodi, ex quibus rerum naturam deprehendimus, fidem habere volumus, salivam cum aqua ipsa convenientem affirmabimus, cum & fluat, ut aqua, & fragilis sit, ut aqua, & perspicua, nulliusque coloris, ut aqua, & frigida, & insipida, ut aqua, & , ut uno verbo rem expediam (quid enim multum hæreo huic levissimæ difficultati?) quod maximè ad rem nostram facit, sales dissolvat, & combibat, ut aqua, quod cuique experiri facile erit purum putum salem ingerenti. Admittamus igitur cum Stenone, vim in humore salivali aliquam contineri concoquendis, aut dissolvendis cibis idoneam, & vel ex hoc ipsum ab aquea humiditate differre, id tamen nihil urget contra id, quod probare contendimus, cum & discrepare in aliquibus, & in aliquibus convenire possit cum aqua, ut in salium solutione, quod nobis satis est. Sed quid de dentibus statuendum? Tenendumne ipsorum munus esse comminuere cibos, ut sapores dignoscantur, & ad hanc fortè non necessariam operationem fabrefactos à natura adeo eleganter, adeo industriè, adeo anxie, nec aliò spectare debeat, & ipsorum ordo pulcherri-
mus per superiorem, inferioremque maxillam, & extrema habitudo sapientissimè conformata hinc in concavum, alibi in convexum, in his in cuspidem, aliis

planum , aliis in aciem desinens ; & ossea durissima-
que compages exterius omnibus nudata membranis ,
& altius plures , paucioresque maxillis infixæ radices ,
& his intertextæ nervorum propagines , & eorundem
ramusculi cum venulis , arteriolisve altiùs aliquanto
ad excavatum usque ipforum meditullium ascenden-
tes , & hoc idem tenuissimâ , mollissimâque tunicâ
succinctum , & illa naturæ sollicitudo in ipforum pro-
ductione , dum vel in utero talem aggreditur fabri-
cam in membraneis intra maxillas folliculis substan-
tiam quandam mucosam colligens , quæ processu tem-
poris concrescit in os , & è gingivis erumpit exuta
membranam , & illa ejusdem præcautio , ut uno evul-
so , succresceret alter , & illud molle , cedensque os-
seum sepimentum inferiorem à superiori folliculo di-
rimens , nec inquam istæc omnia , & alia plurima ,
quæ diligentissimi Fallopius , & Eustachius accuratissimè
observarunt , & elegantissimè litteris tradide-
runt in alium finem à natura comparata sunt , quàm
ut Gustationem promoveant ? Certè in hac adeo di-
ligenti dentium cura aliquid latere videtur , quod non
ad animalium delectationem solummodo faciat , sed
aliquid majus naturæ necessarium. Et ipse pariter
affirmaverim idem ex toto , crediderimque , summum
artificem adeo fuisse sollicitum de dentibus in qui-
busdam animalibus , ut per ipsos cibi comminueren-
tur ; ex hac autem comminutione non unus , & alter
solùm , sed plurimi effectus haberi possunt , quorum
unus Gustatio est : adeo videlicet sapientissimus ille
Opifex industrius est , ut unum , idemque instrumen-
tum aptet rebus plurimis peragendis ; sic , ne ab ani-
mantium corporibus discedam ; Mesenterio alligat in-
te-

testina, inserit glandulas, vasa distribuit lactea, sanguinea, lymphatica, nervea, & ut exemplum proferam nobilius, quæta pars usuum Nervorum nobis comperta est? habemus & sensum, & motum, & semen ab ipsis derivari, quæ tamen eorum provincia in cæteris animati corporis partibus, in quibus nec motus, nec sensus ulla indigentia, nec semen ullum? quid in Liene tam copiosa nervorum admirabilis contextura, cum interim Jecur Lienem magnitudine multum excedens pauca tantummodo, eaque tenuia obtineat eorundem filamenta? quid pulmonibus inserti? quid in illis plexibus, quos plurimos habemus ultra thoracicos, cervicales, mesentericos antea satis notos novissimè descriptos apud Thomam Willis? nisi placeat sentire cum eruditissimis viris DD. Entio, Glissonio, Charleton, Cornelio per nervos nutrimentum distribui, ad quod magis elaborandum plures pauciores huc illuc ramusculi nervei producantur. Quapropter cum extra naturæ ordinem non sit eandem partem non uni usui accommodare, mirari quis desinat, si id etiam dentibus accidit, & Gustationi opitulantur, cæterum ipsorum præcipuum munus dixerim, Comminutionem ciborum in digestionis gratiam quasi scilicet contritio illa sit perficiendæ in ventriculo concoctionis quoddam veluti rudimentum; quod adeo necessarium in quibusdam animalibus deprehenditur, ut quibus læve os, & edentulas gingivas natura construxit, posuerit asperitates quasdam mobiles in palato dentibus proportionales, & aliquibus dentes in ventriculo. Cur autem sic se rem habere voluerit, aut quibus animalibus dentes dati sint, difficillimum arbitror determinare, quandoquidem cum

cùm ejusmodi elaboratio per dentes, videatur ventriculi operationi admodum similis, crediderim aliquando edentulis ventriculum dentium vices gerere, cibosque conterere; sed observatâ plurimum ventriculorum structurâ, & duplicis tantummodo esse naturæ comperi, carneos videlicet, & membraneos, & indiscriminatim hos, illosve tam dentatis, quàm non dentatis animalibus datos: Sic mandentes, ac ruminantes ventriculo membraneo utuntur, sed & membraneo conficiunt ossa, crudasque carnes Aquilæ ossifragæ, avesque aliæ rapaces; mirum profectò, talem inesse vim iis Ventriculis vel durissima ita molliendi, ut liquidum excernant excrementum: carneum autem ventriculum in Mugile pisce me observasse memini, qui memoratis asperitatibus in palato non caret, & hunc eundem in Pipionibus, & Palumbis, pullis gallinaceis, aliisque hujusmodi rostratis solum invenio. Sed hæc nimis multa de separatione salium in ore per salivam in detritos cibos penetrantem. Non negaverim tamen, eosdem educi posse per macerationem, quod tum contingeret, quando materies ad certum tempus in ore detineretur, ut sensim saliva pervaderet; quod interdum fortuito factum experimur, dum nobis non advertentibus ciborum aliquæ reliquæ inter utrumque dentem hærent per aliquod spatium temporis, quæ deinde illinc ex inopinato vel linguæ motu, vel copiosiori salivæ affluxu deductæ, & tactui mollitiem, atque friabilitatem, & gustui saporem repræsentant; id verò naturæ institutum non est, & præter intentionem evenit, & præter necessitatem.

CAP. VII.

Quomodo Gustum excitent ad Gustationem.

TANDEM liquatos in ore sales ad Gustatricis facultatis organum deducimus, meditantes interim, quomodo illa in perceptione saporum afficiatur, & unde talis vis in salibus emergat. In hoc autem opificio, sicut ab instituto suo Naturam non recedere arbitramur, sed brevissimè, ut solet, facillimeque rem totam absolvere, ita admirabile magis futurum speramus, postquam explicaverimus, non aliud inditum salibus, quo Gustatum movere possint, quàm figurarum diversitatem & motum, quarum cum una in hac, altera in illa salis specie observetur apertissimum est, nec eodem modo, nec eandem ab omnibus imprimi passionem posse, sed determinatam à singulis provenire, cum sint & certi lævoris, & certæ asperitatis non sine statutis aculeis, aciebusque, ut superius expositum, à quibus in eodem organo eadem actio frustra expectaretur. Salium itaque natura quantum satis est in cute solummodo cognita, cum nihil excitando Gustui aptum detegatur, præter memoratam formarum varietatem nisi aliter se res haberet, exinde necessariò colligi videbatur, saporem non esse quid ipsis salibus superadditum, ab iisdemque diversum, quod accidens, aut qualitas sapida nuncupetur, sed determinatam passionem ab asperitatibus salium in instrumento Gustus impressam, saporum verò dijudicationem, passionis ejusdem perceptionem. Meditationi non parum auctoritatis conciliabat Plato hoc

M

ipsum

ipsum in Timæo apertè satis nec ineleganter exponens, hoc idem Archigenes apud Galenum sapores explicans nomine doloris: quia tamen novi ex Peripato plurimos ad hæc, aliaque hujusmodi uncis naribus nimium indulgentes ridere solitos, ut aliquatenus ab his caverem, mihi consulere statui Peripateticum ipsum, certus, si quid non ab simile ex ipso producerem, fore, ut digito labra compescerent, nec eam sententiam adeo absconam reputarent, quidquid enim ipse dixerit

————— *credent à fonte relatum*

*Ammonis, quoniam Delphis oracula cessant,
Et genus humanum damnat caligo futuri.*

Consului igitur, nec me fefellit spes, obtinui siquidem ab Aristotele (quid enim rerum omnium ditissimum illud seminarium suppeditare non potest?) quod maximè expetebam: reperi scilicet & ipsum in sensationibus affectioni organorum plurimum tribuere, imo actionem totam ipsis tantummodo demandare, adeò ut cum judicium ferimus de sensibili aliquo, id accidat non rarò, non eò quòd determinata qualitas in ipso sita est sensibus movendis apta, sed quoniam aut sensus ipsi super illam, aut eadem super sensus mota, vel determinatam passionem percipiunt ab eadem sic applicata proveniente, vel eò quòd eam non percipiant, qualem alias circa non ab simile corpus experiri assueverunt, judicant tale corpus esse ab alio diversum. Hæc potissimum explicat Aristoteles de sensibilibus communibus, ut appellant; quandoquidem iis recensitis, motu scilicet, & quiete, magnitudine, numero, & figura, addita aliàs unitate expli-

plicat, quo tandem modo illa à nobis discernantur, aitque, hæc omnia motu sentiri, nisi quòd quiescens dijudicamus, eò quòd non movetur, & numerum privatione continui. Idem esto iudicium de aliis ab Aristotele memoratis, quorum sensationem explanare, quia longius aliquantò, quàm locus expetit fortasse evaderet, manum continebimus, id solùm innuisse contenti, dictam de saporibus opinionem vel ab ipso Aristotele non ex toto damnari posse, cùm aliquid ab his parum discrepans ipse fateatur. Sed inquis, quæ recenset Aristoteles sensibilia communia sunt, quando verò apud ipsum ostendes aliquid simile de propriis? Hic verò ut missum faciam, adhuc me non assequi, quid tandem referat, sintne sensibilia propria, an communia; quando, inquam, ostendam? Ecce tibi, ut ex pluribus exemplis unum seligam in Meteorologicorum tertio tractationem de Iride: quid in arcu illo aspectu jucundissimi colores? vocat ipse Philosophus & absolutè Refractionem, & Refractionem visus ad Solem Iridem, hinc diversitatem illam colorum à visu per refractionem plus minus debilitato provenire docet, & consequenter nihil in nube reperiri, quod coloratum dici possit; & tamen excitatur sensus, & circa suum sensibile, proprium, verum, & reale sese versari existimat, quia eodem modo afficitur, ac in perceptione colorum permanentium, & quos veros communiter appellant. Quid ad hæc? Nonne color ad oculos tantummodo attinet? nonne colores Iridis fictitii sunt? nonne hoc est purum putum dogma Aristotelicum? Fateor, inquam, sed uti fictis imaginibus quales colores Iridis ad hoc evincendum non videtur ex toto satisfacere,

cur aliquid non depromis, quod verè existat, quod semper accidat, quod sit secundum constitutas Naturæ leges? Fictis ais? at ego non minus veros crediderim colores Iridis, quàm sint alii quarumcumque rerum visibilium, & si fictitii sunt, nonne eò magis urget argumentum? si enim & spectra, & fallaces imagines movere possunt nostras facultates, quantò magis eadem excitabuntur ad sensationem à corporibus, rebusque realibus. Sed & promamus aliquid ex Aristotele, quod realem habeat existentiam, quod ab instituto naturæ non recedat, quid sono magis usitatum, & familiare Naturæ? quid tu putas hunc existimat Aristoteles, & ubi ponit? Sonum in aëre produci negare non potest, credis tamen illi qualitatem aliquam injungit, per quam auditio absolvatur, dicaturque sonus? Tantum abest, ut hoc ponat, quod apertissimè testatur αὐτὸ μὴ δὴ ἀψοπον ὁ ἀήρ διὰ τὸ εὐθευ-
πθον *aër vero auribus inædificatus immobilis perseve-
rans in externi aëris à sua fragilitate cohibiti motio-
nibus sonorum differentias omnes exquisitè discernit.*
ὅταν γὰρ κωλυθῇ θρύπτεσθαι ἢ τέτρα κίνεσις. ψόφῳ δὲ ἐν τοῖς
ὡσιν ἐγκαταδόμηται πρὸς τῷ ἀκίνητον εἶναι, ὅπως ἀκρωδῶς
αἰσθάνηται πάσας τὰς διαφορὰς τῆς κινήσεως. Quid clarius?
Insonorum appellat aërem, qui tamen idem si moveatur, ingenitumque aërem impellat, sonorum omnium species repræsentat. Hic verò ullane qualitas, præter motum & secundum variam motionem soni varietas? Quid si motioni in aliis vocatis qualitibus adjungas figurarum multiplicem ordinem? nonne verosimiliter affirmari posset, sine aliis superadditis accidentibus rem breviter absolvi? Sed quidquid demum tenuerit Aristoteles, quemadmodum allata fu-

perius exempla confirmant, opinionem hanc de saporibus, ita nolim, reputet quispiam, sterilem adeo naturam esse, ut non ex aliis, quàm ex dictis, deduci possint argumenta hoc idem satis probabiliter evincentia; quot enim occurrunt passim experimenta, in quibus nihil observare licet, quod operando sit præter determinata corpora, & ipsorum certas duntaxat formas, non sine statuta pariter subjecti structura, & configuratione? Sic quid in menstruis Chymicorum, quid in spiritibus, in aquis regiis, quid denique vel in ipso igne deprehendas, quod & ad maximè actuosas particulas, & aptissimas penetrationi habitudines revocari non debeat, qui huic, illive corpori occurrentes per hujus poros aditum inveniant, per ejus verò non item, adeo ut hanc alterum, alteram verò illud subeat vicem? quæ illa qualitas in menstruo quodam, & aqua forti, cum aurum solidissimum metallorum sua spoliatur duritie, ita ut speciem liquoris induat, & per chartas extillet? quæ illa in nitri spiritu, cum nexum inter, aurum, argentumque simul conjuncta dissolvit vi nulla ignis exsolubilem? quid illa in halitibus vini, quod in cucurbita distillatur, cum ebur, Cornu-cervi, aliaque plurima dura corpora sibi exposita redigit in friabilem substantiam, quam à diuturno prunarum ardore vix habeas; quid illa in Oleo Vitrioli ignem extinguentis, linguam autem, carnemque gustantium adurentis? quid cum admisti invicem liquores vel aliquibus pulveribus affusi fervent, ut ebullit cum sibilo acidus Buxi Spiritus Sali Tartari admixtus, ut cum sibilo pariter ferventes confusi simul spiritus nitri & Cornu-cervi sese invicem pellunt fursum, ut fervorem exci-

tat cum strepitu conjunctum admistus Corallis acidus Limonum succus, fervore autem cessante dulcescit, quid inquam id rei est, & unde isthæc proveniunt tam in fermentis hisce chymistarum, quàm in vulgaris aliis vel ad vitæ conservationem, vel nostro malo ad ejusdem corruptionem tendentibus, quorum violentia non rarò

grex totus in agris

Unius scabie cadit, & porriginè porci

Uvaeque livorem conspecta ducit ab uva.

Si motum demas particulis, & superficies? Cur levissimum manus, vel alterius alicujus corporis contactum non horret frons, licet eundem adeo reformident & Globulus, & Pinnæ Nasi, & Myrtæ, & Alæ, & plantæ pedum, & quibusdam hypochondria, aliæque corporis partes ut vociferentur, & quàm longissimè fugere tentent, nisi quòd instrumentum illud tale est, ut in iis determinatis partibus sola sua figura, & motu talem passionem imprimat, quam in aliis, seu quòd magis duræ, vel molles, laxæ magis, vel compactæ, læves, aut asperæ, aut alias non absimiles condiciones habeant, producere non possit? Vides, quàm diversas operationes, seu passiones varia impellendi vis in partibus nostris producat: non ita commodo situ crura nostra teneantur modò stupefunt, quandoque dolore quodam adurente corripuntur, percutiamus violentius terram, restituimur ex toto: impingat ad durum aliquod corpus humeri cum radio, & cubito articulus, adeo aliquando totam manum invadet dolor, ut tantum non deficias: viventem adhuc torpedinem digitos inter attrectes, ita ipsius motus impellet manum, ut ossium facta quadam

re-

resultantia cruciatus superveniant per aliquod spatium temporis fortassè duraturi; vides hæc, & alia plurima ex te ipso cognoscere poteris, & ex singulis inferre, quantum non unus agitandi modus afficere sensus possit sine ulla qualitate superaddita, sine ullo accidente à mixtione elementorum deducendo. Non memoro, quod vulgatissimum est in cibis, quorum alii mihi nutrimento sunt, illi exitio, hominibus interitum, brutis vitam pariunt: neque pariter quod observatur in vocatis venenis non omnibus æquè infestis, quin & idem animali discriminis nihil adducentibus, si certæ parti applicentur, si verò alteri lethalibus, ut elegantissimè in observationibus suis circa Viperas notat accuratissimus, & eruditissimus Franciscus Redi; neque quod in aliis sensibus accidit, ut quidam odores, colores, sonitus arrideant aliis, aliis iidem sint graves, quoniam cùm occurrant undique innumera penè dixerim exempla similia, quibus explicandis simplex partium motus, & figura sufficiunt, non videtur id ulterius urgendum, sed concludendum potius, verisimilitudine non carere, si conemur universum etiam saporum negotium tali ratione explicare, talemque affectionem refundere in figuras salium per organum Gustatricis facultatis repentium, & cuspidulis suis ita titillantium, & si acutiores sint, & nimis penetrantes ita continuum dividendum, ut gratiosa, vel molesta resultet sensatio. Hinc explicatur optimè, cur impositis Gustatus organo solutis salibus tam citò feramus de sapore iudicium, cur una eorum substantia tot saporibus generandis apta sit, quemadmodum unus Chalybs innumeras edere operationes potest, prout diversimode aptatus, & conformatus est,

est, & cur iis Gustus afficiatur, & per quid ipsi sapidi nuncupentur, & nullam injungendam esse novam qualitatem, & observari naturæ ordinem, & inalterabile institutum per facilia, & breviora procedendi. Quàm insuper hujusmodi positio cum ipsorum salium figuris consentiat, & ex iis, quæ descriptissimus, & ex oculari observatione, & Gustatione demum ratum facere quicumque potest, adeo ut si & cætera defint, vel hoc unum sufficere posset ad statuendum id, de quo dubitatur, quare si me mutire nefas non est, ausim affirmare, ita se rem habere probabiliter: Itane vero? Nonne id est, & elementa rejicere, & eorum virtutes eludere, & mistorum generationem pervertere, & qualitatum vim nihili reputare, & quod majus est philosophiam confundere, & naturam ipsam sus deque miscere? Caveat universitas sibi, quò enim aliò tendunt specie quadam veritatis leviter obducta hujusmodi ratiocinia, quàm ut evincant, nullam dari posse qualitatem, neque secundam, neque primam, nulla elementa, nullam substantialem formam, quæ si concedantur, evanescit illico hujus aspectabilis Machinæ pulcherrimus ordo, & nihil certi habes, quod à mundi centro ad Concavam usque Lunaris orbitæ superficiem protendatur, unde generationes omnes, corruptionesque deducere possis, sed vagum quiddam tantummodo, & inordinatum, ex quo fortuitæ concretiones, dissolutionesque habeantur sine certo substantiarum numero, sine determinata agendi facultate, sine statuta operandi ratione, quibus quid inconsultum magis, quid rudius, quid Philosopho indignius, quid à veritate remotius excogitari potest? Hui! bona verba, inquam ego;
ex

ex his, quæ diximus, quisque ratiocinetur, ut libet, & conclusiones pro genio sibi fingat; mihi equidem adhuc non constat, tot, ac tantæne ex dictis deduci possint; neque enim is ego sum, cui vel ad unum, primumque obtutum tota, quanta est universitas, detegatur, sed postquam diu, multumque, & circum, & introspexi sæpius, id unum intelligo, quod omnium operum Dei nullam possit homo invenire rationem, & quantò plus laboraverit ad quærendum, tantò minus inveniat, ac etiam si sapiens dixerit, se nosse, non possit tamen reperire; quare cùm me docente Aristotele, satis sit, ad hypothese[m] possibile[m] rem deducere, & rationis simulacrum aliquod adornare, meas adimplevisse partes arbitrabar, si ex plurimis naturæ cognitionis operationibus sapes etiam ad earum similitudinem explicari posse proponebam, ex quo adhuc non video, quid immineat periculi & qualitatibus aliis, & mistis, & elementis, & philosophiæ, & naturæ; quemadmodum enim horum dignitatem, & potentiam fartam tectam servavit Aristoteles, licet in supra memoratis passionibus nullus elementis, & qualitatibus, sit locus, quid eadem timeant sibi, si illis accidentibus adjungatur sapor? Demum cùm Machina illa elementorum, mistorum, qualitatum, aliunde sit admodum stabilis, sollicitus quis esse non debet de ipsius ruina; utcumque verò sit stabilis, ut ingeniosa, ut naturalis, machina tamen est; at cùm quid absque machinis præstare possumus, cur ad ipsas frustra confugimus: Quàm verò simplex sit, & parabilis illa saporum exposita generatio, & perceptio, reliquis permitto judicandum. Non tamen eò quòd à salium figura sapor emanet, objicere

merito quis posset, nullum fore humiditatis usum in perceptione saporum, quam tamen necessariam experimur, hoc enim ut aliquatenus verum, si tamen requiritur ad communicandam fluxilitatem, & promovendam penetrationem per angusta Gustatorii instrumenti oscilla, quod ad dignoscendos sapores non ita parum confert: Sicut etiam quis non ita proficiat, si urgeat, eundem saporem à separatis salibus producendum, quem in compositis, à quibus ipsos eduximus, experiebamur, quod tamen ita se habere non constat; quandoquidem quæ huc usque de sale protulimus non eo sensu dicta sunt, ut saporum artifex ipse tantummodo sit habendus, sed ut intelligatur in eorum generatione maximum posse virtutem salis, cum hic, quamvis respectu cæterorum sapidum aliquid componentium mole minimus inveniatur, insipidum linquat compositum, à quo discernitur, nec inficiamur à cæteris componentibus ita rotundi, alterarique salis potentiam, ut alium à quibusdam concretis, alium ab eorundem separatis salibus saporem habeamus; quare cum neque postrema isthæc obiectio, nec aliæ ullæ propositam sententiam evertant, ad ea tandem deveniamus, quorum in gratiam superiora præmisimus.

C A P. VIII.

Linguae vulgata descriptio.

HÆC itaque de saporibus satis. Ut autem res absolvatur postquam de eorum natura, & operandi modo constitutum est, oportet, & partem illam
pe-

peculiarem designemus, quam Natura consultò fabricavit ad sapores dignoscendos. Et quoniam Gustatio in lingua maximè deprehenditur, æquum est, ut videamus, quæ tandem substantia ipsam componat, quibusque partibus coagmentetur, ut iis expositis expendamus, quænam ipsarum huic provinciæ possit sufficere. Primò autem quid alii in linguæ contextura observaverint, descripserintque hic proponemus, & consequenter quoniam non in eandem omnes de Gustus organo sententiam veniunt, sigillatim inferius ostendemus, nullam ex descriptis hætenus linguæ particulis Gustatui inservire posse, tandemque & descriptionem propriam, & partem huic sensui destinatam afferemus in medium. Omnes igitur in linguæ explicatione consentire videntur, partem hanc esse adinstar corporis humiditatem facile combibentis foraminibus undequaque perviam, undequaque permeabilem: sic raram, fungosam, spongiosam, & inanem appellat Aristoteles, quibus titulis cum omnia comprehendisse videretur, elegerunt alii ex iis unum, qui rem attingeret propius, & vel fungosam, vel spongiosam, vel his non absimilem dixerunt; sic spongiæ instar Lingua est apud fermè omnes Constantinum Africanum, Casserium, Columbum, Laurentium, Vigierium, Liddellium, Glacianum, Fernelium, Plempium, Sennertum, alios spongiosæ cujusdam qualitatis apud Meletium; fungosam legimus apud Carpum, Valverdam, Casulanum, Riolanum; prorosam asserit Titelmannus; in hoc inquam conveniunt Anatomici, Medicique non pauci, iique melioris notæ; Si vero ad introspectionem veniamus adeo sibi adversantur, ut adhuc certum quid

proferre non liceat, quod exactè constitutionem Linguae repræsentet. Ecce siquidem Aristoteles omnem linguam pinguedine spoliât, quoniam unum quodque pingue densum est, ipsam verò constituit raram; Aristoteli adstipulantem video Casserium: contra Meletius Linguam pinguescere pronunciat. Si de ipsius Natura Anatomicæ rei studiosos, & Principes consulimus, num glandulosæ substantiæ sit, num musculosam participet, num peculiari constitutione gaudeat, Glandulosam habebimus ex Galeno; glandulosam, & musculosam à Casserio; Musculosam tantummodo à Carpo, carnosam à Veslingio, Cordi similem à Vesalio, ejusque pedissequo Platero; variis contextam fibris à Fallopio, Lingualibus ex muscularis fortassè conflata à Spigelio, quid ex plurimis confartum substantiis ab Arculano, & propriæ spongiosæ carnis contextum à non paucis; iisque vulgarissimis medicis. Si admirabilibus, celerrimisque linguae motibus observatis scisciteris, unde tanta proveniat velocitas, & diversitas motionum, non deerit Casserius, qui respondeat, tantam multipliciter, & celeritatem à musculis haberi non posse, nec voluntariam existimandam, cui subscribens Riolanus nihil esse cum lingua, & locutione, nec ejus agitationem per musculos haberi, sed ipsam ad masticationem solùm, & deglutionem spectare: quin & Curtium hæsitantem videmus, quoniam si motus omnis voluntarius per musculos habetur, sese contrahentes, nullum habemus musculum, qui linguam possit exercere, ideoque motum, alium oportebit admittere; post quæ fatetur tamen utrobique angustias reperiri. Si verò de numero musculorum interrogas, sexdecim

recensebit in lingua bubula Pelops apud Galenum; quinque paria in Simia Galenus ipse; novem in homine Musculos Vesalius, quinque ad utrumque latus Valverda; utrinque tres, aut quatuor ad summum Fallopius; tres tantummodo hinc inde Casserius; in universum Spigelius duodecim, decem Laurentius, & cum eo jam communiter totidem numerabunt Veslingius, Caspar Bartholinus Pater, & Thomas Filius, Styloglossos videlicet, utrinque unum ab externa Styloidis superficie in linguæ latera; Myloglossos ad Molarium dentium radices è maxilla inferiori in linguæ basim sub ligamento; Geneoglossos ab interna medii menti superficie in mediam linguam; ex superiori Hyoidis parte media Basioglossos altius in linguæ latera; ex Hyoidis cornubus ad latera pariter, sed ad radicem Ceratoglossos. Nec una, si advertamus, erit de hujusmodi partis involucris opinio; concedit enim duas Linguæ tunicas Vesalius, alteram anteriorem musculis communem; posteriorem alteram Buccis, Palato, Asperæ arteriæ, Oesophagoque superextensam; non unam Constantinus Africanus, quot autem non exponit; unam Mundinus, Carpus, Valverda, Fallopius, Platerus, Laurentius, Guintherius, Riolanus filius, quorum hic à Dura Matre, Valverda autem cum Vigierio, Perdulci, pluribusque aliis ab expansis, explicatisve tertii paris nervulis eandem deducit; iisque omnibus accuratior Whartonus exteriori tunicæ quandam substernit Pulpam. Quid de ipsius usu commemorem? Linguam dicet Vidus Vidius de re medica optimè meritis civis meus proprium gustus instrumentum; & naturam ipsâ ad loquelam; & deglutionem abuti, non verò in hujus

gratiam esse fabrefactam, cum loquela nihil ad bene, tutoque vivendum faciat, & si è contra omnino necessaria gustatio. Vidio adversabitur ex toto Riolanus asserens, proprium vocis dearticulatæ, seu locutionis organum Linguam esse, cum tamen audenter affirmet (quis autem id credat?) visos à se homines, evulsis miserabiliter linguis, adhuc loqui, & puerum speciatim è Pictonum regione malignis variolis adeò vexatum, ut linguam totam exspuerit absque vel minimo locutionis detrimento, quibuscum convenientes historias (si hujusmodi titulo dignæ reputantur) non ineleganter ad prodigiosas operationes revocat Paulus Zacchias. Alii me quidem iudice sapientius, iidemque non pauci pluribus linguam substituunt muneribus, & deglutionem, & masticationem, & vocem, & Gustum ejus ministerio perfici asseverant ita naturæ insistentes, quæ pluribus præstandis unicum non rarò accommodat instrumentum: in eo tantum illi inter se discrepant, quòd non æquè omnes idem constituunt Gustatus organum, sed alii cum Guintherio, Fernelio, Varandæo nervos recensent; alii cum Casserio, Gregorio Horstio, Mercato, Sennerto spongiosam carnem tenent; alii externam tunicam arbitrantur in magis vulgatam opinionem declinantes, & à Mundino, Valverda, Spigelio, Vallesio, & quamplurimis eruditissimis viris propugnata; & unus quòd sciam semel, iterumque laudatus Whar-tonus Gustandi munus tribuit primario Tonsillis per omnes, ubi Gustus perficitur, partes extensis. Consultò hic prætermittitur & quod de nervis motoriiis, & de sanguineis vasis, & de frænulo, & de lato ligamento, & de Amygdalis passim, & unanimiter habent

bent Anatomici, sicuti pariter & de vasis salivalibus ad frænulum hiantibus, qui non nostris hisce temporibus prodeunt in lucem, sed vel ipse Carpus, & Achilinus, latius ille, hic autem contractius descripserunt; & de foraminibus Tonsillarum, è quibus saliva, & mucus excernitur Avicennæ, Galenique ætatibus plusquam compertis; quæ enim de lingua æquo fortasse fufius recensuimus, ideo tantummodo explicata sunt, ut videlicet evidentius constet, quid alii in linguæ structura deprehenderint, quod ipsi Gustus instrumentum haberi posse judicaverint. Itaque cum satis pateat, nihil usque adhuc in lingua deprehensum, quod ad Gustationem conducere posse reputatum sit, præter vel spongiosam carnem, vel superextensam tunicam, vel dispersos nervulos, vel ad basim positas glandulas, & hoc solum cognoscere nostro fuerit animus, præter ordinem, & propositum esset de salivæ canalibus aliisque tractationem aggredi, quæ nihil lucis, aut utilitatis afferret, & nullo modo cum iis, quæ sunt præ manibus cohæreret. Age itaque, & singulis capitibus singula Gustatus reputata organa consideremus.

C A P. IX.

Gustus Organum non est in parte Linguae carnea.

OPINIONEM hujusmodi meditati mihi plurima occurrebant, quæ ipsam falsitatis arguere videbantur: diu tamen, multumque hæsitavi, præcipuè quia vel ipse Aristoteles in hanc declinat partem, cum multis in locis apertissimè pronuntiet, & Gustum esse

ta-

tactum quendam, & organum tactus esse vel carnem ipsam, vel quid carni proportionale. Quapropter cum varia & ratiocinia, & experimenta suppeterent mihi, quibus Linguae carnem non esse Gustatus instrumentum confirmarem, nec quo tandem modo eadem diluere possem, agnoscerem, & sensum insuper testimonio confirmatum haberem, aliud quiddam à carne admodum diversum fabrefactum à natura, quo tanquam instrumento ad suas operationes exercendas Gustatrix facultas utitur, non indignaturum Aristotelem satis fidenter in animum induxi, si ejusmodi opinionem non ita veritati consentaneam dicerem palam faciens, quibus motus rationibus ita pronunciare non dubitem. Primò itaque linguae substantiâ diligentius observatâ, ut deprehenderem, num in ipsius carne peculiare quicquam lateret, nihil invenire datum fuit, quod in quibuscumque corporis nostri, cæterorumque animalium musculis non habeatur, seu velis tunicas, sive nervos, sive arterias, sive carneas fibras, quæ omnia cum inter se convenire patentibus oculis animadverterem, cur, inquam, si carnea linguae pars sedes est Gustationis, eundem sensum non experimur in reliquis carnosissimis partibus, sed in his concessum est, dolorem tantummodo ab impositis solutis salibus pati, non autem sapes dignoscere? Certè cum eodem modo omnes hæc substantiæ conformatæ sint, cum idem sit corpus sapidum, quod applicatur, percipi posse non videtur, cur in lingua unam, alteram autem multò diversam in aliis musculosis partibus experiri debeamus. Sed ejusdem, inquis, naturæ linguae caro non est, ac cæterarum partium; illa siquidem spongiosa est, & penetrationem facillimè concedit
su-

superimpositis substantiis ; alii autem muscoli applicata corpora sua densitate constanter excludunt. Esto, lingua porosa est ; suisque foraminibus excipit sapidam humiditatem, quid inde ? ex hocne inferas Gustationem in Linguae carne perfici solummodo, quia pervia est ? Id equidem nunquam ipse crediderim, quid enim laxius, & magis spongiam referens, quam animalium pulmones ? ergone gustabunt quamvis spongiosi ? Nonne autem id est sensum opinionis pervertere, quæ nulla foraminum commemoratione facta ponit Gustandi vim in carne, adeoque ad summum pori necessarii existimari debebunt, ut sales pervenire possint ad musculos, sed hoc nonne & in aliis partibus haberi potest ? & de facto habetur quotidie, cum sudor effluit è corporis nostri poris, qui, quamvis sapidus, nullam in carne, per quam fluit, imprimit sapiditatem. Deinde ubinam quæso tam decantata isthæc linguae substantia spongiosa, sive fungosa, sive quomodocunque ad laxitatem indigitandam appellitur ? Maximè oculorum non minus, quam mei animi hebetudinem doleo ; quamvis enim utrorumque obtutum defixerim attentissimum, nihil unquam inspicere aliud licuit, quam fibrarum quandam telam nullo modo dissolubilem alios musculos excedentem potius, quam cedentem densitate, ubi proinde isti pori, isthæc foramina, ista caro spongiosa ? sed non de carne ipsa intelligendum subjicis, verùm tantummodo de involventibus membranis, ita scilicet ut hæc propter laxitatem suam expeditissimè transmittant ad substratam carneam massam superexcurrentem humorem saporum nuncium. Quod si ita respondes, nonne adhuc urget superius expositum ratiocinium ? Si-

quidem vel te ipso testante nihil aliud confert laxitas membranarum, quàm ut pervadat humor ad carnem, ac proinde ad quamcunque carnosam partem ipse derivetur, eundem sensum procreabit. Hoc autem ut missum faciam, num dices, requiri peculiare tunicas, quæ sint linguæ solùm, nec aliis partibus superextensæ? Ut quidquidlibet promas, cur ejusmodi placitum hac interpretatione detorques? & hanc quomodo confirmas? Et ut ista præteream, ecce si tibi sponte concederem, determinatas membranas expeti, nonne eadem est, quæ involvit linguæ corpus, & quæ Buccas, & Labra succingit, & universam oris cavitatem? His verò partibus nonne hærent undequaque muscoli ejusdem omnino naturæ, ac linguales? cur inibi nullum Gustum experimur? quid ad hæc? Negabis experientiam, & sentiri affirmabis? sales admove, & quid id rei sit, certo certius agnoscas? Num instabis, humiditatem ab oris internis lateribus statim effluere, non autem inhærere, ita ut imprimere saporum speciem nequaquam possit; linguæ verò leniter superaffluere, adeo ut etiam non mediocriter influat? Verissimum equidem effatum, nam saliva utpotè gravis, nec ad buccas, nec ad palatum diu suspensa manere potest, nisi cohibeatur, si tamen id, quod exinde deducitur, bene procederet, nonne absterfo linguæ humore nullus saporum sensus produceretur? & tamen, ut dictum superius est, si à lingua humiditatem, quantum licet, elicias, salemque aliquem (Ammoniacum adhibere mihi mos est) eidem admoveas, saporem, quamvis non exquisitissimum, observabis. Insuper unde fit, ut in superiori Palati parte citra Gargareonem satis distinctè

gu-

gustemus, licet inibi tenuissimum humiditatis velum immorari possit, & nulli carneæ substantiæ ipsius tunica superinfernatur, sed glandulosæ potius? Cur si caro Gustatricis facultatis instrumentum est, non in universa lingua hujusmodiensione gaudet, sed sub apice usque ad frænulum, ubi tenuissimam tunicam habemus, nullum, in superiori verò pariter nullum, aliquibus, aliis verò mediocrem creat, in apice autem, & ad latera exquisitissimum parit? Nonne ubique ejusdem naturæ caro obvolvitur, nonne eadem membrana, nonne humiditas eadem? Unde in tantula nostri corporis particula tanta effectuum diversitas? An non vel minimum cuique attendenti patet, ad linguæ radicem, ubi Amygdalæ, saporum sensum excitari, quamvis ibi neque caro reperiatur, & primo aspectu glandulosa illa corpora potius salivæ separationi, & excretioni destinata videantur, quàm saporibus dijudicandis? Sed quid ego prætereo maximam illam celeritatem, quâ momento citius imposita linguæ sapida composita sui saporis speciem facultati repræsentant? Tenendumne ita velociter à salitis corporibus perrumpi non ita tenues linguæ membranas, ut ingesto sale tantum non in instanti ipsius sapor discernatur? Et si hoc admittere quis non renuat, cur citius, exactiusque sensus hic excitatur in linguæ apice, & lateribus, ut dictum est, ubi membrana multò sunt crassiores, & compactiores, quàm aliis in locis, ubi crassæ minus, & minus densæ? Non hic commemoro, quæ subicere possem, innumera penè ratiocinia, quæ cuicumque meditati res ipsa suppledat; placet enim potius insistere sensibus, & ea paucula, indubia tamen, excerpere, quæ accuratior

experientia demonstrat, & hanc oculatissimam ducem sequi, quàm illam si oculatam, non rarò equidem cæcutientem. Miror interim maximopere, quomodo factum sit, ut magnæ auctoritatis, & doctrinæ viri aliàs mordicus defendentes omnium externorum sensuum operationes ad internos nervorum ope derivari, Gustus tamen judicium Carni concedant nihil communis habenti cum cerebro, sed cum ossibus tantummodo, & membranis, quibus alligatur: miror inquam; nam quamvis instent, id exinde per nervos exigi; nisi impressionem aliquam recipiant, non poterunt communi sensui, & aliis repræsentare id, quod nunquam agnoverunt: si verò quid patiantur; cur in scenam advocâre linguæ carnem, ut hæc cum nervis operetur, quod ex seipsis præstare possunt? Ex seipsis? Quasi scilicet ad habendam gustationem necessariò non requiratur humiditas, nec hujus expertes omnino sint nervi, nec eandem congenitam habeat caro, ita ut sit ejusce humoris conceptaculum. De humore jam superius locuti sumus, num hic nervis communicetur, an secus, nec confirmatum video, nec urget necessitas, ut quicquam proferatur. Linguæ carni ingenitum humorem esse, mihi non constat, sicuti etiam me latet, quomodo id investigare potuerit Casserius, qui is ipse est, qui sic instat, & potius si quid concludi potest ex iis, quæ circa linguam consultò notavi, contrarium evincitur: extimam videlicet superficiem quoad licuit absterfi, linguâque deinde compressâ digitis, ne guttulam quidem humoris exprimere potui, & hoc tam in demortuis, quàm in viventibus animalibus, unde certior sum factus, non modò nullam humiditatem in lingua

con-

contineri, sed nullos ad ipsius superficiem hiare salivæ ductus, de quo antea dubitaveram. Quodsi adhuc dubites, objiciasque, consuetus naturæ mos est, quasdam valvulas incertis animalium partibus admirabili artificio fabrefacere aditum quidem permittentibus, exitum autem impredientibus, cur ergo suspicari non liceat, in memorata linguæ expressione nihil exsudasse, eò quòd ita valvulæ in canaliculis illis ita dispositæ sint, ut concedant adveniienti extrinsecus humori transitum ad intimam linguam, ex hac autem in exteriora non item? Vide quid dicas, & quid exinde consequatur: Siquidem ne nimium in hoc immorer, & moneam dumtaxat esse id purum putum figmentum, & nihil præter suspensionem, si res ita, ut fingitur, se haberet, diu, multumque nos idem afficeret sapor, & omnia, quæ ingeruntur eundem repræsentarent, quandoquidem cum adveniienti extrinsecus sapido liquori valvula regressum prohibeat, nonne id in innata carni humiditatem eandem producet impressionem, & caro consequenter semper eadem affecta qualitate judicabit cibos omnes unius, & ejusdem saporis? Quod si ratio non suadet, oculos, & manus admove, observabisque, non magis nudam esse linguæ carnem, quàm aliarum sit partium; quod ut ipse clarius deprehenderem ab animalis faucibus statim à pastu suspensi linguam avulsi (maximè enim tunc temporis, quo mox à gustatione cessaverat par erat ut madesceret carnea linguæ substantia) separatisque membranis, (quod me stupente facillimè peractum) nudam musculosam partem introspexi attentius, nec humiditate scatentem vidi magis, minusve, ac sit genus omne musculorum; cæterum sufficit humiditas,

quam saliva suppeditat. Quid igitur? Gustatio per linguæ membranam habebitur; si ei muneri ineptam reputamus linguæ carnem.

C A P. X.

Non in Membranea.

AT ne in membraneo quidem ejusce partis integumento Gustatricis facultatis organum reperiri satis probabiliter evincere confidimus. Quoties mecum ipse perpendi summam illam velocitatem, quâ sapes apprehendimus, semper arbitratus sum, argumentum inde desumi posse iis maximè favorabile, qui in extima linguæ tunica sapes discerni asserunt, neque enim aptior videtur locus, quàm summa linguæ cutis, ut statim ab impositione sapidi corporis de tali qualitate judicemus, unde parum abfuit, quin & ipse pariter in eam sententiam descenderem. Re autem consideratius aliquanto pensitata, visum est, summam illam in percipiendo sapore celeritatem posse quidem concludere, Gustatus instrumentum verosimiliter haberi in superficie linguæ, sed huic provinciæ membranam perficere tentanti mihi obstabant non invalidæ rationes, ita ut coactus fuerim ab instituto recedere, & affirmare solùm, quid in linguæ prima facie data opera fabrefactum ad judicandos sapes, at non Membranam. Primò itaque occurrebat consideratio hujus linguam involventis tunicæ, quam si huic operationi destinasset natura, cujusdam peculiaris substantiæ membranis cæteris non communicatæ fabrefecisse congruum videbatur, nec ad alias extendisse partes:

tes: utrumque autem non ita se habere animadvertēbam, nihil scilicet inter linguæ, & involucra aliarum partium discriminis intercedere, & insuper hac non indui linguam solam, sed interiorē oris universam capacitatem, & labra, & œsophagum, & ventriculum, & asperam arteriam succingi, adeo ut una, eademque tunica linguam involvens omnibus etiam hisce partibus superextendatur. Quæ cū omnium anatomicorum auctoritate, & experiētiā confirmata ita se habeant, unde est, quòd num corpora sapida sint, an secus, & si sapida, quo sapore prædita Lingua solummodo discernit, non autem aliæ partes, quibus eadem tunica communicatur? Admove fales, & salivam fale quantumvis prægnantem labiis, nihil sentis, præter contactum: madescat eadem Buccarum superficies, idem prorsus accidet, quod in labris; idem de gingivis, aliisque dicendum est. Quin nonne hujus tunicæ portio totam Palati concamerationem incrustat? Sed hujus medietas, qua labra respicit nihil sapidum patitur, & ea pars, quæ citra uvulam Linguae radici imminet Gustatione gaudet satis bene. Sed quid de Lingua ipsa commemorem, saporem non undequaque dignoscente, ut dictum est? Quid habet peculiare portio illa membranæ ad frænulum usque sub apice, ut Gustationem obire renuat, sicut & in linguæ planitie modò nullam, modò obscuram præstat? Cur in apice ejusmodi sensationem habet, & in lateribus, quæ si liberis oculis observentur, aut ut clarius, quid id rei sit, detegatur admota crySTALLINA lente tantum abest, ut tunicam repræsentent, quod potius quandam substantiam offerunt à linguæ natura, & membrana qualibet admodum diversam, quam

in-

inferius explicabimus? Cur ad Tonsillas etiam accidit sensatio, & quid iis indulsit Natura nobis incomptum, quo mediante ipsarum tunica ea possit cognoscere, quæ eadem membranâ donatæ cæteræ partes deprehendere nequeant? Cur, si ita se res habet, gustum & ad Lingulam non experimur, quam superelabi cibos in deglutitione necessarium est eorum ope sic occlusa aspera arteria? Cur idem etiam non sentit cum œsophago ventriculus eadem tunica participant? Non dicas autem ad ventriculi os talem sensum accidere; accidit enim ibi sensus, at non saporis, sed doloris intensissimus, sic quàm misere afficit Cardialgiacus affectus, & quàm diu, quantumque cruciamur, cùm nimis avidi cibum plus æquo calentem ingerimus; vel cùm impulsus aliquis eandem partem violenter impetit extrinsecus, quibus vel deficiamus, vel etiam aliquando perimus; adeo exquisiti sensus est nerveus ille contextus in œsophagi, ventriculique confinio. Sed nonne ventriculus ingesta quædam ita averfatur ut ad nauseam excitatus eadem ejiciat per vomitum? Nonne hoc evidens argumentum in eo procreari saltem rudimentum aliquod saporis, qui si injucundus sit, nullo modo amplecti ipse velit ejusmodi cibum, nec concoctione perficere? Nequaquam id ipse crediderim, sed quemadmodum nos quotidie, & sæpissime experimur, quædam tactum nostrum allicere, quædam verò adeo cruciare, ut ab ipsis omnino abstineamus, id in ventriculo etiam eodem modo contingere affirmaverim, ita scilicet ut determinata corpora ita ipsius nervos, membranasque titillent, ut ex necessitate eadem sese contrahant irritatæ stimulis illis, impulsusque per eam contractionem cibus red-

reddatur per vomitum. Ergo, instas, quemadmodum molestiæ sensus ventriculo conceditur, non erit idem jucunditatis sensu destituendus, quem tunc exerceat, cum ingesta amicabiliter retinet, degeritque, quod etiam innuere videntur insignes illæ nervorum propagines, in quem enim alium usum datæ, nisi, ut ventriculus suavia ab insuavibus discernat? Molestiæ, ut sic & ipse loquar, sensum, qui ventriculo concedi potest, ne rem plus æquo scrupulosius examinare videar illum eundem puta, qui jucunditatis; neque enim in sensus organo solum, sed quandoque etiam in corpore, quod sensui admovetur, radix est suavitatis, & insuavitatis, ut patet; ex his verò quid aliud inesse ventriculo concludas ultra tangendi vim? Prætereo istam delectationem à nobis, dum cibum continemus, non percipi, sive quòd non attendamus, sive quòd propter assuetudinem insensilis evaserit, sive quòd verè nulla sit eo prorsus modo, quo nec delectamur, nec tristamur, dum plurima contrectamus; tenemusque (nisi gratiosam appelles sensationem, quæ ingrata non accidit) cibus verò interim concoquitur, eò quòd in ipsum ita cohibitum ille succus digerens operatur, quem fortasse suspicari liceat in ventriculi cavum derivari è nervis, quando ii ad motum peristalticum non faciant, nec sensui inserviant, quorum alterutrum, vel utrumque licet præstarent, adhuc stare posset rationabilis illa suspicio. Ut verò hæc missa faciamus, quid ad illam diversitatem partium in ore contentarum, quarum aliæ, quamvis omnes eadem tunicâ circumcingantur, distinguendis saporibus aptæ sunt, aliæ secus? Nonne satis apertè demonstrant, quod intendimus? Arguunt quidem

aliquid; dubitare tamen fortasse quispiam posset, num in iis partibus diversam habeat membrana crassitiem, ita ut hac mediante non omnibus in locis gustus excitari possit, sed in iis tantum quæ determinatæ crassitiei tunicâ involvuntur, quales supra recensitæ partes habendæ erunt, si constat experientia, sapores ab iis dignosci. Dubitare equidem quicumque potest, imò quicumque veritatem amat par est, ut dubitet, ita enim ad ipsam progredimur aliquando assecuturi: hæc tamen dubitatio quanti momenti est? Partes illas gustantes hoc determinatæ qualitatis involucro tegi, & gratis asseritur, & falsum est, ut cuilibet manum admoventi patere facile potest, & ut ultrò id concedam, ne diutius hæream, credisne, eò quòd in diversis ejus membranæ locis diversa crassities reperiantur, ideo hic, non alibi Gustus emergat? Vel tota membranæ substantia huic operationi idonea est, vel aliqua solum ipsius particula: si universa, quid refert, num crassior illa sit, an subtilior? siquidem ubicumque sapidum corpus applicaveris, gustabit: Si verò determinata solum portio, quænam illa? ubi posita? non in superficie, ita enim crassitudo nihil juvaret, nihil impediret: ubi igitur? in profunditate? Sed sint membranæ omnes in plurimas tenuissimas membranulas divisibiles, & consequenter altitudinem habeant aliquam, quis tamen adeo perspicacis obtutus differentiam advertat inter laminulas propè membranæ extimam superficiem separatas, & separatas circa medium, aut finem? Ita diverticula quærunt sibi quotquot isthæc, aliaque similia, quæ nec ratio, nec sensus assequi potest audacter effutiunt, ut interim imminenti periculo sese subducant. Sed non sint isthæc

hæc diverticula , & numeris omnibus absoluta ratio-
cinia existimari debeant , nonne si per linguæ tunicam
Gustatio perficitur supervacaneum opus aggressa na-
tura est in salivalis humiditatis productione , & deri-
vatione ad os , per quam sales separantur ? quando-
quidem si puri soluti sales linguæ imponderentur, nul-
lus in hoc usus esset salivæ , & nulla ejusdem necessi-
tas ; videretur enim secutura gustatio , quando salium
particulæ tangerent , afficerentque Gustatus instru-
mentum ; & tamen , ut jam innuimus , obtusus sen-
sus , & imperfectus producitur exsuccâ linguâ , non-
nisi adveniente humiditate ad exquisitum redigendus.
Quale hic supertugium ? Fortasse applicare purum ,
& separatum sal non esse ex instituto , & necessitate
naturæ , sed cibos ingerere ex pluribus substantiis
conflatos , inter quas & salina lateat nonnisi mastica-
tione , & humore separabilis , ac proinde non temere
consultum , ut saliva in oris capacitatem è certis ca-
nalibus emanet ? Partim hæc ego concesserim , & ul-
trò admiserim , & comminutionem cibi , & humorem
ad educendos sales exposci : difficultas tamen aliò
spectat , videlicet non constare , cur exactus saporis
sensus non confurgat ab imposito simplici sale tunicæ
linguæ , si per hanc sentimus , quoniam hic nullum
jam est opus aut masticationis ; aut solutionis : quid
verò refert , sitne id ex naturæ consuetudine , an ex
hominum placito ? Insuper quem in membrana locu-
lum assignabis , quin penetrans sapor per multas ho-
ras occupet , imo in ægris ad plures dies ? qui ali-
quando ita hæret tenaciter , ut quamvis diù , mul-
tumque linguam universam laves , relavesque , tamen
haud possit ablui , & vim suam exercere pergat , quo-

usque tandem educitur, & aut deglutitur, aut expuitur? Quid in prætenui tunica monstrabis, quod sales tanto tempore cohibere possit, altè sepelire, arctèque colligare, ut vel aquæ non concedat aditum, ut fecum trahat affixum saporem? nisi fortasse respondeas, diuturnum illum ejusdem saporis sensum aliunde provenire posse, nec esse necessariam salis realem inhæSIONEM; quod quia sua verosimilitudine non caret, quid hoc admissio membranæ inest, cujus ope ipsa gustando sit? Quid tandem inest? quasi videlicet indumento quodam non vestiatur lingua, quod nihil aliud est, quàm nervorum expansio per universam superficiem, & inauditum sit, & monstrosum nervis inesse vim sentiendi. Et tu igitur accedis afferentes à nervis exoriri Linguæ tunicam? Ego vero id nullo modo veritati consonum arbitror, nec quicquam communionis interesse censeo inter Linguales nervos, ejusque membranam, & quamvis nervea Linguæ tunica supponatur, credis igitur, ipsam proinde gustaturam, & nervos in tunicam, & quomodocunque dispositos capaces esse Gustationis? Ipse quidem negaverim, sed videamus.

C A P. XI.

Non in nervea extrinsecus vellicata.

QUONIAM igitur eò jam redacta res est, ut in præsentī inquiramus, sitne Gustatricis facultatis organum in nervis constitutum, posset hujusmodi quæstio in duas dividi, ita ut altera perpenderet, sit ne illud in reputata nervea Linguæ membrana, altera

an in nervis per substantiam repentibus , ut aliorum opinio est. Utramque tamen in unam coaptabimus; eadem enim argumenta utramque impugnare videntur, & ex æquo impetere tam defendentes tali muneri destinatam esse nerveam linguæ contexturam extimam, quàm propugnantes eam provinciam esse penes nerveos furculos per interiora dispersos: Siquidem sive nervi intus lateant, sive superficiei insternantur, non possunt sapidis corporibus occurrere, nisi propria exterioris tunicæ superficie, cum distributi per linguam sint proni, ut ita loquar, & extensi; quare cum ubilibet eandem sortiti sint positionem, talemque, ut extrinsecus tantummodo affici à sapore possint, si hoc in capite evicero talem extrinsecam affectionem Gustationi perficiendæ ineptam esse, arbitrabor iis omnibus imposuisse silentium, quorum constans hætenus opinio fuit, per eas sic dispositas partes eandem obtineri posse. Hic igitur non contendimus à gustandi munere nervos relegare, sed solummodo requiri certam ipsorum posituram, qua mediante sapores velint nolint ex necessitate cogantur afficere certam quandam eorundem particulam, & nervorum situm usque adhuc ab Anatomicis animadversum non eum esse, quem necessitas expetit. Hæcque certo certius est, quibuslibet membris communem quandam virtutem inditam à natura, per quam & calidum, & frigidumque quid esse dicimus, & humidum, & siccum, & durum, & molle, & asperum, & læve, & si quæ sunt alia, quæ ex eo tangibilia nuncupentur, quod talis potentia isthæc dijudicans tactus à nobis appelletur: constat etiam evidenter quasdam ab eadem natura selectas partes, quibus

non solum tangendi vim inesse voluit, sed hanc ultra facultatem ingenuit aliam, per quam accidentia quædam à vocatis tangibilibus admodum diversa distinguimus, ut colores per oculos, & cætera, quæ in compositis qualitatibus differentia, cum jam communiter deprehendi dicatur, per diversas sensuum nervis factas à sensibilibus impressiones, arbitrari quis fortasse posset, hic unam, alibi aliam sensationem elici, vel ob diversam objectorum applicationem nulla supposita discrepantia in instrumentis sensuum, vel ob variam sensuum fabricam eadem applicatione supposita, vel & ob differentiam in constitutione sensuum, & simul in objectorum applicatione, quorum singula, ut uno ex innumeris exemplis illustrem, vides, quicumque titillationem horres ab eodem corpore, prout diversimode admovetur modò contactum solum, modò verò affectionem vellicantem in eadem parte produci: vides insuper corpore diversis partibus eadem ratione appposito hîc titillationem, inibitactionem emergere: vides denique hanc passionum diversitatem tum etiam haberi, cum & diversa ratione, & diversis partibus idem corpus applicatur. Ut autem isthæc omnia ad rem nostram traducantur, compertissimum cuique est, Linguam inter eas partes recenseri, quæ non tangendi facultate solum gaudent, sed obtinent insuper aliam potentiam, qua circa determinatas compositorum proprietates versantur, & discernunt, & hæc in Lingua Gustus dicitur, id autem, circa quod exercetur, saporis nomine venit: hic verò cum superius ostensus sit à salibus proficisci; illud modò negotium faceffit, qui nimirum fiat, ut hujusmodi sensum Lingua solummodo experiri debeat,

fi

si præstat id per nervos secundum vulgatam descriptionem dispositos, quando omnino similis eorundem distributio in quibuscunque partibus reperitur; videretur enim eadem ubilibet affectio secutura, cum ubilibet idem sese offerat instrumentum; quare cum id non accadat, sed à salibus aliud in lingua, aliud in membris cæteris patiamur, & superius dictum sit, sensationum diversitatem aliquibus ex iis tribus conditionibus procedere, si hic ostendero, quòd eo Gustus organo supposito deberet eadem ubicumque sequi sensatio, cum illæ determinatæ conditiones ubicumque præstari possint, ostensum satis arbitrabor nervorum vulgatas propagines non esse Gustatus instrumentum. Et primò si verum est, sensationum diversitatem in eadem parte oriri ab eodem corpore, prout hoc diversimodè sentienti particulæ admovetur, hîc diversas passiones producendi modus explicare non potest, cur sola linguæ nervea substantia ei affectioni, per quam sapores discernimus, idonea sit, aliæ verò nequaquam quarumlibet partium; nam cæterorum membrorum & linguæ cutis vel sunt ejusdem, vel diversæ naturæ: Si diversæ naturæ sunt, jam meritò dici non poterunt una pars, quemadmodum dici possent, si eandem participarent substantiam, cum nil referre videatur, sintne uni, an alteri membro circumducta, & sic ad rem nostram id non faciet, qui eandem partem supponimus. Si verò integumenta quælibet nihil differunt, quoties libuerit, licebit de saporibus non linguâ solùm, sed reliquis quibusque partibus judicium ferre; quoniam si digitis ex. gr. eodem modo salem aptemus, quo linguæ, dum gustat, aptatur, non est, cur Gustatio sequi non debeat, cum

ea-

eadem nervea membrana eodem modo afficiatur : & tamen quis nescit , Gustationem uni linguæ concessam esse , negatam omnibus aliis ? Nec quicquam proficias , si velis altius esse penetrandum , ut sapores aliis membris gustemus ; quantumvis enim penetres , tale nihil senties , ut cuilibet facile patere potest , & ipse non semel expertus sum meo malo , tum videlicet , cum me non advertente incisus etiam non ita summa cute digitis impactis consultò salibus nihil , præter maximè cruciantem dolorem deprehendere potui. Deinde nonne id est amittens discrimen aliquod inter hæc membra ? Fateor id quidem , inquis , & libentissimus fateor , proindeque dixerim potius , ideo nervos unius Linguæ Gustantes esse , quia determinato quodam modo fabrefacti sunt , vi cujus compositionis in ipsis una , in aliis verò nervulis alia ab iisdem salibus eodem modo contingentibus oriatur affectio , quarum illa Gustatio à nobis nuncupetur. Et ipse pariter aliquam differentiam in nervis non invitus admiserim ; quòd tamen hac una fieri possit talis , ac tanta sensationum discrepantia non ita facile adduci possum , ut credam , cum non videam , quid per hanc haberi possit eodem objectorum contactu supposito , præter eundem sensum plus minus exquisitum ; discrepet enim nervea linguæ natura à nervea manus crassitie exempli gratia , & sit illa crassior : vel ad sensum excitandum sufficit , ut sensibile corpus per superficiem tantummodo moveatur , vel inter utrumque nerveæ telæ stamen penetrare debet , vel ipsa filamenta quodammodo incipere , ita ut exinde sequatur divisio illa continui , quam dicunt : Si motus in superficie satis est , jam nil referre videtur , sitne membrana

cras-

crassior, an subtilior; Si penetrandum est per poros tunicæ, quoniam membrana crassior ex pluribus membraneis lamellis constat, quam tenuior fiet, ut eundem sensum exquisitiorem patiatur repetita in iis singulis vellicatione, hæc autem experiatur obtusio-rem paucioribus conflata: Si incidendi nervei funiculi, nonne id in omnibus exerceri potest? Quod de crassitie dicitur adhibe raritati, aut densitati membrana-rum, & quibuscumque aliis, quibus differre possunt inter se tunicæ, mutatis scilicet, quæ mutari expe-unt. Nec meliorem subeas fortunam, si statuas, e-rit igitur admittenda & contactus, & compositionis in linguæ nervis discrepantia, per quam ipsis tantum- modo Gustatio concedatur; quandoquidem cum nihil habeas in membrana, & linguæ nervis, quod in alia- rum partium pariter non observes, iisque possis ac- commodare sales, ut libet, non est, cur Gustatio & hic etiam non habeatur. Quæ, cum ita se habeant, quid aliud hic concludendum superest, quàm reperi-ri peculiarem quandam in linguæ nervea substantia constitutionem, qua cogente sal velit nolit determi- natam, nec extrinsecam ipsius partem afficiat in ex- pressionem saporum, qua statuta compositione destitu- tæ cæteræ partes Gustandi facultate non polleant? Sed hoc inferius multò explicatius; hic interim in- dulgeat mihi quicumque non reperit experimenta, qui- bus rem totam ad evidentiam traducam, siquidem circa partem res agitur cui experimentalem manum admove- re vel cogitatu barbarum est, nec minus factu lævum, ac impium; nam usum lingualium nervorum, & num extrinseca sui superficie de saporibus judicent ab hominibus tantummodo rescire possumus, illud

autem alio modo exactè deprehendi non potest, quàm nervis ipsis denudatis, deinde appositis, motisque extrinsecus salibus; quis verò tam crudele experimentum humanus animus non abhorreat? Ubi igitur tandem concludis peculiaris isthæc habitudo, per quam una Lingua de saporibus judicat, & ab eodem sale semper ejusdem saporis species in ipsa producitur. Mirum id profectò videtur; nam si cuilibet sali & plures acies, & plures aculei, & superficies plures insunt, per quas gustamus, unde ita disponuntur in ordinem, ut semper eadem sui parte officiant organum nec modò una, modò altera compuncti plurimas ab eodem sale saporum differentias habeamus? Totum hoc inferius explicabitur, ubi afferemus in medium, quid accuratior dissectio suppeditaverit rationi, ut utrique problemati verosimiliter satisfaceret; alterum quidem ad gustantis instrumenti structuram, alterum verò ad vellicationem specialis in nervo partis reducentes. In Nervo? inquis: Ergone postquam & carneam, & membraneam linguæ substantiam ad Gustatorii organi provincia deturbas nerveam substituis, excludisque Glandulosam.

C A P. XII.

Non in Glandulosa.

NERVEAM substituo, & glandulosam excludo. Indulgeat hic mihi Whartonus summopere suspi-
ciendus, & semper meritò laudandus, si veritate cogente affirmare non dubito contra ipsius assertum, Tonsillas nihil ad Gustum facere, nec in iis Glandu-
lis

lis præcipuum Gustatricis potentiaë organum insidere; quoniam si rationes attendo, quibus vir ille, cæteroqui ingeniosissimus, confirmare nititur sententiam suam, nihil invenio, quo ad ipsum deficere adigar; & insuper si Amygdalarum naturam contemplor, nihil observo, per quod peculiare Gustatus instrumentum appellari mereantur. Hæc itaque Clar. Whartonus: *Inprimis existimo, hanc glandulam esse primum Gustus organum, & hoc munus esse primum ejus usum; etenim omnes oris partes, in quibus Gustus perficiatur, Glandula hæc sola sua membrana interveniente subten- dit: non est autem naturæ mos aliam partem inter il- lam, cujus muneris est sentire, & organum sentiendi interponere: quare cum pars hæc ubicumque gustus ex- ercetur proxima sit objecto gustili, necesse videtur, ut ipsum gustus instrumentum sit, & si instrumentum fue- rit ex concessis evincitur, idem munus primum esse u- sum ejusdem partis, &c.* Sic ille. Hic loquitur de Parysthmiis, quarum productione quadam omnes gu- stantes in ore partes obduci affirmat; quid si & non gustantes pariter obducantur? (ut hic interea loci non disputem de Tonsillarum hujusmodi extensione, de qua mox.) Supra jam dictum est, & ad apicem, & ad latera, & ad radicem Linguae, & citra Uvulam in Palato Gustationem dari in Linguae verò planitie modo nullam, modò obscuram, & ab apice ad fræ- nulum nullam semper secundum hætenus observata: quid tu putas ingustantes has partes eadem substantiâ glandulosâ per Whartonium, & Tonsillari non cir- cumtegi? Equidem eadem omninò involvuntur ex æ- quo omnes, ac proinde quare non liceat mihi eodem modo, eademque methodo, qua ad opinionis suæ

confirmationem procedit Whartonus, eandem impugnare, & evertere, si in ore Gustandi vi destituta non una pars eo corpore incrustatur? Quinimò Linguam apice maximè gustare unicuique plusquam compertum est, tamen eò loci lamina, de qua nobis sermo, tenuissima reperitur, sensim crassescens, quo vergit ad posteriora: quod si dicas, tenuitatem esse necessariam ad exquisitam gustationem, cur, inquam ego, ad fauces, ubi præcipuè per Whartonium gustandi vis in Amygdalis, tanta est earundem crassities? Sed quid de palato dicendum erit? Ea quam memoravimus ipsius portione de saporibus iudicium ferri indubium est, & æque notum nullo modo illuc Tonsillas pertingere; patet igitur, illam Parystmiarum creditam extensionem & reperiri in partibus ingustantibus, & in aliquibus, quibus gustandi vis, omnino desiderari, ac proinde patet etiam evidenter huiusmodi inconstantia naturæ attentius pensitata, glandulam illam nihil ad Gustationem conferre. Nec subiciat aliquis & Palatum glandulosâ quadam massâ videri circumdatum; hoc enim, ut ultrò concedam, eadem tota ipsius concameratio, eadem Buccæ, eadem tota, quanta est interna oris superficies, incrustatur, cur sapidis corporibus applicatis hæ partes Gustationem non obeunt, si adest & instrumentum, & objectum? Prætereo, nihil observari peculiare in Tonsillarum substantia, quod Gustationi inservire jure merito dici possit; huiusmodi sensum ibi obscuriorem esse, ubi exquisitior haberi deberet; fatis utiles, & occupatas existimandas Amygdalas, si inter secretorias glandulas numerentur, & his similia plurima non recenseo, ni affectator videar prolixæ disputationis.

tionis. Pergit deinde Whartonus, inter objectum, & hujusmodi glandulosam crustam propriam solummodo tunicam interponi, & consequenter cum glandulosa illa moles gustabili proxima sit, & inter instrumentum sensus, & ipsum sensibile nihil mediare velit natura, jure merito talem glandulam Gustatus instrumentum habendam esse. Sed si verum est, ita naturâ comparatum esse, ut inter organum, & objectum nihil interveniat, nonne Whartonus ipse fatetur circumvestiri glandulam membranâ propriâ? cur non statuendum potius, tunicam esse gustatus instrumentum, cum immediatè corporibus salitis occurrat? unde novit naturæ constitutionem hanc, ut nihil intercipiat inter sensibile, & instrumentum sensus? Nonne, si ad sensus cæteros, vel ad eos saltem; in quibus res est apertior, attendamus, suaderi videtur omnino contrarium, cum inter colores, & retinam tot humores, & tot membranæ intercipientur, & inter sonorum corpus, & nervum auditorium mediet Myrinx, & aër ille, quem memòrant implanta- tum, ut nihil hic adjiciam de admirabili cochleæ, & labyrinthi fabrica, & positione in petrosi ossis cavitate. Quodsi evadere quispiam studeat cum dicto, negari quidem isthæc non posse, tamen Lucem ad retinam usque pertingere tunicas illas, & permeabiles humores pervadens, & aëris pariter undationem quodammodo ad auditorium usque nervum excurrere, impellendo scilicet eodem ryhtmo Myringem, & hinc aërem ingenitum, quid mihi pariter urgere non liceat, posse gustus organum alicubi in linguæ profunditate latere, & hanc esse à sapidis speciebus permeabilem? sanè quemadmodum in Whartoni sententia glandulæ

tunica nihil obstare reputatur, quo minus illa sit Gustatus organum, non video, cur & glandula ipsa in aliis opinionibus obstare debeat? Et ne quicquam asseris, ejusmodi membranam pro nihilo reputandam esse, quod ejus glandulæ propria sit (sive enim propria, quod maximè controversum, imo negatum invenio à plerisque) sive communis, id quod hic negotium faceßit, illud est duntaxat, num penetrabilis sit, an secus, & de hoc maximè dubito, quoniam illud involucrum non ita tenue ad linguæ radicem, dum apicem versus progreditur adeo crassescit, ut in apice vel ipsam artuum cutim altitudine exæquet. Moneamne insuper illud simplex aliquibus non videri, sed in unum, & alterum divisum? Effet jam nonnihil immorandum, ut palam fieret, reperiaturne revera hujusmodi glandulosa lamina in quacumque gustatrice parte, quia tamen me non advertente æquo latius expatiata est oratio, brevissimè pauca isthæc attexo, cùm præcipuè & inferius de hoc agendum sit. Sub involucro linguæ latet nescio quæ crusta nec membranæ, nec muscoli, nec nervi nomine donanda, sed ne Tonsillaris quidem glandulæ, cùm plurimùm à Parysthamiis discrepet & colore, & consistentiâ, & structurâ, & substantiâ, ac denique, ausim enim dicere nihil videtur habere similitudinis, non cum Tonsillis modò, sed ne cum cæteris quidem glandulis. Vide autem ejusdem descriptionem accuratiorem in proximè sequenti capite. Sed instas, cujuscumque demum substantiæ hujusmodi lamina censenda sit, cùm affirmare cogamur ad Tonsillas gustationem fieri saltem ibi erunt eædem tali muneri destinatæ. Ne ibi quidem, ô bone! mox autem habebis earum particularum

larum historiam, quas ut gustarent consultò natura fabrefecit, non in faucibus modò, sed ubicumque Gustatione nos frui deprehendimus; Hæc autem jam nimis multa de Glandulis.

Hæc sunt quantum quidem mihi cognoscere datum est præcipua Anatomicorum, & Medicorum placita de Gustatricis facultatis organo. Superfunt tamen adhuc aliæ aliorum opiniones, quæ licet non adeo, ut supra memoratæ, increbuerint in vulgus, non esse prætereundas æquum duxi, cùm satis auctoritatis, & famæ ipsis concilient auctores sui utpote inter sapientes, qui usque adhuc in litteraria republica rem suam contulerunt maximi nominis, & existimationis. Ecce siquidem habemus Platonem naturæ; divinarumque rerum prudentem non minus, quam pium observatorem asserentem Gustus instrumentum venas: habemus Cornelium Gemmam hominem versatissimum in rebus dixerim omnibus ei muneri præficientem humiditatem quandam aratriformi osse contentam: habemus Eustachium (ne de singulorum asseclis quicquam proferam) in sectionibus accuratissimum & ipsum Anatomix genium tale munus dentibus demandantem, quorum cùm vel ipsum nomen apud omnes meritò tantum sit, ut vel id unum sufficere reputetur ad conferendam propositionibus verisimilitudinem non libet hic ipsorum opiniones ita sicco pede præterire, ut ne quidem recenseantur. Hæc igitur habemus apud Platonem, qui postquam aliqua subinnuit ad hanc rem conducentia, de saporum instrumento hæc subjicit: *Tenduntur à lingua venæ ad cordis sedem, saporum nunciæ, in quas, si quæ res ita inciderint, ut humidam carnis molliem penetrantes terrestri sua natura*
mo-

modicè liquefactæ venas ipsas contrabant, arefaciantque, saporès hujusmodi pariunt, videlicet si asperiores sint acerbos, &c. Habemus Gemmam ita loquentem. Gustus elementum aqueum nequaquam in palati parte inferiore constitutum est, sed peculiarem habet humorem aqueum in substantia rara hætenus ab anatomicis non animadversa, quæ quidem specie dura, oblonga, inequalis cum fœtu piscium optimè comparabilis inclusa longiori epigraphe ossis illius, quod intra narium amplitudinem situm ab osse sphænoide versus palatum exporrigitur, & vomeris speciem præ se fert. Huic ego aquam illam gustatiliū rerum discretricem ingenitam puto, quæ partim circumscitas tunicas, partim, à plexu mirabili inter processus clinoides ossis sphænoidis posito, & hinc per occulta foramina tum in antrum interius, tum in oblongum vomeris sinum tenuissimos ramulos ingerente instar aliarum rerum, quæ continuè defluunt, continuè restauratur. Huc usque Cornelius, quæ ideo transcripsi, ut quisque ex ipso propria sensa audiendi cupidus laborare non debeat in ejus libri non ita parabilis inventionē: Hæc denique habemus ex Eustachio! Nervos ac sensum melioris usus gratia dentes acceperunt, quia sunt propter nuditatem externis injuriis expositi; Saporès autem simul cum lingua discernunt, ut reliquæ oris partes. Quibus omnibus opinionibus sic expositis, video equidem in singularem examine capite non minus insumendum fore, quia tamen harum confutatio ex jam dictis facili negotio deducitur, & ex dicendis constabit apertissimè non earum solùm, quas modò memoravimus, sed una omnium falsitas, quisque ex seipso poterit quid ad isthæc dicenda sint cognoscere.

CAP. XIII.

Linguae accurata descriptio cum novis observatis.

LINGUAM non meditor, quin obstupescam, cum enim & animalibus necessariam, & usui multiplici destinatam, & in suis operationibus peragilemprehendam, & in substantia peculiarem, & in constitutione mirabilem eandem non habere vix possum, & tamen si exploro diligentius in lingua tale nihil invenio, & tam substantiam, quam structuram maximè parabilem observo. Et hinc ego in admirationem trahor; ecce siquidem Lingua nihil aliud est, quàm Musculorum invicem coëuntium contextus: quis credat huic tantummodo universa Linguae munia deberi, ita ut possit paucissimis donata musculis innumeras, prope dixerim, obire motiones? Extenditur, contrahitur, dilatatur, exeritur, attollitur, deprimitur, incurvatur, modò in concavum aptat sese, modò in convexum, modò ad usque palati fornicem erigitur, modò ad frænulum usque reflectitur, quandoque duplicatur, aliàs extenuatur in cuspidem, modò tremit; Et statuendum erit omnibus hisce motibus, plurimisque aliis quinque duntaxat Musculorum paria sufficere, si in aliis mobilibus partibus opposuit natura singulos musculos ad singulos motus? Et tamen cum non occurrat aliud quod cum ratione produci possit, ita se rem habere, concludendum erit, nisi quòd plurimum nos debere crediderim in hisce motibus fibrarum illi tegeti (ut sic appellem musculosam quandam linguae inextricabilem contexturam,

R

quæ

quæ membranis evolutis, & linguâ divisâ profundius offert sese inspectoribus) cùm enim eorum staminum undequaque protensum, & diversimode sese implicantium sit non una directio, multiplex etiam motus ipsorum contractionem consequatur oportet diversis in diversa trahentibus. Doleo equidem, fibrosum huiusmodi complexum non aliter per me describi posse, quàm telæ, aut tegetis comparatione per linguæ meditullium extensæ; quid faciam tamen, cùm explicari ipse nolit, & adeo implicitus sit, & intertextus, ut omnem anatomicam industriam fugiat, omnem curiosam patientiam eludat, enodationem non sustinens? Videant alii fortunatiores, num retexi patiantur, num cum cæteris linguæ musculis cohæreat, num propriis, an mutuatis fibris donetur, quotuplicem habeat directionem in staminibus suis; mihi nempe suspicari tantummodo plura nihil certo scire hoc in negotio datum est; solumque libet innuere non parvi fortasse commodi in nobis existimandum ejusmodi plexum locutionis siquidem cùm in uniuscujusque verbi pronunciatione, non unus linguæ motus requiratur (quando vel quælibet littera absque linguæ ministerio non enuntiabilis peculiarem expetit suum) nihil aliud vulgatis musculis auxiliare ad hasce motiones exercendas videtur advocandum, quàm huiusmodi fibrarum complexus. Sed quid extra oleas divagamur? Quæ de Linguæ musculis circumferuntur, habeat Lector meus ex aliis; nos enim in iis immorari in præsens nec datur, nec locus permittit, cùm nihil ad Gustatricis organum cognoscendum conferant, & sint præter rem nostram; ac proinde ommissa interiori hac, & musculosa Linguæ substantia, convertamur

tamus animum ad exterioris membranæ, ac nervæ contemplationem, ubi opificium fortassè latet non indignum Divinæ manus, & ab Anatomicis, quod sciam, non observatum. Sed quidquid id est, habet quid mihi præbuerit ejuscemodi observationis occasionem.

Joh. Alphonsum Borelli virum omni laude superiorem amantissimum præceptorem meum conveni quadam die, salutatoque humaniter, quid novi, inquam? at ille, novi quiddam pulcherrimum sanè attulit nobis D. Marcellus noster (virum illum intelligens Malpighi cognomento, cujus in laudes ire longa suarum virtutum series, & locus iste non patitur) vide siquidem, quid ille accuratissimus observator in elixata lingua deprehenderit nunquam hætenus animadversum, porrectisque latinè exaratis litteris, vide, pergebat, quid per hæc epistolas renunciaverit, & attentius meditare, quæ rei elegantissimæ summa sit. Tum ego, qui licet de vultu non cognoverim eruditissimum Malpighi, tamen ex scriptis aliis agnosco genium hominis sapientis, motus existimatione tanti viri, jam grande aliquid præconceperam opinione, unde oculis, animisque in epistolam conversis excurri celerrimè tractationem totam, ubi cum descriptionem haberem, quam ante nunquam inveneram membranarum linguæ, nos igitur inquam sedebimus otiosi semper tantummodo auditores? quin manum operi admovemus, & Marcello monstrante viam, Naturam ipsam consulimus, ut quod ipse asserit, ejus oraculo comprobatum habeamus? Adjiciebat interim animos, stimulosque laudatus Borelli, unde tandem non unius animalis linguâ comparatâ vidimus, quod prius Mal-

pighianæ epistolæ fideles tantummodo credebamus observantes insuper nescio quid à clarissimo Malpighi prætermisum. Dum hæc Florentiæ agebantur D. Carolo Fracassati (viro mihi amicissimo, & adeò unanimis genii, ut vel fata, si liceat mihi fingere, arbitrio meo unanimem magis conformare non possim, nisi quod hoc unum habet ille, unde differimus, quod omnis eruditionis, omnis doctrinæ, & bonæ mentis est plenus) Bononiam per præceptorem meum renunciatum est de invento Malpighiano, nihil tamen speciale memorando quid id esset rei, sed tantummodo quiddam ab ipso in lingua animadversum; quæ vix à perspicacissimo viro intellecta sunt, cùm in lingua periculum fecit, num quid novum detegeret, quod suspicari posset esse Malpighi inventionem, & peracto opere quid ipse observaverit, rescripsit; iisque acceptis Bononiæ datis epistolis cognovimus idem omnino, quod mihi notandum sese obtulerat, ipsi pariter occurrisset, unde invicem sumus deinde per occasionem gratulati, quod inter genio similes eadem pariter fortuna convenerit. Res jam hucusque traducta erat, cùm ecce tibi rursus à clarissimo Malpighi epistolas Messanæ datas accepimus, rem illam exponentes ex toto, quæ & mihi Florentiæ, & supra memorato Domino Fracassati Bononiæ inspicientibus obvenerat, quare cùm aliunde nosssem hujusmodi litteras promulgandas, jam in eam abieram sententiam, ut de mea hac observatione ne verbum quidem publice facerem; quid enim ad captandam tantummodo popularem auram scriberem, quam sicut hætenus habui, ita habebam semper imposterum in contemptum? Adiegit tamen genius, ut scriberem, adeoque adiegit animum.

num obluētantem, ut vel invitus hanc sibi similem effuderit offam, quæ si quam formam præ se feret, id totum characteri tribuendum, quem ipsius naturæ manu gestat expressum in fronte; reliquum enim ex undique collectis formis ita conflatur, ut valde dubitem, num

Conspectum admissi risum teneatis amici.

En igitur descriptionem.

Linguam rimanti mihi sese obtulit primo considerata superficies, quam & bovinam quidem non unius coloris animadverti, sed sub apice ad usque frænulum subrubescens, & loturæ carnis non absimilem, in superiori autem area ab apice per sex plus minus transversorum digitorum longitudinem in aliquibus, in aliis per totam ferè sublividam, cujus coloris extremitas non circumscribitur determinati ductus linea, sed irregulari quadam, & flexuosa in concavum, & convexum, & rectum pariter producta. Ad hujusce coloris confinium aliam sui extimam speciem offert lingua, nimirum inde ad usque Tonsillas, seu glandulosam laminam Tonsillas conjungentem gerere videtur quandam maximè dilutam flavedinem ad album proximè accedentem, qua universa insignitur tunica linguam undequaque circumambiens à memorati pallo-
loris termino tam secundum longitudinem, quàm latitudinem, nec non latera. His annotatis, quæ levioris momenti videbantur, anxie quærebam porosam illam membranam, & raram, & laxam adeo decantatam, eamque, licet æquo diligentior fuerim, nunquam deprehendere potui; sed à primo intuitu sese statim considerata obtulerunt innumera quædam corpora è substrata tunica erumpentia non solùm subpal-

lidam linguæ partem , sed & subalbidam pariter occupantia , ad apicem & quoad robur , & quoad dimensionem satis insignia , & exinde versus radicem procedendo ita decrefcentia , ut , ubi linguæ superficies in quendam veluti tumorem attollitur , nonnifi engyfcopio detegantur. Horum figuram fi fpectes , conica eft ; fi superficiem , lævis ; fi apicem , acutior ; fi fitum ; ad fauces inclinans , feu paulatim refpiciens : cum autem hujusmodi fubftantias & conicas , & verticem ad posteriora vergentem obtinere affero , nolim credas , formam , pofitumque earum Scalenum Conum æmulari , fed Conum inflexum , ut fic loquar , ita ut ipfarum superficies incifores dentes refpiciens convexa , feu gibba , oppofita autem concava appareat , & , ut uno verbo loquar , tam figura , quàm fitus hujusce fubftantiæ vel carminatorii pectinis dentibus , vel ruftici raftri , vel aquilinis unguibus , aut felinis (fi conicæ effent ex toto) poffet non immeritò comparari. Situs autem hujusmodi in linguæ præcipuè apice confpicuus eft , alibi enim inclinatio minus feffe prodit , quo magis tendimus ad palatum. Felinæ autem linguæ vertex nullis omnino hifce conis donatus eft , fed plurimi ex ipsis emergunt area media , iique offei ex toto cavi intus , non abfque medullulis fuis , nervulis , vafisque cæteris , quibus non abfimiles eodem vergentes per palati concamerationem ordine non abfimili diftribuuntur , quod an in aliis etiam contingat animalibus affirmare non poffum ; cum non viderim , nifi quod in Bobus quid fimile videre eft , fed non offeum , nec ejus figuræ. Vides interim , quàm folers natura fuerit , & quàm providè vel ipsis felibus confuluerit , cum enim iis pungentibus

bus conis ipforum indigeret lingua, & eandem abluendis pedibus, lingendis naribus, aliisque insuper ministeriis accommodent, quibus asperitas, & incisio inepta est, in ea tantummodo parte cuspides hæce fabrefecit, quæ aut nihil, aut parum sanè exeri potest. De harum particularum substantia si quæras in bubula lingua (ne hic de humana loquar, quæ ab illa qui differat inferius explicabitur) quid apertè dicam, hucusque non habeo; neque enim ossea videtur ex toto, sed ne ex toto. q. cartilaginea, cùm sit hac durior aliquanto, illa autem aliquanto tenerior, proindeque non incongruè affirmare quis posset, hujusmodi linguales conulos ex media inter os, & cartilaginem natura constare, non negans interim processu fortassè temporis in osseam facessere posse, sicut & concrefcente intra certos folliculos in maxillis mucos dentes consurgunt, & aortæ principium in os evadit, ut ipse non semel in Cervis, & pariter in hominibus, nisi me fallit animus deprehendi. Hujusmodi substantiæ ab extima superficie erumpentes infigunt altius radices suas, adeò ut cum lingua non una tunica vestiatur, ipsæ ad intimiorem, & musculis usque contiguam, protendantur, & hæreant, nec sine mediocri violentia evelli possint: evelluntur tamen, quo facto si extremitatem alteram membranis prius latentem intuearis attentius, & solo, liberoque obtutu non sufficiente, perspicillum admoveas, sese in conspectum proferet foramen quoddam interiorem conulorum longitudinem cavans, in quod lingualibus membranis substratam crustam insinuare sese mox explicabitur. Eorum corporum constitutione sic breviter præter propter **ex**posita de usu cogitandum est, qui nul-

lus

lus alius videtur esse, quàm palatum, & buccas verere, ut ita loquar, & dentiscalpii quodammodo gerere vices. Id suaderè videntur & propria illa in acutum desinens figuratio, qua nihil aptius ad ciborum reliquias hic illic hærentes abripiendas, & curva illa conformatio posteriora linguæ respiciens; quæ ei muneri accommodatissima, ne dicam necessaria est; & cohærentia tenacior cum membranis, & profundior infixus, quæ demonstrant apertissimè vim ab ipsis aliquam exerceri, & locus denique unde proveniunt, qui nullus est, nisi huc illuc agitabilis per oris universam capacitatem, & ita mobilis, ut ad fauces possit impellere. Hinc ab apice ad frænulum nullum conum reperiās, sed superficiem maximè lævem, quò magis ad posteriores linguæ partes tendimus debiliores, ut dictum est, & in illa eminentiori jamjam describenda parte, & in Tonsillis nullos. Nec dicas, eadem omnino natura videtur lingualium istiusmodi conorum, ac earum, de quibus supra palatarum asperitatum, ac proinde cum his ut immobilibus usus iste competere non possit, nec illis erit idem adscribendus. Satis enim inter hujusmodi substantias discriminis intercedit, si utraque mobilis non est, & ex iis componitur pecten veluti quidam carminatorius, cujus altera parte immobili, mobili altera, filamenta lanæ retexuntur, & explicantur, ne hic submoneam tam palatinos, quàm linguales conulos posse insuper conducere ad ciborum retentionem quibus in pronis animalibus proclive esset effluere, nisi aliquo repagulo cohiberentur, & hinc fortassè rationem peti posse, cur nos erecti, & sublimè spectantes iisdem destituamur.

Hisce

Hicce sic consideratis corporibus nos in sui contemplationem linguæ superficies admittit, quæ conulis evulsis sese profert apertius, & aspectu jucundissimum explicat vultum. Ecce siquidem illa non est undequaque plana, sed postquam ab apice per spatium plus minus palmare in planitiem expandit sese, assurgit sensim in convexitatem, unde tumore quodam resultante per trium, quatuorve transversorum digitorum longitudinem expeditior descensus ingestis cibis conceditur per fauces inclinatas ad faciliorem deglutationem. Ab apice ad usque tumorem hunc quædam observanda occurrunt, quæ in ipso tumore pariter invenias; in hoc peculiare quiddam aliud in linguæ area nequaquam positum, in faucibus, seu lamina Tonsillarum aliud in utrisque memoratis partibus omnino desiderandum, ab apice ad frænulum prorsus nihil, quandoquidem, ut ab extremo exordiar, hoc unum quantumvis observes in inferiori hac linguæ superficie deprehendas, quòd maximè videlicet lævis est, nullis conspicuis foraminibus pervia, nullis eminentiis aspera, discrepans denique à reliqua universa lingua, nisi quòd habet quædam ad latera in cætera etiam superficie deprehendenda, de quibus mox in ejusdem narratione sermonem instituimus. Superior itaque planities lævis est, sed tot, tantisque poris perforata, ut cribrum dixeris potius, quàm superficiem continuatam; scilicet tot habet foramina, quot conulos; non enim aliunde isthæc proveniunt, quàm ab exinde erumpentibus, & evulsis ante descriptis conis; sic quia insigniores ad apicem illos diximus, & pori quoque inibi sunt majores, & omnes quasi conorum sint bases, circulares; mox sensim angustan-

stantur, ita ut linguæ superficies, quæ retis, aut cribri imaginem circa apicem referebat, ad tumorem continua appareat, ac telam æmuletur. Occurrunt deinde eminentiæ quædam nullo certo ordine dispositæ, nulla determinata serie distributæ, nullo statuto numero comprehensæ, sed in aliquibus ad trecentas, in aliis ad quadringentas, in aliis supra quingentas numerandæ hinc inde erumpentes inordinatim plures, pauciores, id unum solummodò in vitulinis linguis inalterabiliter conservantes, quòd plures enascuntur ad latera in superioris, inferiorisque superficiei confinio, & circa apicem; in planitie ipsa multo rariores. Earum superficies convexa est in mox occisis, & in viventibus quoque; color idem, qui linguæ antea descriptus. Hæ, si mycroscope observentur, nihil ostendunt aliud, præter minimos porulos, & lævorem, in his quidem exactum, in illis verò non ita perfectum, adeò ut non videatur constans naturæ institutum, & necessarium, ut ipsarum superficies sit lævis, aut aspera. Quæ in mox occisis, & viventibus, ut referebam, sunt convexæ superficiei, eadem, si aliquo ab interitu temporis intervallo inspiciantur, concavitatem quandam in medio præferunt, & quæ priùs linguæ plano aliquantulum eminebant, subsidunt deinde, & sub eodem deprimuntur. Et hæc quidem deprehendere est in plana linguæ superficiei. Sed & tumor habet peculiare suum, nullis enim sensibilibus fibris perforatur, utpotè qui nullis insignitur conis, ut dictum est, sed horum vice conos habet quosdam alterius naturæ flexiles, scilicet molles, & læves, qui in naturali situ non inclinati videntur, aut inflexi, sed perpendiculares, quibus similes
per

per oris tunicam dispersos invenias : evelli nequeunt, nec radicibus penetrant altius (ut inferius in membranarum explicatione constabit.) expressi nihil evomunt, processu temporis arescunt, & ita inaniuntur, ut membranæ tantum invicem subsidentes supersint. His omnino conformes habeas à marinæ testudinis œsophago; hic enim ejusmodi substantiis refertissimus est ventriculus versus apicem spectantibus, nisi quòd linguales illæ sunt hisce œsophagæis multo minores. Habet insuper tumor papillas suas, eminentias videlicet, supradictis simillimas, videntur tamen non ita convexæ, sed planæ potius superficiei, duriores multo, & pariter majores. Hinc descendentes ad crustam tonsillarem, est pariter, quod in ejus membranæ superficie notemus, nimirum insignia quædam oscula viscidum humorem eructantia, album modò, aliàs flavum, quandoque lividum, quo locus ille semper illinitur: licet ex iis oscillis aliquatenus introspicere citra sectionem, & cavitas sese offert infundibulum referens, & in nervum desinens immediatè. Cæterum & ipsa cavitas lævis est, & insuper propter viscidum humoris affluxum lubrica, nullis donata conis, aut duris, aut mollibus, nullis insignita papillaribus protuberantiis. Nec plura obtulit mihi, quæ describerem, extima linguæ superficies; habet jam quid obtulerit interiori penetranti.

Linguæ summam cutim incidi, & frustra ipsius separatione tentata; aciem adegè profundius ad extremas usque conorum radices, & rursus ejusdem laminæ separatione tentata non irritus fuit labor; statim enim obsequi cæpit digitis patienter, & sensim trahentibus, unde factus audentior, quòd in minima

ejus tunicæ portione feliciter evenerat, in universa membrana experiri volui; nec præter votum administratio peracta; totum enim, quantum erat indumentum linguæ superius abstuli nulla laceratione subjectarum partium, aut ipsius membranæ, sed rebus omnibus perfectissimè se habentibus, & manifestius ostendentibus sese. Ut igitur membranam hanc primò contemplemur, absque eo, quòd ipsam separe, constat ipsam linguam universam circumtegi, & extendi ulterius ad tonsillas, ad gargareonem, ad palatum, ad buccas, aliasque vulgatas partes, ita ut non immeritò nomine Communis veniat. Connectitur autem cum substrata substantia consequenter explicanda, & admodum tenaciter cum eadem cohæret, unionem hanc conorum radicibus promoventibus, quæ etiam eadem subjectâ substantiâ conjunguntur. Non ubilibet ejusdem est crassitudinis, sed pro partium diversitate variat crassitiem, & ibi altior est, ubi majores, & crassiores coni, ibi tenuior, ubi minores, ibi tenuissima, ubi nulli: sic ad apicem in aliquibus anserinæ pennæ crassitiem æquat, unde discedendo versus fauces decrescit paulatim, quemadmodum coni ipsi decrescunt, ac tenuatur quoque, dum circa latera devolvitur ad inferiorem superficiem, in qua tantæ evadit tenuitatis, ut vel cuticulam ipsam superet. Quin diversam hujus membranæ speciem haberes, prout eandem diversimodè afficeres, ac parares: mihi, qui non nisi duplici in statu sectionem aggressus sum, in elixa videlicet, & in cruda, duplex tantummodo sese obtulit differentia, quarum alteram, & quæ quidem in cruda obvenit, explicatam habes; altera autem in elixatis deprehenditur, nimirum hujusmodi

modi tunica, quæ in non coctis linguis simplex videtur, elixa duplex apparet; & extima quidem in universa linguæ superficie ejusdem consistentiæ, ejusdem crassitie, ejusdem roboris: interior autem præcipuè videtur illa, de qua usque adhuc egimus, crassior, tenuiorque secundum crassitiem, & tenuitatem conorum inhærentium. Hæc altior est (in elixatis semper intellige) hæc mollis, hæc lævis, hæc in laminas plurimas divisibilis, hæc cribi instar perforata, conis avulsis, hæc in inferiori superficie ab apice ad frænulum subtilissima, & non porosa, ut etiam talis apparet circa tumorem, ubi ita attenuatur, ut anceps adhuc hæream, ibine sistat, & aboleatur, num procedat ulterius ad usque tonsillas; & potius affirmaverim, ibi penitus deficere, cum attentius inspicienti, progressus ad posteriora nunquam sese obtulerit. Si itaque albicantem huic tenuissimæ membranæ substratam crustam ab hac exteriori membrana diversam facias, hanc illi immediatè conjungi, & adeo arctè, ut citra coctionem invicem sejungi nequeant, affirmandum erit; quibus annotatis, ut externum involucrum explicare pergam, annectitur insuper singulis supra memoratis papillaribus eminentiis, & convexam superficiem ambit; ad quam priusquam attingat, elegantissimum format sinulum mediocriter cavum, ex quo papilla ipsa videtur erumpere, adeoque arctè tunica isthæc annectitur superficiebus papillarum, ut, dum separatur, papillæ satis validè interioribus linguæ partibus per nervos illigatæ, non solum non lacerentur, nec ipsam membranam sequantur, sed hujus portionem suis superficiebus obductam retineant, productis tot in membrana propter laceratio-

nem foraminibus, quot exinde papillæ emergebant, ejusdem magnitudinis, & figuræ. Obducit pariter hujusmodi involucrum teneriores illos in linguæ tumore conos, quibus videtur adhærere tenaciùs, cùm separari non possit; sicut pariter papillarum inibi jacentium superficies, circa quas insigniorem sinum efformat, quàm circa cæteras, quæ in planitie conspicuæ sunt, sicuti ad has insigniorem, quàm ad cæteras laterales. Tandem deflectit ad fauces, ubi insinuât sese in Tonsillaris laminæ memorata foramina, seu, ut veriùs loquar, ipsa est, quæ ad interiorem amygdalarum substantiam sese reflectens, & cum nervorum extremitatibus sese conjungens format eas cavitates inanibus conis, aut infundibulis non absimiles. Ulteriorem hujus membranæ progressum videant alii: hæc enim tantummodò sunt pro re nostra, nec ad alias partes libet excurrere de Lingua tractantes. Quoniam verò jam in aperto positum est, quomodo hujusmodi membrana se habeat, quale sit ejusdem munus, proximum est, ut expendatur, quod meditati mihi difficilius videbatur propter discrimen illud, quod observatur inter crudas, & elixatas linguas, quandoquidem cùm in illis simplex, in his autem duplicata membrana videatur, ignorabam, cui provinciæ utramque præficerem, cùm non cognoscerem operationum diversitatem, cui hujusmodi tunicæ deberentur: quod si re vera una tantummodò reputanda esset, faciliorem arbitrabar mihi patere aditum ad ipsius usum investigandum, quo factum denique est, ut in eam sententiam devenerim, membranam re vera simplicem esse, & si duplex videtur, id non esse naturæ, sed coctionis opus.

Quod,

Quod , ut ita crederem , hæc me impulerunt observationes. Inter crudam , elixatamque membranam nihil aliud intercedere animadvertēbam , nisi quòd illa tota , quanta est , videtur simplex , ejusdemque naturæ secundum omnes dimensiones suas ; hæc autem non laminam homogeneam repræsentet , sed superiorem quidem , & externam crustam certi coloris , & duritiei , interiorem verò mollem magis , minusque duram , & colore peralbam. Hæc autem omnia non mihi visa sunt ejus roboris , ut evincere possint externam & internam laminam natura , & munere discrepare ; quòd enim exterior sit aliquantò durior , locus ipse expetit , qui extrinsecus advenientibus cibis expositus , & paratus , est ineptus tenerioribus membranis , ne æquò plus lacerentur , & absumantur in masticatione , & continuo in linguam appulso. Interioris crustæ albus ab elixatione color non diu perseverat , sed si aliquo temporis spatio aëri exponatur , faceffit in pallidum , & exterioris laminæ quasi conformem , ne memorem colorum differentiam non esse adeo indubitatum argumentum differentis naturæ : quin imo Aprinæ linguæ exteriorem faciem ab apice ad frænulum albicantem facit elixatio , & Cervinæ aream universam. Quòd autem post coctionem , quæ prius una membrana videbatur , faceffit in duas nescio , an falsum dicam , an non mirum. Mirum fanè non dixerim , quando ea tunicarum natura est , ut una , & eadem in plurimas dividi possit , adeò ut nihil aliud membranæ videantur , quàm subtilissimæ tenuissimorumque staminum contexturæ sibi invicem superimpositæ. Falsum autem judicaverim , in duas à coctione dispesci , quoniam non
in

in duas tantum, verum in penè innumeras cæterarum tunicarum instar distinguitur: quare cum nec durities, nec color naturæ diversitatem inferre possit in membranis, & multò minùs divisibilitas, satis cum ratione asserere potero, talem tunicam simplicem esse, ut præteream, me multò verosimilius ex indivisibilitate non coctæ hujus laminæ ejusdem unitatem deducere posse, cum ignea vis dissolvat, & determinet. Quidquid tamen sit, five crusta linguæ ex duabus, aut una, aut pluribus membranis constet, cum videatur unius naturæ, nec obveniant peculiaria munera singulis in iis membranulis adscribenda, crediderim, laminam illam universam in conorum gratiam à natura fabrefactam, aptata interim extima ipsius parte & intima pariter pluribus ministeriis aliis, tutelæ scilicet linguæ, integumento ejusdem, defensionis subjectarum partium, cæterisque, qui sunt membranarum omnium usus communes. In gratiam, inquam, Conorum, cum enim superius affirmaverimus, iis veluti dentiscalpiis uti naturam, ejusmodi actionem obire non possunt, nisi certo quodam modo contineantur, ut vim suam exercere possint; ut autem id præstent, apponit natura fulcimenti vice crassiorem illam membranam, quod observasse quoque memini in interiori histricinæ pellis superficie, in qua elegantissimam hexagonorum contexturam deprehendi in erectionis tantummodò, non in fabulosæ ejaculationis gratiam ad calamorum radices instratam; sic pariter ablatis squammis in piscibus sese offert contextus quidam, nerveusne, an carneus, nescio: reti propior, quo squammæ singulæ aut colligantur solùm, aut aliquatenus eriguntur. Id suadet etiam ejusdem mem-

membranæ distributio, quam superius explicavimus, quid enim illa crassities, ac tenuitas crassitie, ac tenuitati conorum proportionalis, & defectus, ubi iidem deficiunt? Sanè nihil aliud exinde deducitur, quàm quòd majus fulcimentum, ut sic loquar, fabrefactum est, ubi conorum radix productior, & potentia validior illud expetebat; minùs autem, ubi brevior, quod non solum ex supradictis perspicuè patet, sed & evidentius ostendunt plurium animalium linguæ conis iis destitutæ, quæ ipsorum vice pilis quibusdam pubescentes lanugini propioribus tenuissimam habent ejusmodi membranam. Nec obstat, quòd ab apice ad frænulum lamina isthæc reperiatur, & circa tumorem pariter, unde tamen nullus omnino conus erumpit; in his enim linguæ partibus cætera ex assignatis muniis obiit aliarum membranarum instar, nec exinde quis unquam inferre possit, hanc tunicam præcipuè ad conorum stabilimentum fabrefactam non esse, cùm nihil aliud necessario illi muneri destinatum in lingua observeatur. Sed hujusmodi crustâ tandem sic explicatâ proxima sese offert papillarum consideratio, quarum superficiem ab usque summa lingua conspicuam supra jam exposuimus.

Hæc igitur corpora tenaciter adeò cum lingua connectuntur, ut, quamvis jungantur, ut dictum est, cum descripta tunica, tamen ad hujus ablationem non auferantur simul, sed subjectæ alteri laminæ remaneant implantatæ pereleganter. Harum figuram nescio, an comparem clavis plaustrorum rotis infixis aptius, an dicam potius non absimiles

T

fun-

fungis. Utrumque rem præter propter animo præsentare videtur, tamen exactius exprimit habitudo fungorum, quàm clavorum, cum ejusmodi papillas non cupula solùm imitentur, sed & pedunculo, & radicibus etiam; cum hi è contra sint ut plurimum pyramidales, & semper in acutum desinant mucronem. Habent itaque linguales fungi pedunculum suum in memorata membrana latentem, nec nisi eadem separatâ conspicuum; colore satis in mox occisis dilutum sensim pallescentem, quo asservantur magis ab obitu: figura cylindricum, & exactè lævem, longitudine secundum linguæ partes, è quibus erumpit differentem; ibi nimirum longiorem, ubi exposita membrana altior est, ibi brevior, ubi eadem humilior; crassitie pariter non eundem, hic siquidem tenuiores fides, ibi crassiusculas æmulatur. Desinit in perimpositam membranam lamellam, cujus extimam, & convexam superficiem habes explicatam superiùs, nec in concava ulteriùs immorabor, cum nihil occurrat præcipuum. Externa sunt hæc omnia, & detractâ illâ tunicâ, spontè in observatoris oculos incurrentia; quantò autem meliora latent interiùs ad radices, & pedunculi longitudinem? Quæ putas hujus, & earum natura est? Nulla alia ipsius cavitatem implet substantia, quàm nervea, nihil aliud sunt radices, quàm nerveæ productiones. Habet itaque lingua, ut cuique notum, nervorum insignes truncos: hi per ejus substantiam repentes dividuntur in plurimos ramos crassiores, qui iterum iterumque partiti emittunt tandem tenuissimos furculos; tendunt horum
ple-

plerique ad linguæ extima, & ad musculosæ, & membranæ substantiæ confinia traducti inferuntur in statim describenda contigua fibris tunica, & ulterius pergentes insinuant sese in ante memoratum pedunculum, seu potius in eundem facessunt; siquidem nihil hic aliud videtur, præterquam nervorum fasciculus tenui, & rotunda superiori membrana circumdatus, & membrana exili laminulæ sua extremitate adhærens, quæ in convexum conformata ab extima usque superficie circa sectionem deprehenditur. Sunt itaque lingualium fungorum radices internæ pedunculi substantiæ continuatæ ejusdem prorsus cum ipsa naturæ, in eoque tantummodo differunt, quòd in pedunculo nervi, qui hinc inde germinantes conformabant fungi radices, in fasciculum coëant sursum ad exteriora recta vergentes. Si horum corporum convexitatem, seu cupulam non spectes, dixeris iis siphunculis propiora, quos ad fontanas aquas ex inopinato. emittendas dolosè distribuimus inter herbas, lapillosve artificiosè coagmentatos; quemadmodum illi latent ex toto præter exterius hians oscillum, ita isthæc pariter ne quicquam rursus attingam de figura, connexionem, & cæteris, inter involucra delitescunt, & extimam linguæ superficiem attingunt singuli nervi extremitatibus suis, vel, si licet ita loqui, oscillis suis è linguæ plano perpendiculariter assurgentes. Hanc autem nervorum distributionem si spectare velis, quamlibet ex papillis diligenter exploraveris, observabis, quod dictum est; si promptius, & expeditius, apicem linguæ consule, quem nervis refertissimum invenies in

papillas abeuntibus: si expeditissimè rem velis absol-
vere, rimare paucas illas; ac insignes quidem papil-
lulas, quæ in linguæ tumore utrinque sex, septem,
plures, pauciores habentur; in his enim plurimæ ner-
vorum propagines inferuntur, & pedunculus brevissi-
mus immo ferè nullus est, quæ nervorum multitudo
faciet, ut citiùs, & clariùs negotium totum perci-
pias à papillis aliis difficiliùs addiscendum, cum non
tot habeant nerveos furculos, faciliusque lacerabi-
les. Tandem superest annexa tenaciter tunica muscu-
losis linguæ fibris (usus enim talium particularum
sequenti capite enodatur) quam cursim sic expositam
accipe.

Extimam superficiem, cui fungorum implantan-
tur pedunculi, inæqualem habet, & non immeri-
tò comparari posset cum superficie glandulosæ ejus
laminæ, quæ ad œsophagi, ventriculique confinium
in brutis plurimis reperitur papillaribus multis emi-
nentiis donata, & ex illa etiam videntur papillulæ
quædam assurgere, modicè supra ejusdem planum
sefe attollentes sub rotundi corporis specie in obtu-
siorem apicem desinentis: revera tamen papillæ non
sunt, nec quiddam ab ipsa crusta distinctum, sed vi-
dentur productiones ejusdem, quæ cum antedictis
lingualium conorum cavitatibus inferantur, & levi-
ter annectantur, fit, ut iis avulsis conis, separari à
continuata tunica non possint, & eminentias illas
producant. Majores sunt hujusmodi processus ad
linguæ tumorem, ubi molles, & majores illi coni,
quos diximus; horum enim interiorem molem &
substantiam ipsi complent, quæ supra memorata ex-
ter-

terna tunica amicitur. Tam eminentiarum, quàm reliquæ membranæ unus est color, idemque à musculorum colore parùm diversus: membranæ crassities modica, & per universam linguam æqualis ferè: connexio valida cum subjectis fibris, & unio (ut non uni anatomicorum visum est) inseparabilis; re vera tamen separabilis quidem, sed non nisi laboriosius. Suscipi nervorum propagines propè dixerim innumeras, quæ prius in lingualium fungorum radices conformatæ abeunt demum in pedunculos. Substantia non videtur ex toto membranea, nec pariter glandulosa, sed naturam quandam participare, consistentem magis, & ad nerveum corpus accedentem. Nec plura de propria, ut circumfertur, linguæ tunica, quam nulli alii muneri præfecerim, quàm quod id præstet in lingualibus, & durioribus conis, quod in ossibus medulla præstat, molliores verò conos producat; quoniam isti quidem nihil sunt aliud, ut dictum est, quàm hujus tunicæ processus involucro communi linguæ circumdati; in durioribus autem, & consultò producta cavitas, & in eam se insinuans hujusmodi corpus, & peculiaris ejusdem substantia id suadere probabiliter videntur. Inservit insuper muniis, quæ membranis cæteris conveniunt, & insuper fibrarum insertioni, quod hujus tunicæ separationem aggredienti plusquam satis innotescet. Et jam habes absolutam membranarum, & quæ inter ipsas advertimus, linguæ bubulæ descriptionem, in qua sectionem eo consilio institui, ut facilius ob partium magnitudinem in sensus incurreret, quod eosdem subterfugisset forsitan, si à

minorum animalium linguis auspicatus fuisssem ; absit autem , ut credas , linguas bubulas à cæteris discrepare ; una enim est omnium compages (earum quas vidi intellige) & deme avium linguas , & piscium , si quas habent , una in omnibus membranarum series , numerus , & usus idem , fungi similes. Et quia de brutis animalibus nihil refert , simus æquè solliciti , id tantum de ipsis innuere sufficiat , linguas ipsorum cætera convenientes hoc uno differre , quòd aliæ pungentibus illis conis superficiem exasperant , aliæ autem holoserici instar lævem offerunt ex universa planitie villis lævoris maximi germinantibus. Sed quid putas , de Homine dicendum est ? Idem omnino , quòd de cæteris. Habet itaque (ut humanam hanc particulam cum Bovina brevissimè conferam) tunicas suas , communem alteram , alteram propriam ; ex illius superficie nulli coni erumpunt , sed ipsorum vice tenues , & flexiles pili : quod si apertius observare velis , adhibe microscopium : habet tumorem suum cæteræ linguæ moli proportionem respondentem : hiant inter paristhemia in glandulosa crusta oscula plurima satis exigua humorem viscidum eructantia : extant papillæ plures , & penè dixerim , innumeræ , quarum adeò jucundus conspectus est , adeò elegans distributio , ut rapiat oculos , animosque observatoris , & diu , multumque non sine oblectatione detineat. Copiosiores ad apicem deprehendas (quamvis hoc perpetuum non sit , & inalterabile , tamen plerumque accidit , & ferè semper) & ad latera ; exinde verò proportionaliter rariores , quo magis versus fauces declines ; in
area

area modò plures, modò pauciores inordinatim sparsas. Quæ omnia, difficile dictu est, quam reficiant curiosos animos, si engyscopiis accuratiùs observentur; & si quis ex me similitudinem quærat, nescio, an papillarum illam congeriem uvarum racemo potius, an baccarum Lauri, an fungis plurimis teneriores inter herbulas juxta se invicem pullulantibus comparem; Si enim figuram, & positionem spectes uvarum, aut baccarum, ejusmodi congeriem æmulantur; at ostendunt conspicienda inter utramque papillulam erumpentes pilos, quos diximus herbularum tenuissimis frondibus inter utrumque boletum non rarò germinantibus proportionales. Hic verò prætermittendum non est (ut aliquando descriptionem hanc æquo fortasse prolixiorē concludam) videri lingualium fungorum superficiem foraminulis plurimis, iisque angustissimis pertusam, quæ non nisi crystallinis, iisque perfectioribus lentibus deprehendi patiuntur: idque faciliùs obtineri posse in viventibus adhuc iisque sanis animalibus, vel ab obitu statim, quàm in olim demortuis: nam flaccescunt, & collabascunt, & distingui minimæ illæ porositates non possunt. Cæterum in hominibus etiam tales papillulæ nervæ sunt: pedunculos & radices, & connexiones habent easdem ad amussim, quas in bove recensuimus, &, ut uno verbo rem perstringam, nihil inter se discrepant linguæ, præterquam crassitie, aut tenuitate partium, & conorum, aut pilorum defectu. Quæ omnia, cùm inobservata usque adhuc, aut prætermissa sint ab Anatomicis, contingeretque mihi, in naturæ hoc opificium incide-

re ejusque constitutionem cognoscere , de humanæ fabricæ , & veritatis amatoribus fortè non malè meritis appellabor , si ipforum genio potius gratificaturus , observationem totam , quamvis ita rudi minerva , proposuero. Denique cùm partium , quas descripsimus , nulla supersit , cui proprium munus demandatum non sit , præter papillares eminentias , vel si mavis , linguales fungos , oportet jam , ut & ipsos suæ provinciæ præficiamus : quòd cùm longiusculam expetat orationem , agè , concludat hoc

C A P. XIV.

Instrumentum Gustus esse in descriptis papillis.

Cum circa linguæ inspectionem versarer , aderat semel iterumque , sed nunquam fatis laudatus præceptor meus Borelli , & cùm ejusmodi linguales fungi ex inopinato occurrissent , in diversa trahebamur , adhuc siquidem latebat nos eorum processus , nec connexionem , nec substantiam compertam habebamus : quapropter modò lymphæ ductuum oscula , modò canalium salivalium extremitates , modò glandulas esse dubitabamus , nescii , ubi quiesceret animus , & num inter omnes illas opiniones veritatis quicquam haberetur. Tandem verò postquam diligentiori indagine nerveam papillarum naturam , structuramque jam recensitam adeò perspectam habuimus , ut nihil jam superesse videretur , quod ea de
re

re in controversiam meritò revocari posset , convenimus , ejusmodi fungos esse Gustatricis facultatis instrumentum. Id autem , ut quomodocunque confirmarem , æquum primò sum arbitratus , omnes , quotquot adhuc exstant de Gustus organo sententias expendere , & confutare , omnesque pariter linguæ particulas meditari , ut discerem ; alia-ne linguæ portio huic muneri accommodatior sese offerret , quæ me de opinione dimoveret. Hoc totum jam superius præstitum : sed quoniam aliarum sententiarum everfione propria non stabilitur ex toto , nisi aliis , propriisque fundamentis suffulciatur , en quæ me ad ita sentiendum coëgerint. Papillarum distributionem mecum ipse pensitabam , & cùm hîc frequentiores , rariores alibi , hîc juxta se invicem enascentes , inibi magis inter se diffitas , alibi demum nullas observarem , arguebam , si ipsis quidem gustandi vis insideret , de saporibus à nobis judicandum , ubi ipsarum copia major , citiùs , exactiusque ; tardiùs , & obscuriùs , ubi minor : ubi autem nullæ , nullo modo ; unde inferebam , si igitur iis linguæ partibus sapida admovebuntur , unde ejusmodi fungi enascuntur , saporem experiemur ; si autem eadem aliis applicentur , nullam , præter tangibiles qualitates deprehendemus. Hoc autem ratiocinium , ut ipsis sensibus confirmatum haberem , num veritati responderet , Ammoniacy salis frustulum mihi comparavi , eoque plurium amicorum linguis admoto , mirum , quàm secundùm præconceptam opinionem res feliciter evenerit ; siquidem quantumvis sal ipse madesceret , quantumvis detereretur in pulverem ,

quantumvis denique liquaretur, nullo modo Gustatum excitabat appositus illi superficiei linguæ, quæ inter frænulum, apicemque intercipitur, ubi nullæ fungorum cupulæ eminent. Idem exinde translatum ad linguæ verticem, ubi confertissima papillarum multitudo, insignem imprimebat speciem saporis sui: quod pariter præstabat traductus ad latera, & ad universam aream quoque, si iis tamen superimponeretur papillulis, quæ ex ipsa sparsim erumpunt. Hæc autem omnia postquam ita se habere ab amicis capitibus accepi, & ipse testis adesse volui sententiæ meæ, & ad speculum linguam salivâ benè madentem exerens, observavi papillarum locum, & superinducto sapido corpore, conveni cum aliis, scilicet saporis sensum in iis fungulis excitari, & reliquam linguæ superficiem non solum, quæ ad frænulum ab apice exporrigitur ejusce sensus participatione destitui, sed & superiorem pariter, quæ inter utramque papillam est, nihil præter tangibilia, distinguere; ex quibus observationibus ejusmodi papillulas esse instrumentum Gustatricis potentiae tantum non concluderam, cum ecce tibi suboritur scrupulus, si tale gustus organum habendum est, qui fiat, ut sapores ad Tonsillas etiam sentiamus, & in superiori palati parte citra uvulam? Utrumque autem id indubium esse facillimè deprehendas, & illud quidem, si in memoriam revoces, in vomitionibus ad Amygdalarum crustam, non solum saporem vomitus discerni, sed & diutiùs hære, & difficiliùs amoveri: alterum autem si saporem applices inter uvulæ, palatique confinium, ubi saporis sen-

sensum habebis satis exactum. Utrumque tamen submovit inspectio diligentior, in tonsillari enim lamina negotium hoc absolvi posse sum arbitratus à nervis illis superius descriptis ad cavitates, infundibulo similes, hiantibus; in palato autem papillulas lingualibus undequaue respondentes animadverti, nec in homine solum; sed & in Apro; quare tandem statutum per me est extra omnem dubitationem, & audacter affirmari posse, tales fungulos esse Gustus instrumentum. Hujusmodi autem positione certissimis hisce experimentis satis superque confirmata, meditabar, quomodo hac supposita, & celerrima illa saporum perceptio, & eorum aliquot mora longior in organo explicari posset, & quid ita fiat, ut si à salis vellicatione hic habetur sensus cujus plurimum superficierum, & angulorum est unaquæque species, semper tamen ab iisdem eundem saporem patiamur, & denique, si, ut superius monstratum est, externa gustatorii instrumenti titillatio gustui excitando non sufficit, in qua tandem ejusdem organi parte passionem hanc imprimant sales, ex qua sapores ingestorum deducimus. Hæc autem omnia, ut facilius perciperem, & aliqua verisimilitudine prætegerem, statim ad cæterorum sensuum constitutionem confugi, ut eadem observata, & inter ipsam, memoratasque papillulas, facta comparatione, quiddam deducerem ad rem meam. Cognovi igitur omnibus iis partibus, quibus aliquid distinguendi vis est, ultra tangibiles qualitates, (& sensus externi dicuntur) nervos esse quidem insertos, sed tali determinato modo constitutos, ut ob-

jectorum species , ut appellant , vel invitæ medullarem tantummodo ipsorum substantiam afficere possint in exteriorem , & membraneam , aut nulla , aut minima impressione facta. Res ex se ipsa patet factis ; cui enim incompertum est , Opticorum illam esse posituram , ut meditullio tantum irrumpentem lucem excipere possint , membranis autem non possint , & ex hac affectione in cerebri Optici parte producta sensationem resultare , quam Visionem appellamus ? Cui pariter non exploratum in auribus quoque observari non absimilem structuram ; ita ut videlicet auditorius nervus , per illos enimverò mirabiles anfractus repens , undantis aëris motionibus offerat non extimam superficiem suam , sed internam , & medullarem , ex cujus impulsu vario soni diversitatem inferimus ? Cui denique non constat in odoratus instrumento quid sensoriis hisce proportionem respondens deprehendi , & processus illos , quos Mammillares appellant , communiter utrinque ad Galli cristam adstantes Cerebri naturam redolere , & odoras evaporationes per cribrosi ossis foramina ascendentes in eosdem irrumpere ; & odorum sensum procreare ? Quis proinde non admittat , si naturæ insistere non recuset , etiam in Gustu non aliunde saporum perceptionem provenire , quàm ex determinata constitutione nervorum ab illa cæterorum sensuum non admodum abludente , quorum medullam ita vellicent , lacerentque salium aciculæ , ut exinde id oriatur , quod à nobis dicitur Gustus ? Hoc purum putum ratiocinium existima , & meram conjecturam ; quid autem , si idem gustatorii instrumenti consti-

tu-

tutioni optimè respondeat , & quod suadere videtur animus , res ipsa demonstret ? sed negotium hujusmodi jam superiori capite satis superque enodavimus , adeò ut hic idem repetere nihil aliud esset , quàm actum agere ; sufficiat proinde à nobis ibi declaratum , nervulorum plurimos furculos è linguæ substantia assurgere , & siphunculorum instar ad extimam superficiem desinere , non stratos , aut repentes , & (ita enim dicam , quando ut me exactiùs explicem , non invenio) linguæ plano parallelos , sed eidem implantatos , & erectos apice suo , & osculis occurrere salibus , eosdemque in medullam admittere. Frustrà autem hic statim infurgas , ita quidem se habere isthæc omnia de nervorum distributione , sed esse pariter indubitatum , ejusmodi nervorum apices obduci membrana prætenui papillarum cupulas efformante , & consequenter , quamvis hunc nervorum situm habeamus , tamen non dari salibus penetrationem , tunica aditum obstruente ; frustrà , inquam , isthæc oggeras ; idem enim est , ac si diceres , auditionem ab auditoriis nervis non absolvi , eò quòd illuc pertingere sonus non potest , id membrana tympani prohibente ; seu potius (esset enim , quòd ad hæc responderes) non perfici visionem in retina , quia & plures tunicæ , & humores itidem plures ipsi præponuntur. Quid ? sunt , inquis , isthæc pervia & tenuissimis luminis advenientis particulis commensurata ? Optimè quidem ; sed cur eodem modo affirmare mihi non liceat , illam membranam nervorum apici superextensam perviam esse , & tenuissimis salium particulis permittere aditum ad

medullam suppositam? quid autem ulteriùs hæreo
ratiociniis, si jam superiùs expositum est, membra-
nulam illam fungorum cupulas constituentem, poris
plurimis, usque angustissimis perforatam engysco-
pio insipientibus apparere, unde ulteriùs sese infi-
nuare possunt subtilissimæ salium moleculæ? Et ne
ab hujus membranulæ tractatione, quando jam in
eandem incidimus, discedamus; vides quàm faci-
lè per ipsam ea difficultas è medio tollatur, quæ
primo aspectu aliquod negotium faceßere videba-
tur, cur nempe idem sal plures sapes non pari-
at, si plures habet facies, acies & angulos plures,
nam cùm ipsi per ejus tunicæ foramina penetran-
dum sit, si propria figura iisdem porulis non com-
mensuretur, talis penetratio prohibebitur, nec ullus
excitabitur saporis sensus: talis autem & foraminum,
& salinarum partium commensuratio esse non po-
test, nisi respectu unius tantummodò partis ejus-
dem salis, ac proinde cùm una solum ejusdem salis
facies cum angulis suis configurata sit foraminibus e-
jus tunicæ, necessarium erit, ut ex hac semper se-
se intrudat in nerveos siphunculos, & ipsorum me-
dullarem substantiam, adeoque semper eadem sui
parte nervum efficiat, unde eadem semper passio,
idem sapor exorietur. Quæ autem sit illa vis, quæ
sapida corpora nervis ipsis impingit, non ita faci-
lè dictu est, quandoquidem ipsorum gravitatem aut
nullius, aut parvi momenti faciendam puto, cùm
in pronis animalibus eadem exerceri non possit su-
pra Linguae planum, & in hominibus Gustus habea-
tur etiam ad palatum, ut dictum superiùs, quam
in

in partem tantum abest, ut sal vi gravitatis penetrare possit, ut potius levitas necessaria videatur, cum ad superiora tendere debeat: quapropter cum nulla alia facultas occurrat, quæ in memoratos nervos siphunculos salina corpora possit adigere, concludendum crediderim & motus linguæ varios undequaque salium prægnantem salivam impellentes, & aëris vim utramque, tam scilicet eam, quam juxta perpendicularem exercet, quam alteram, quam secundum latera, & elastica communiter nuncupatur, ad eam penetrationem conducere. His verò suppositis non ita difficile perceptu est, cur tam celeriter ab imposito linguæ sapido corpore Gustus ejusdem exoriatur: siquidem jam plusquam satis compertum, ad extimam usque superficiem linguæ nervas ad Gustum propagines excurrere; vis insuper assignata per quam salis particulæ, quamvis graves, in earum porulos adigantur, adeoque cum & illarum extremitates semper hient, & excipere possint salinas moleculas, & adsint pariter semper, & agitatio linguæ (quam tamen non magnificiendam duxerim hoc in negotio, cum & in eadem immota sapores experiamur; potest tamen ipsius motus ad sapores in palatum intrudendos aliquatenus facere) & aëris conatus, poterunt saporis imprimendo destinata corpora statim ac papillarum cupulis occurrunt, in ipsarum sibi commensurata foramina penetrare, exteriori adacta facultate: quod autem exinde statim consequatur Gustatio, non mirabitur; arbitror, quicumque eam esse nervorum naturam perspectum habebit, ut exquisitissimè sentiant: & ab appellenti-

bus

bus determinato quodam modo corporibus maximè alterentur. Res enimverò admiratione dignissima, cùm punctiunculis, & levibus quidem, perforatus nervus adeò cruciatur, in tam lancinantes dolores incidit, ut lethalis illa passio, quam *σπασμὸν* appellant Græci, consequatur, quâ miserrimus æger correptus brevi contabescit: mirum igitur videri non debet si cuspidulis illis suis, tenuissimisque asperitatibus occurrentes medullari nervorum substantiæ salitæ particulæ exactissimam imprimunt saporis speciem, quando illius natura est plusquam dici possit exactè sentiens. Facile tandem ex dictis colligitur quomodo quidam sapores diutiùs Gustatûs organo inhæreant, & difficulter amoveantur; quoniam videlicet ipsis aliquantum in nerveos fungulos penetrandum est, si adigantur primo violentiùs, ita ut passionem producant æquo plus vehementiorem, seu vulnusculum infligant consuetam, naturalemque punctiorem excedens, poterit absque eo, quòd sapidum ipsum corpus intùs inhæreat, ea saporis species immorari longiùs, cùm plaga illa non tam subito coalescere possit. Poterit insuper idem contingere, si sal ipse re vera infixus papillulis maneat, sive quòd acutiùs, & ad penetrandum aptiùs intrusit sese profundius laxatis aliquando ipsis tunicæ fortasse poris, nec ita facile ab affluente saliva abripi possit; sive quòd ipsa papillularum substantia & membrana ad talem vellicationem constringit porulos suos, talemque salis impetum excludere tentans contracta remoratur, exitum intercludit; sive quòd salivæ non ita liberalis copia tanti non sit, ut imbibat omnes salium

hūm moleculas , five denique quòd determinati salis illa figura sit , & conceptus , aut intestinus motus , ut ingredi quidem non ita difficili negotio possit in fungulos , egredi autem difficili , aut quòd sistatur impetus , aut quòd porulus egressuro patens non ita exactè commensuretur , unde necessarium sit , ut sal intus cohibitus repetat , seu potius à passione sua nunquam desistat , & semper eundem repræsentet saporem ; undè rursus oportet , ut ciborum omnium eadem videatur sapida species , quando ab ipsis adveniens sal altiùs tantummodo infigit infixum prius Gustatus instrumento corpus , cui quid proportionale accidere videmus , præcipuè in oculis aliquo colore , præter naturam , infectis , quibus objecta repræsentantur indiscriminatim omnia eodem modo colorata , quamvis re ipsa diversissimo sint. Ex quibus omnibus deducant alii alia , quæcumque possunt , mihi videlicet isthæc attigisse pauca satis est ; non quia omnia , quæ hinc concludi possunt , per me adducta reputem , sed quia isthæc tantummodo meditationibus non ita affluens animus suppeditavit , quorum conditionem ; cū ipse judicare non possim , (quis enim

————— *Strabonem*

*Non dicit pætum pater , & pullum malè parvus
Si cui filius est ?)*

Tamen ut mala sint , ut pauca , hoc unum habent non pœnitendum , quòd cum ipso naturæ opificio conveniunt : quid autem multa loquar , si is ipse est ,
X qui

qui prohibet, genius meus? quare, cùm talem me natura compegerit, nec repugno, nec doleo, quoniam, si quicquid per ipsam factum est, est factum pariter consultissimè,

*Di bene fecerunt, inopis me quodque pusilli
Finxerunt animi rarò, & perpauca loquentis.*

F I N I S.



VIRO CLARISSIMO,
DOCTISSIMOQUE

DOMINO

MARCELLO MALPIGHIO

MESSANENSIS ACADEMIÆ
PRIMARIO

LAURENTIUS BELLINI

BENEAGERE.



IRABERIS fortasse, Vir Clarissime, cum
à quo, licet per internuncios amicissi-
mo nunquam privatas habuisti, publicas
has epistolas acceperis. Mirari tamen
defines statim, ac animadvertes, nun-
quam occurrisset, quod privatim significarem, cum è
contra jam res expetat, ut animum tibi meum ape-
riam, & coram litteratis omnibus tibi obstrictissimum
fatear. Publicum est quidquid ex hac mea observa-
tione laudis assequor: & quoniam ad eandem ipse me
feriantem excitasti, publicum ejus rei monumentum
ponere, ne ingratus audirem, consentaneum existima-
vi. Primum illud tuum in Lingua inventum Viro
laudatissimo Borello nostro per literas aperuisti, cu-
jus & ipse ab eodem certior factus Linguam exami-
nabam, cum ecce tibi pulcherrima ejus facies sese ob-
tulit in epistolis tuis non explicata hujus observatio-

nis meæ rude principium : excolui consequenter accuratiùs observationem, & eò tandem deveni, ut verum Gustatùs instrumentum in hominibus etiam me affecutum omnino non desperem. Vides proinde, quàm æquum fuerit tractatulo meo has grati animi ergo epistolas attexere, cùm per te factum sit, ut Lingux animum, manumque admoverim, quod nunquam accidisset, nisi quæ nunciaveras, inveniando curiositas impulisset. Interim & ipse eandem partem diligentius rimabar, & de me infcius Papillas deprehendisti, sicut ipfas etiam Vir Clarissimus, nostrumque amantissimus, Carolus Fracassati, benigna forte ex se ipso deprehendit; quare de non absimili observatione tibi maximè gratulor (quando eruditissimo Fracassati gratulari coram datum est) & quòd accuratior inspectio me adeò spectatis viris adjunxerit, mihi gaudeo : id unum tantummodo dolens (si tamen dolor iste meus sanctas amicitix leges non violat) tractatum hunc de Gustus organo præ tantorum virorum circa linguam meditationibus tam in litteratorum orbe emicaturum, quàm in hac Universitate spectabili, ad adventum Solis stellæ minores. Gaudeo tamen, tum quia alienam mihi sapientiam obfuturam non iudicio, tum quia observationi non easdem fortè meditationes aptamus, sed quisque suas pro genio, tum quia, cùm res inter amicos peracta sit, communia quæque dicenda potius, quàm propria hac in re videntur, tum denique quòd si de hoc communi invento dolerem, aut invidus, aut arrogans audirem, quorum utrumque cane pejus, & angue semper odi, utpote quæ & à societatibus expellunt, & humanitare spoliant.

&c.

& nos ridiculos, quibus quid homini accidere injucundius potest, quid miserabilius? Nosti tu ipse optimè, quàm vera proferam, qui quotidie experimento discis in hominibus istis tuis livore quidem tabidis, & corrosis sed arrogantia sua tumidis, & inaniter exultantibus, quanti fiant ab eruditis, ingenuis, & æquis rei litterariæ judicibus, quàm à bonorum collegiis arceantur, quot irrisionibus succumbant, quot animi, corporisque molestiis assiduè crucientur; quod etsi nos etiam nostris hisce in regionibus abundè novimus, nostrorum tamen hominum invidiam, & insolentiam distare multum arbitror ab ea, quâ isthic plerique miserè conficiuntur; quis enim, Deus immortalis! exæquet unquam impudentissimam illam audaciam, & inflatissimum animum sibi maximum tribuentem, quo Antagonista ille tuus in publicum prodire non est veritus, triumphatoris instar spoliū præferens eruditissimas medicas conclusiones, quas & ipse, & de re medica meritissimus Dominus Catalano, unicum, ut accipio, istius Academiæ decus, & columen propugnastis; cùm tamen non modò in triumphum agere easdem non potuerit, sed ne levissimum quidem vulnuscūlū inflixerit. Vidi ego insolentis, & invidi hominis scriptiunculam, & cūm, qui pro corona affidebant viri sapientes, in risum effusissimum solverentur, non solum à risu temperavi, verum hæsi stupidus, & flecti me ad commiserationem sensi ejus miserrimi capitis, quòd è genere quantumvis rationalium, ratione destituitur, vel eandem opprimunt superbi spiritus neminem se ipsis majorem ferentes. Ita quicumque à veritate discedimus, &

facilitatem, & morum candorem avertimus, in ludibrium, & fabulam cedimus liventis titulo, vel superbè aspernantis, quam ego indignissimam notam ne subirem, has publicas epistolas tuo nomini inscriptas volui, & cum Viro amicissimo amicè agerem, ne ansam arriperet lector dubitandi, me unum haberi velle Linguae observatorem, tibi que gloriam, qualemcumque ex simili inventione attendas, surripere, & ut denique, doctissime Malpighi, grates tibi rependerem pro ea, quam meæ huic lucubrationi occasionem præbuiſti. Vale, Vir optime, & Medicum aliquod opus communi bono depromito.

F I N I S.



